

TOTOL UDATNU NAI

JESUS HAB ATAN TEUM

¹⁻² O Tiopilas, yak dahil da tatam yaami amu da yak amupa Jesus Nug udat oh heumnu, Nug danab ah keeke ipuanatomnu ele yaami. Nug udat amu dig me udie, ded Nug hab atan teum batak amu Nug udat amu oh heum. Heehe da amunu yaami. Aria da nai yaami anidme ele amu, Nug mauha bau hibaitē, ded 40 uue Nug hab atan teum. Amge ii ukom haenpa Nug gokunu haaha, tatam Nug nuhikud total danab elewen, Nug tituanatom ele amu, ag nai amu tudidna hekulagnu, Nug Kayak Oudi gagatagpa nai matom. ³ Aria Nug guitak nau amu awa mauhowa, dimpa genab edua hibaitom amu Nug nuhikud total danab elewen haen gamag ded 40 amupa gumata ona, ib kudumpa keeke amu ipuanatom. Nug ded 40 amupa Kayaknu do madodnu nai ele mehuqe doopig. ⁴ Amu ele ded 40 amupa Nug ag ele oh haen laa e lanan daanna, Nug amelagpa aum. “Ag Jerusalem paha aib uupig. Am ag keeke ena, da Mamel Nug ag keeke amu madaḱunu nai qaka aum, keeke amunu ele da ag ai doopig amu, ag Nug ameg mekulag. ⁵ Am genab Johanes nug danab ah lepa layatom amge haen elab iita amu ag Kayak Oudipa layatak aoglag,” awa aum.

⁶ Nug anam a, haen laa ag oh qauko onig Olip apa qag mena, Nug aum amunu ag Nug od medapig. “Nadi, haen imupanab na hepe, Rom

ag ahapeg, ig Israel ig edut wan ihinig gumagnigte?” aon apig. ⁷ Aeg amu Nug ag amelagpa aum. “Amu ahilagte keeke amunu ag da Mamel Nug haen ded ele aum amu ag dooglag? Iita. Nug nuka keeke amu gumate. ⁸ Amge geha dimpa Kayak Oudi Nug ahilagpa neeb, ag gagatag aon amu geha ag dahil nai Jerusalem mehuqna amu Juda wan ohpa amu Samaria amu ukeb wan atu ohpa ele gona mehuqkulag,” awa aum. ⁹ Am Nug nai amu amelagpa ana male, ag neegna daaegeg, Kayak he, Nug atan teete amu lombig laa haute, ag baula Nug ii anidpig. ¹⁰ Nug uke, ag hab atan neegna daaegeg am danab adit, a lamen hakab ele, a tulai doeh, ag ele hipaidna daanna, ¹¹ a apid. “Galelia danab, adinu ag hipaidna daanna, hab atan neegna daateb? Amu gemu Kayak Nug Jesus ahilagpanu awe, hab atan ukom. Aria geha Nug hab atan ugeke anidpig bia edua udiku,” aoya apid.

TOTOL DANAB AG JUDAS OU OTIPIG

¹² Aria ag qauko, Olip ateb, apanu edun Jerusalem wapig. Qauko amupanu Jerusalem wanak amu miag, kilomita laipu maha ele. Juda dilag dopa danab nug ahilag Metidpa tapa ukak elab amubia gokunu elele. ¹³ Ag ab okaipa tena amu ag gona, ag lag oo atan, ag daapig ele amupa tepig. Ag onilag amu Petrus, Johannes, Jakobus, Andreus, Pilipus, Tomas, Batolomiu, Mateus, Alpias beka Jakobus, Simon, nug am Selot, amu Jakobus beka Judas aaku. ¹⁴ Danab amu ag oh oolag laipu mena, haen kudum danab ah laala ele oh qag mena, unuqidnana daapig. Danab ah

amuam Jesus anig Maria, Jesus amakud amu ah laala ele.

¹⁵ Ag anam daanna, haen amupa Petrus nug laikud, ag Jesusnu oolagpa genab doopig ele, ahilag eb qak 120 anam amu nug ag oolagpa aha, hibaita, Judasnu nai matiom. ¹⁶⁻¹⁹ Danab amu nug ehed ha, udat amunu men dodo awom ele amupa ag wan laih nakok laa daden mepig. Aria nug nuka wan amupa nug beđu aihana na qe, oo aode, biig oh wanpa ne, dimpa danab Jerusalem daapig ag oh amu doopig amunu ag ahilag naipa, ag aben amunu, Akeldama ateb. Amu eduak am, Wan Tiig ele. Amu Petrus nug inam aum. “O lailad, Kayak Oudi Nug laa odepa keeke laa Judas nuhigpa bekunu a, bekununab dayaya aaku beum. Danab amu nug ig ele daatta, ig ele oh udat laipu hemut amge nug ele danab ag Jesus adaglagnu ib dayom. ²⁰ Kayak Oudi nug anam hekunu doya amu Nug he, Judasnu nai imu Dawit odepa be, buk Sampa inam yak daate. ‘Lag nuhig amu hamu dayad! Danab laa apa aib dayom!’ Amu Sam laapa yak daate amu, ‘Danab laa nug nuhig udat amu aoku,’ ²¹ amunu gemu ig danab laa, nug ig ele haen oh oidmut amu nug Judas aben aokunu tituankunig. ²² Haen Nadi Jesus Nug Johannesnu layatak awe udie udie, ded Kayak Nug awe, hab atan teum batak amu danab laala ag ig ele laipu oimut, ag oolagpanu laa tituankunig. Amu nug ig ele, Jesus edua hibaitom, nai amu mehuqkunig,” awa aum.

²³ Petrus nug anam a, aria ag danab adit otipig. Laa amu Sabas beka Josep, onig laa Jastus. Am danab laa amu Mataias. ²⁴⁻²⁵ Ag danab

adit otiatona, ag inam unuqidpig. “Nadi, na danab oh oolag diig dootem amunu danab adit imu oolahpan na aun nug Judas abenpa ba, total udat imu aokunu tituanme amu na ig ipunike! Judas nug nuhig abenpa gokunu udat amu uuom,” unuqidna anam apig. ²⁶ Anam unuqitona, aria ag Kayaknu dab mak dooglagnu kobol ahilag hena, Mataias anidna aopig. Ag nug aona, total danab elewen amu ele tudidpig.

2

KAYAK OUDI NEUM

¹ Aria Juda dilag ded okai laa onig Pentikos, ded amu udie amu ag oh udin, aben laipu apa qag mepig. ² Qag men daaegeg, hab atannu oqoti paha laipun udiom. Oqoti amu ulah nadi gagatag udiaya, oqoti ote bia. Udie, ag daapig ele amu, ag lag amu oo ohpa oqoti huana doopig. ³ Ag keeke amu doyeg amu ab ewawa, lemadmad qete amubia haaha, pane ne, danab daapig amu oh anen anen dilagpa paniom anidpig. ⁴ Anam he amu danab oolagpa genab doopig ele, danab amu ag oh Kayak Oudi ag oolagpa am be, ag ahan, nai diigdiigpa nai madipig. Amu Kayak Oudi Nug he, ag odelagpa anam nai madipig.

⁵ Haen amupa wan ohpanu Juda danab, ag Kayak dab medapig ele amu, ag gona ab ab daapig, apanu udin Jerusalem daapig. ⁶ Ag haen amu oqoti amu doona, danab ah ameg nadi udin qag mena, danab pide pidenu ag oh total danab, ag ahilag naipa nai mehuqegeg doopig. ⁷ Ag nailagpa nai mehuqeg doonna, ag otaina, ag dab mak

kuḍum aona apig. “Umu aḍi? Aṭem hena heṭeb? Danab nai maḍiteb ele umu ag amu Galelia danab. ⁸ Amu aṭemun ig oh danab ab laalapanu amu ig nainigpa nai dooṭem? Ig aninkad mamenkad matiegeg dooṭem amubia dooṭem. ⁹ Ig amu Patia, Midia, Ilam, amu Mesopotemia ele daaṭem. Amu Juda, Kapadosia, Pontus Asia ele daaṭem. ¹⁰ Amu Prisia, Pampilia, Igipta amu laih Libianu, Sairini guguiṭaknu ele daaṭem. Amu Rom danab ele ig oh uḍimut daaṭem. ¹¹ Ig Juda amu laala Juda kobol awak ele, amu ig Krit amu Arabia apanu ele uḍimut. Uḍit, ig oh nainig aben abenpa Kayak uḍat enanag heumnu mehuqegeg dooṭem,” aon apig. ¹² Ag anam anana, ag oh ehed oṭaina, dab mak kuḍum aona, ag aka aka, “Keeke umu amu aṭemunnab?” aon apig. ¹³ Ag anam apig amge laala ag awa awa qeṭak nai maṭin, inam apig. “Umu amu ag wain huana laeg, kaaka aqe heṭeb,” aon apig.

PETRUS NAI MEHUQOM

¹⁴ Ag anam aon aeg amu Petrus aha hibaite, toṭol danab elewen amu ele ahaeg, nug gagatag ewa, danab ah ag tutuku doona maidkulagnu inam aum. “Juda danab ag amu danab uḍipig gemu Jerusalem daateb ele ag oh, da nai maḍipi, ag daulag human dab mebepeg, da keeke amunu diig mehuqpi doyeg! ¹⁵ Ag, ‘Danab imu wain laegeg, kaaka aqate,’ aṭeb amge danab imu ag anam ii heṭeb. Iiṭa! Geha iiku am buṭua 9 kilokib amu ag dooṭeb, ig buṭuanab wain ii laṭem. ¹⁶ Kobol imu am kaaka aqaknu iiṭa. Kobol imu amu anuka propet Joel nug Kayak ode awa, nai maṭiom amu, nug maṭiomnu iiku bete. ¹⁷ Kayak Nug inam Joel

amegpa a doya yom. ‘Dimpa haen nug malakunu heebeb, haen gamag amupa da dahil Oudi, danab ah madakul. Madapi amu ag Kayak Oudi aopig ele, ag oolagpanu amu laala geha ag propet dahil nai mehuqkulag. Amu geha da laala keeke diigdiig tuleglegpa ipuanadkul am laala ag amu doyak tul niakpa madakul. ¹⁸ Amu geha haen amupa da udat nid, udat ah dahilad ele Oudi dahil madapi, ag dahil nai mehuqkulag. ¹⁹⁻²⁰ Da geha kobol diig laa habpa hepi, aam nug gatatu maneb, kalam am tiig eduku. Aria wanpa da eponak keeke, tiig, ab adu amu kahug nadi ele hepi, geha bekulag. Amu Nadinu ded am geha dim beku. ²¹ Amu danab ah oh ag Nadi edua diikunu ekulag amu, ag ehanitak amu aoglag.’ Joel anam yom.

²² Amu Israel danab ag nai imu doyeg! Da ag amelagpa Jesus, Nasaret ted, nuhignu api dooglag. Ag aka aaku dooteb, Kayak Nug ehanite, Nug ag oolagpa eponak keeke, danab hekunu elele iita diigdiig heum. Kayak he, Jesus anam heum, amuam Kayak Nug Jesus me neum ipuanadte. ²³ Kayak Nug anuka nuhig doyakpa anam hekunu nai matiom amu Nug Jesus awa, ag epelagpa me, ag danab nau, ahilag ehanitakpa, ad emaitakpa atulna qeeg mauhom. ²⁴ Amge Kayak Nug mauhak oolagpanu uhuqa he, edua hibaitom. Mauhak amu Nug adakunu elele iita. ²⁵ Amuam Dawit nuhignu yom amubia. Dawit nug inam yom. ‘Nadi Nug ou iwa daate anidtem. Nug da ele ou qeda, gagatag medede amunu keeke laa nug da ii udalidma. ²⁶ Amunu da oo madod enanag ele dayeye, oo gamag ahak nai matieye, da daka dimpa keeke ena

aokul amunu ameg metem. ²⁷ Adinu? Na geha da ii uuidmana amunu da mauhak daateb abenpa ii daapa. Am geha na nahip danab tutuku opia awak ele amu, na ii uuidmana amunu mauhak nug heeb, beđu ii nauhma. ²⁸ Na bau dayaknu ib da ipunidme. Na da ele daagnih amunu da oo gamag ahak okainab dookul, awa yom.” Petrus nug anam awa aum.

²⁹ Nug anam anana, nug nai baula tudita aum. “O lailad, Dawit nug nai amu matiom amu nug nuhignu dab maama ii matiom. Ig amu atem doognig am Dawit nug mauhe boomeg, nuhig boomak aben ig oonigpa iiku daate. ³⁰ Dawit nug propet dayom amu Kayak Nug nukā nuhig nai gagatag qedata, Dawit amegpa inam a doyom. ‘Dimpa na budunpan da king laa otipi ba, nahip king udat amu Nug heku,’ awa aum. Nug anam a, Dawit doyom amge ³¹ amu ii nak haenpa nug dimpa Kayak Nug heeb, Kristus Nug mauhakpanu edua hipaidku, mauhak abenpa ii daama, Nug beđu ele ii bedamanu aum. ³² Aria anam amunu ag doyeg! Kayak Nug he, Jesus edua hibaitom. Ig oh Nug anam heum amu anidmut amunu ig iiku maditem. ³³ Nug hab atan teum, Kayak epeg nadiappa, amuam anuqak aben, amupa daate. Mameg Kayak Nug nuhig Oudi, anuka medakunu nai qaka aum bia amu, Nug metom. Mete, Jesus Nug ig ele iiku gemu Kayak Oudi mekom amunu ag keeke imu gemu anidna dooteb,” awa aum. ³⁴⁻³⁵ Amu Petrus nug anam anana, nug nai imu tudita amelagpa aum. “Dawit nug nai laa ele aum am inam. ‘Nadi Nug Nadi dahil amegpa inam aum. Na am dahil dayaknu aben anuqak imupa daape

ukeb, dimpa da geha keked nahipad oh tapaladpi, ag na waatpa daaglag,' awa aum. Aria Dawit nai amu mañiom haenpa nug nuka nuhignu dab maama ii mañiom. Iita. Nug mauhe, beđu hab atan ii teum. Iita. Ag nug boompig amunu nug nai amupa Jesus ipunika heum. ³⁶ Amunu Israel bekod, ag oh tutukunab doyeg! Kayak Nug he, Jesus Nug Nadi, am Kristus ele daate. Ag Nug ad emaitakpa atulpig." Petrus amelagpa anam mañie doopig.

³⁷ Ag nai mañie doona, nai amu ag oolagnab yom amunu ag ahan, Petrus amu total danab elewen ele ag amelagpa inam apig. "O ig lainkad, geha ig atemtai hekunig?" aon apig. ³⁸ Aon aeg am Petrus nug amelagpa aum. "Kayak Nug ahilag hipunin uhuqa madakunu amu ag oh aka anen anen ag oolag edueb, Jesus Kristus onigpa layatak aweg! Ag anam hepeg, Kayak Nug nuhig Oudi ag hamu madaku. ³⁹ Am Kayak Nug anuka Nuhig Oudi ag amu ag bekalkad amu wan laa adepa danab ah daateb ag ele madakunu nai qaka aum. Yo aun adi ag ihinig Nadi Kayak Nug ag onilagpa eku amu, ag madakunu nai qaka aum," awa aum. ⁴⁰ Am Petrus nug nai kudum laala ele dab mak awaknu nai mehuqaqa, nug amelagpa inam aum. "Ag lailkad ag Jesusnu oolagpa genab ii dooteb amubia ag aib hepig. Iita! Ag oolag edueb, Kayaknu ehanitak aweg!" awa aum.

KRISTEN BAU AMU AHILAG HAK ENA

⁴¹ Am danab Petrus nai mañiom amu genab doonna, ahilag eb qak 3000 keeke amu ag layatak aopig. Aona ag Jesusnu oolagpa genab doopig

ele amu oolagpa ukæg, oh laipu daanna ⁴² amu ag total danab tuelp nai mehuqegeg doonna, laipu dayak ena daanna, nug ehanidnana, e laipu lanan, Kayak unuqidpig. ⁴³ Ag anam henana, danab ah oh ag Kayaknu enanag doona, ag oolag ele otaiom. Amu Kayak Nug total danab tuelp epelagpa eponak keeke, danab hekunu elele iita amu kudum diigdiig ele heum. ⁴⁴ Anam heeche, danab oh ag Kristusnu oolagpa genab doopig ele amu, ag oolag laipu mena, laipu qag mak daanna, danab laala ag keeke ele amu aka ahilagnuib ii adapig. Iita, ag laipu qag mak daateb ag oh ahilag dayom. ⁴⁵ Am danab laala ag wan ele amu laala ag keeke ele amu ag heeg, danab laa daden meeg, ag men dodo amu aona, danab laala e aon lakulagnu elele iita daapig amu otin madapig. ⁴⁶ Ag anam henan, ag oh oolag laipu daanna amu ded oh mana metak laka gonana, Kayak nai doopig. Amge ag laulag anen anen oh oina, ag oo gamag ahak doonna, ag Kayak amegpa, “Ena hen mekame,” anana, e lapig. ⁴⁷ Anam henana, haen oh Kayak binag meegeg, danab ah laala oh ahilagnu oolag enaib dayom. Haen amu ded ohpa Kayak Nug danab ah laala edua diieye, ag kristen tamaniak oopa daapig ele amu, ag ele tudidpig.

3

DANAB BAEG NAU ELE EDUA ENA DAYOM

¹ Haen amu ded laa Petrus Johannes ele a aam ameg ewampa, unuqitak haenpa, mana metak laka unuqidkulahnu gopid. ² Ukaeh, danab laa dayom, nug baekud baag batak, wan tabte ele,

a oh mauhp̄id. Nug anig oopanu anam doum. Ag ded oh nug aon gona, mana metak lagnu ad odpa, od amunu ag, Antaknu Enanag ateb, amu gukuidna meeg dayaya, danab ah ag mana metak lag oopa noegeg, men dodo metaglagnu unuqatata dayom. ³ Danab amu nug Petrus Johannes ele a mana metak lag oopa noeheh anata, nug keeke metaglahnu unuqatom. ⁴ Unuqata, Petrus Johannes ele a nug gagatag neekidyaya amu Petrus nug aum. “Na i anite!” awa aum. ⁵ Anam a, danab amu edua, oo ekude, ahilahpa uke amu nug oopa, “A keeke medaglahnu hetep,” awa aum.

⁶ Amge Petrus nug aum. “Da men dodo iita amge da dahil keeke daate amu da na medakul. Jesus Kristus, Nasaret ted, Nug onigpa da na amenpa atem. Na ahan oiye!” awa aum. ⁷ Petrus nug anam awowa, epeg bahia, epeg nadiappa ada, hume, pahanab baekud oh gagatag qepid. ⁸ Nug baekud gagatag epaeh, nug paha aha hibaita tapa oiyeye, nug Petrus Johannes ele oh mana metak lag oopa nonana, nug aha oola ta oola nana oiyaya, Kayak binag meum. ⁹ Danab amu aha, Kayak binag maama oiyeye, danab ah oh ag nug anidna, ¹⁰ ag nug doopig, nug am danab laa iita, nug aaku hanhan mana metak lagnu ad odpa, od amunu ag, Antaknu Enanag ateb, amupa meeg dayaya, danab ah lag oopa noegeg, nug men dodo metaglagnu unuqatata daatom ele, nugib aaku gemu ena dayom, ag amu anidna, ag otaina, dab mak huana aopig.

PETRUS MANA METAK LAG OOPA NAI MEHUQOM

11 Amu ag anam dab mak huana aoegeg, nug aha, Petrus Johanes ele adualatete amu danab ah oh ag ahan qaibad dona, mana metak lagnu ad oopa aben laa, Solomonnu Aben ateb, amupa qag mepig. Adinu? Ag huana otaina hepig. 12 Ag anam heeg, Petrus nug anata, nug amelagpa inam aum. “Israel danab, ag adinu keeke imunu dab mak kudum aonna, ag i neekit-teb? Amu atemun ag i iya, ihinih gagatagpa o iita i iya ihinih ena hakpa i heud, danab imu nug aha oite ateb? Anam iitanab, iita. 13 Abrahamnu, Isaknu, Jakop elenu Kayak, Nug am ig alankad dilag Kayak, Nug aaku nuhig udat imupa nuhig nid Jesus binag humate. Amge ag Nug aon keked epelagpa meeg, Pilatus nug uhuqkunu aum amge iita, ag am danab amu di medapig. 14 Ag am danab amu, Nug hipunin laa ii heum, Nug am opia awak danab amu, ag Nug di metan, ag Pilatusnu eeg, nug danab laa, nug danab aqe mauhpig ele amu, nug danab amu uhuqa awa, ag mata, heeb gokunu enan, 15 ag danab ena, Nug ig bau hanhan ena dayaknu ib, ib amupa omaigte ele amu, ag Nug qeeg mauhom. Ag qeeg mauhom amge Kayak Nug he, edua hi-baite, i nuhig nai amunu mehuqtep. 16 Amu i Jesusnu oonihpa genab doomud amupa Jesus Nug he, danab imu, ag nug anidna dooteb ele amu, nug enanagib daate. Yo, i Jesusnu oonihpa genab dootep, ib amupa Nug he, danab imu nug edua, ag anidteb bia ena daate,” awa aum.

17 Petrus anam anana, nug nai tudita aum. “O lailad, da genab dootem, ag Jesus nuhigpa ehed hepig amu, ag tutuku ii doonna, ag kobol amu hepig, ahilkad iki danab ele anamib aaku.

18 Kayak Nug anuka nuhikud propet oh odelagpa, nuhig Kristus, Nug guitak nau amu aokunu ana mehuqa aum. Nai amu niie udie, ag amu hepig amu, amupa Kayak he, nuhig nai aaku meu oum. 19-20 Amunu Kayak Nug ahilag hipunin opieb, ag opia awak daaglagnu, geha Kayak oo gamag ahak haen madaḱunu, Nug heeb, Kristus, Kayak Nug ahilag ehanitak daaḱunu tituanom ele amu, Nug udikunu, ag oolag edueg! Kayak Nug anuka laa tituanom ele amu, Nug am Jesus. 21 Amu gemu Nug Kayaknu dayak aben anuqakpa daate. Nug apa dayaya, Kayak keeke oh edua bau heḱunu anuka matia, nuhikud propet, ag opia awak ele amu, ag odelagpa Nug mehuqom, haen amu ameg mete. 22 Nuhignu Moses nug inam aum. 'Kayak, Nadi ahilag, Nug geha ag lailag laa heeb aha, Nug propet ahilag daaku, da bia. Nug adi ab amu ag doyeg! 23 Am danab ag propet amu, nuhig nai ii doonna, ag mauhḱulag. Ag Israel oolagpa baula ii daamna,' awa aum.

24 Amu propet oh anuka nai mehuqpig amu Samuelnupa dig mak, propet daaeg udiom amu ag oh haen gemu ihinigpa doum daate imunu apig amu iiku ig anidtem. 25 Kayak Nug propet odelagpa adi beḱunu aum, nug Abraham ele tituana, keeke laa heeb beḱunu nai qakom ele amu, ag gemu daateb, ag nai adit amu a meulah aoglagnu daateb. Nai Nug Abraham amegpa qaka aum am inam. 'Da hepi, na buḱunpa wan ohpan danab ag ititak aoglag,' awa aum. 26 Amunu Israel danab, Kayak Nug nuhig udat danab otia he, Nug tatam ahilagpa ag ititak madaḱunu udiom. Nug heeb, ag oh aka

anen anen ahilag ehed hak naupanu edun, Nug dim lamidkulag nu heum,” awa aum.

4

AG PETRUS JOHANES ELE ADALATPIG

¹⁻² Petrus Johanes ele a danab ah Jesusnu ipuanadyaya, nuhig gagatagpa danab mauhpig ele ag edun hipaidkulag nu ele mehuqehh, mana metak danab amu mana metak lag gumaknu daup ikilag amu do gumak danab-Sadusi adi ele ag a nai madipid amunu ahilahnu oolagpa aeg bak nau doyegeg, danab adit amu a nai amu matieheh, iki danab amu ag ahilahpa udipig. ³ Udin, tueb meum amunu ag adualatna, mani guitak oopa maateg, tuqan laipu daapid. ⁴ Ag anam hepig amge danab ah kudum, a nai madipid ele amu, ag nai amu doona, ag oolagpa genab doopig. Amu haen amupa, oh ag oolagpa genab doopig ele amu, ag oolagpanu danabnuib eb qak am 5,000 anam.

⁵ Aria Petrus Johanes ele a mani guitak oopa daaeheh, wagde amu Juda dilag danab okai amu Juda iki danab am do mehuqak danab ele amu ag udin, Jerusalem qag mepig. ⁶ Am mana metak danab dilag iki Anas, amu Kaiapas, Johanes, Aleksanda amu danab laala ele, ag oh budub laipunu amu, ag laa qag mepig ele amu, ag oh qag mena, ⁷ ag total danab adit amu diiatna, ag hetodiakpa maatna od matapig. “A gagatag adipa o a aun onigpa udat amu hepig?” aon od matapig.

⁸ Aria ag anam aon od mataegeg, Kayak Oudi Nug Petrus oopa am be, nug aha ag amelagpa aum. “Israel danab okai amu ag iki danab ele,

9 ag adeku? Gemu ag i danab baeg nau ele amegpa aud, nug ena dayom, amunutai iiku od metateb. 10 Anam dayeb amu aria gemu ag oh tutuku doopeg am Israel budub oh ag ele amu inamib dooglag. Jesus Kristus, Nasaret ted, ag gemu daateb imu, ag Nug ad emaitakpa atulpig amge Kayak Nug he, edua hibaitom ele amu, Nug he, danab imu edua ena daya oiye, ag anidteb. 11 Amu lag hak danab ag lagnu men anuqak daakunu, amu anidna uupig bia ag gemu daateb, ag Jesus anidna di medapig amge Nug anuqak beum daate. 12 Wan imupan danab aun nug ig edua awikeb, ig hipunin waapa ii daamta? Iita! Jesus Nug nukai elele. Wan imu ohpa ig laa onigpa ehanitak amu aognignu iita, Jesus nuka," awa aum.

13 Juda dilag danab okai amu ag Petrus Johannes ele a ii badapid anidna, amu a sul okai ii hepid ele doona, ag dab mak kudum aopig. Anam henana amu ag Petrus Johannes ele a Jesus ele oipig amu dab mepig. 14 Ag dab meegeg, danab bedu ena dayom amu nug Petrus Johannes ele ag oh hipaidna daaeggeg anadna, ag a nai apid amu edun nob mekulagnu ib laa ii anidpig. 15 Ag anam daanna amu ag Petrus Johannes ele, a Juda dilag hetodiak okai, onig Sanhidren, lag oo amu a uuya, dimitim gokulahnu aeg ukaeh, ag atem hekulagnu amu matina apig. 16 "Ig danab adit umu am atemtai hatkunig? Adinu? A kobol danab hekunu elele iita amu hepid. A heeh, Jerusalem danab ah daateb umu ag oh doon malapig amunu ig a ii hepid aot akunignu am elele iita. 17 Amge danab laih laihnu ag doomnanu, ig danab adit imu a baula Jesus

onigpa nai ii maṭimyanu apuṭ doyed!” aon apig.

¹⁸ Ag anam awona, eḍun aeg waeh, ag a amelahpa apig. “A Jesus onigpa nai baula eḍui danab ah amelagpa iinab mehuqmaya! A baula iinab ipuanadmaya.” Ag a amelahpa gagatag anam apig. ¹⁹ Ag amelahpa anam apig amge Petrus Johannes ele a apid. “I Kayak nai imu uḍa, ahilag nai dim lamidkunih am Kayak Nug keeke amunu am ena awa akute? Ag tutuku anidna dab mak aweg!” aoya apid. ²⁰ A anam awoya am baula tudidya apid. “I amu odenih qamutkunihnu ele iita. Adinu? I keeke oh amenihpa anidda, nuhig nai doomuḍ ele amu, ib laa iita, mehuqkunihnab,” aoya apid.

²¹ A anam aeh, aria danab okai ag a amelahpa nai gagatag apig amu, ag nai anam bia laala ele tudidna awona, ag danab ah oh ag Kayak keeke he anidna, amunu oolag gamag ahe, ag Nug binag mepig anidna, ag danab ah amu diig amunu badapig amunu ag Petrus Johannes ele guitak mataglagnu ib ii anidna, heeg gopid. ²² A aeh, Jesus he, danab eḍua ena dayom ele amu, nug nuhig maḍ 40 anam amunu danab ah ag Kayak binag mepig.

KRISTEN GAGATAG AOGLAGNU UNUQIDPIG

²³ Aria danab okai ag heeg, Petrus Johannes ele a goya, a lailti gumadya goya, mana metak danab okai amu iki danab ele ag hetodiakpa nai apig amu oh aeh doopig. ²⁴ Amu ag oh doona, baalag laipu mena, Kayak unuqidna inam apig. “Nadi, na hab wan yu amu keeke oh agupa daateb ele amu, keeke amu oh na hadme. ²⁵ Amu anuka na

he, nahip Oudi Nug nai nahip imu ig alanig Dawit, nug am udat nid nahip amu, nug amegpa a doya, nug aum. 'Amu adinu iita adi danab ag Kayaknu oolagpa aeg bak nau dooteb? Adinu danab ah budub amu ag Nug edidkulagnu qag men, nai hamu maditeb? ²⁶ Wanpanu okai okai ag Kayak amu laa Nug tituanom ele, ag a ele ban hekulagnu bapaidna amu wanpanu okai laala ag bannu qag mepig.' ²⁷ Dawit nug aum bia amu ag genab anam hepig. Herodes Antipas, Pontius Pilatus ele am iita adi danab amu ag Israel ele, ag oh ab okai imupa qag mena, ag Jesus gedidpig, Nug am udat danab nahip, opia awaknab ele. Na Nug anuka tituanme. ²⁸ Ag anam hekulagnu qag mena anam hepig amu, Kayak na keeke oh anam bekunu anuka ib amunu ame amu ag amuib hepig. ²⁹ Nadi, danab amu, ahilag nai matiak ena iita amu ante! Anidna amu nai ig, nahipad udat danab amu, na ig ehanigpe, ig badak iitapa nahip nai mehuqkunig. ³⁰ Laa ele amu na Jesus, nahip udat danab opia awak ele amu, na Nug onigpa epen bahin, ode danab adaladpe, ag edun ena dayeg! Kobol danab hekunu elele iita amu na amu ele Jesus onigpa he!" aon unuqidpig. ³¹ Ag unuqidna, baag qeegeg, lag ag daapig ele amu udalele, Kayak Oudi ag oolagpa am be, ag ii badana, Kayak nai mehuqpig.

KRISTEN AG NUG EHANITAK HEPIG

³² Ag anam aaku henana, oolagpa genab doopig ele ag oh dab mak laipupa oolag laipu dayeye amu danab laa nug keeke ele amu nuhignuib ii adom. Iita. Keekepa amu ag nug ehaniteg ³³ amu total danab tuelp ag Nadi Jesus edua hibaitomnu nai

amu gagatag ele mehuqegeg, Kayaknu ehanitak okai hamu megte ele amu, ahilagpa okai dayom. ³⁴ Anam dayeye, ag oolagpa danab laa nug keekenu, enu ele tutu mak hamu ii dayom. Iiṭa. Danab laala ag wan o lag ele, ag aeg, danab laa daden meeg, men dodo amu aon uḍin, ³⁵ total danab tuelp maṭaegeg, ag otin, danab laala elele iṭa amu madapig. ³⁶ Ag anam heegeg, danab laa apa dayom, nug onig Josep, nug am Lewi buḍub, Saipras ted. Nug onig Josep amge danab tuelp ag am nug onig Banabas atadpig. Onig amu diig eduak amu inam, heeb oolag gagatag qak danab. ³⁷ Aria danab amu nug wan laih nuhig he, danab laa awe, nug men dodo amu awa uḍia, total danab maṭom.

5

ANANIAS SAPIRA ELE

¹ Amu danab laa onig Ananias, nug wau onig Sapira, nug wan laih me, danab laa awe, nug men dodo awa, ² nug otia laih amu nuhig maama, nug men dodo laih amu awa uḍia, total danab tuelp maṭa, “Wan dahilnu nob oh iiku,” awa aum. Nug wau ele oh a total danab anam ham bupualadkulahnu oolah laipu dayom. ³ Nug anam a amu Petrus nug aum. “Ananias, aḍinu Satan na ootpa am be, na Kayak Oudi amegpa ham bupuak nai maṭinna, ‘Da wan mei, laa nug daden me, men dodo aomi amu oh iiku,’ ame amge na laih nahip daakunu lokumna, laihib aon uḍime? ⁴ Na tatam wan amu laa aokunu ii meeme amu naka nahip dayom. Am dimpa na ae, daden meeg, men dodo amu ele nahipib. Amu aḍinu na kobol amu

hekutnu ootpa dab meme? Na heme amu danab ii bupuidme. Iita. Na Kayak amegpa ham bupuak nai ma_{ti}me,” awa aum. ⁵ Aria Ananias nug Petrus nai aum amu doya, nug na qa mauhe, danab oh ag amunu nai doona amu ag huan ba_dapig. ⁶ Aria nid bau ag ahan dona, lamen laapa be_{du} hautna, aon gona boompig.

⁷ Amu aam ameg ewam u_{ke}, Ananias wau nug u_{dia}, lag oopa noum. Nug amunu nai laa ii doyom. ⁸ Nug no, Petrus od me_{ta} aum. “Na ape doyei! A_{te}mu? A wannu daden nob amu elele i_ikuibte?” awa aum. A am ah nug aum. “Amu aa_{ku}ib,” awa aum. ⁹ Ah nug anam a, Petrus nug amegpa aum. “Amu a_{di}nu a oh nai laipu ma_{ti}ya, a Na_{di} O_udi, Nug ahilah ehed hak amunu nob mata_{ku} o iita anid_{ku}lahnu heya eed_{pi}d? Doye, danab ag na gamut boomona dopig, ag odpa hipaid_{pi}g da_{te}b, geha ag na ele boomid_{ku}lagnu mawid_{ku}lag,” awa aum. ¹⁰ Petrus nug anam aawo, ah amu laipun nug baegpa na qa mauhe, nid bau ag lag oopa nona, ah mauhom anidna, ag aon maon gona, gamu boompigpa ou qen boompig. ¹¹ Amu kobol amu be, kristen tamaniak oh amu danab ag keeke amunu nai doopig ele, ag ele huan ba_dapig.

TOTOL DANAB AG DANAB BAPALADPIG

¹²⁻¹⁴ Aria haen amupa totol danab tuelp, kristen tamaniak amu abpan danab laala ele ag hanhan mana me_{ta}k lagnu a_d oopa, aben laa Solomonnu aben a_{te}b, amupa qag medapig. Qag menan oinna, totol danab tuelp ag abpan danab oolagpa eponak keeke, danab he_{ku}nu elele iita ku_{du}m diig_{di}g ele hepig. Ag anam qag mena oipig amge Juda laa

ag, ag ele qag mekulagnu uupig. Ao, Juda laa ag, ag ele oh qag mekulagnu uupig amge abpan danab ag kristen tamaniaknu oolag enaib dayom. Ag oolagpa ena dayeye, danab ah ele kudumnab ag Jesusnu oolagpa genab doona, ag kristen tamaniak oopa gopig. ¹⁵ Aria total danab tuelp ag udat danab hekunu elele iita heegeg, danab laala ag ode danab amu qadaqadpa akan uđin, ib daugpa maateg niipig. Amunu diig am Petrus oiyebeb amu nuhig itotog amu ode danab qadelagpa ukeb, ena daaglagnu oolag dayom. ¹⁶ Ag anam heegeg amu danab ah, ab laala Jerusalem guguitak daateb, apan ag ele ahan, danab ode ele amu danab ouđi nau ele akan uđiegeg amu ag oh edun ena daapig.

LAA AG TOTAL DANAB EHED HADPIG

¹⁷ Ag anam heegeg amu mana metak danab dilag iki amu nuhikud ehanitak danab laala, ag am do gumak danab-Sadusi oolagpanu, ag oolagpa aeg bak nau doopig. ¹⁸ Ag anam hena ahan, total danab tuelp adaladna, mani guitak okai amupa maadpig ¹⁹ amge tuqan amupa Nađinu engel nug mani guitak lag od matula he, dimitim doeg, nug amelagpa aum. ²⁰ “Ag edun gona, mana metak lag oopa nona, danab ah amelagpa kristen bau oiyaknu diig, amunu mehuqpeg doyeg!” awa aum.

²¹ Engel anam a amu wagde butuanab total danab tuelp ag ahan gona, mana metak lag oopa nona, danab ah amelagpa engel akulagnu aum ele amu, ag nai amu danab ah ipuanadpig. Amu total danab tuelp ag mana metak lag oopa daaegeg, mana metak danab dilag iki amu nuhikud ehanitak

danab ele ag qag mena, Juda dilag hetodiak okai, onig Sanhidren, amunu danab amu Israel dilag iki danab oh onilagpa eeg, ag udieg amu ag ahilag daup ag mani guitak laka gona, totoo danab tuelp diin udiglagnu apig. ²² Ag aeg, daup ag mani guitakpa gopig amge totoo danab tuelp ag apa ii daapig anidna amu ag edun qag mepigpa gona, ag keeke atem atem anidpig amu aeg doopig. ²³ Ag inam apig. “Ig gota, mani guitak lag amu od lok gagatag aqak daeeg, daup ag od oh gumapig anidmut. Aria ig od matulmut amu ig lag oopa danab laa daeeg ii anadmut,” aon apig. ²⁴ Anam aeg doona aria mana metak danab dilag iki amu daup iki ele ag dab mak kudum aonna apig. “Keeke atemtai laa ana daakutai,” aon apig.

²⁵ Amu ag anam matiegeg, danab laa udia amelagpa aum. “Doyeg! Danab ag mani guitakpa inadpig ele amu, ag mana metak lag oopa, Jesusnu nai danab ah ipuanadteb,” awa aum. ²⁶ Danab amu anam a doona, daup iki amu daup ele ag gona diipig amge ahilagnu ehed laa ii hepig. Adinu? Ag badan inam apig. “Ig ag makudadput amu danab ah ag ig menpa iqaglag,” aon apig.

²⁷ Ag anam anana, diin udin heeg, hetodiak okai, onig Sanhidren, amupa hipaidna daeeg, mana metak danab dilag iki nug amelagpa aum. ²⁸ “Amu ig ag amelagpa ag Jesus onigpa nai baula danab ah iinab ipuanadmananu amut. Adinu ag amu anam heeg, danab ah oh Jerusalem daateb ele aaku doopig. Amu ag danab ag ihinignu amu, ‘Jesus Nug danab ena, ag qeeg mauhom,’ aon akulagnu heteb,” awa aum.

²⁹ Nug anam a amu Petrus nug total danab tuelp ele ag oh edun apig. “Ig am Kayaknu nai amu dim lamidkunig. Danabnu nai amu ig ii dim lamidmata. ³⁰ Amu ag Jesus ad emaitakpa atulna qeeg mauhom amu ig alanignu Kayak Nug he, edua hibaitom. ³¹ Nug am King amu ihinig ehanitak daakunu, Nug ihinig gamag danab amunu Nug heeb, ig Israel ig oonig edueb, Kayak Nug hipunin ihinig uhuqa megakunu amu Kayak he, Nug edua hibaita, atan ta, Nug Kayak epeg nadiappa, amuam anuqak aben, amupa daate. ³² Amu ig keeke amu ohnu nai mehuqak danab daatem. Kayak Oudi ele nai amunu mehuqa ate. Kayak Nug danab ah ag nai nuhig dim lamidteb amu nuhig Oudi madate,” aon apig. ³³ Ag nai amu aeg doonna, ag oolagpa aeg naunab be, total danab tuelp aqapeg mauhkulagnu apig.

GAMALIEL TOTOL DANAB EHANAṬOM

³⁴ Ag anam hekulagnu apig amge Juda dilag hetodiak okai, onig Sanhidren, amunu danab laa aha hibaitom. Nug am do gumak danab-Parasia onig Gamaliel. Nug danab ah do ipuananadtom amu ag nug binag humapig. Nug aha, ag amelagpa total danab tuelp apeg, nakok dimitim gokulagnu aum. ³⁵ Nug a, ag heeg, dimitim ukæg, nug hetodiak okainu danab laa daapig amu amelagpa aum. “Ag Israel danab, ag kobol adi danab imu dilag hekulagnu heteb amu ag dab meig! ³⁶ Adinu? Ag imu dooteb. Matu haen Tiudas nug aha, ‘Da danab okai,’ anana nug nuka binag ma, ham bupualata he, danab 400 ag ahan dim lamidpig. Amge gabman nug Tiudas qe mauhe amu danab ag

nuhignu oolagpa genab doopig ele amu, ag ele gona qetodeg, nuhig udat aaku iita meum. ³⁷ Amu Tiudas onig iita me, nug heum bia haen gabman nug danab ah onilag awewe, Galelia ted Judas nug aha, danab ah laala biilagpa ya he, ag nug dim lamiteg gona, Rom dilag gabman lamidkulagnu ban hepig. Amge nug ele qe mauhe amu danab oh nug diie oipig ele amu ag matatun gona, hamu oipig. ³⁸ Ig amu anam anidmut amunu da ag amelagpa aтем. Ag danab umu amu, ag uuadpeg dayeg! Uupeg, ag daanna hebepeg, keeke amu diig am danabnu dayeb amu, geha na qeeb, iita meku. ³⁹ Amge genab Kayak Nug keeke amu he bete amu ag Nug ipu oo nekulagnu am elele iita. Ag anam hena amu ag aaku Kayak ele ban hekulag,” awa aum.

⁴⁰ Gamaliel nug anam a, ag nuhig nai dim lamidna, totol danab tuelp ii aqapig amge ag diin, bupa ehed matadatona, nai Jesus onignu amu ii matimnanu gagatag amelagpa awona, heeg gopig. ⁴¹ Ag anam heeg, totol danab tuelp ag Juda dilag hetodiak okai, onig Sanhidren, amupanu dimitim gona, ag oolag gamag ahehe, ena doona, inam dab mepig. “Ig Jesus onignu udanak guitak ele aomut amuam ena,” Ag anam dab mepig. ⁴² Ag anam awona, ded oh ag mana metak laka amu danab ah laulagpa ele oina, Jesus Nug am Kristus, amu mehuqnana ipuanadpig. Ag Nai Ena amu mehuqkulagnu ii uupig.

6

AG DANAB EBLAIH ADIT ELE OTIADPIG

¹ Ag Jesus Kristusnu Nai Ena amu mehuqegeg, haen amupa danab kudum Jesusnu oolagpa genab doyegeg, ameg amu tuditegeg, okai meum. Anam beebe, ag oolagpa ameg laa, ag Grik nai dooteb ele amu, ag ahan, ameg laa Hibru nai dooteb ele amu, ag ele aeg ona aeg do amelagpa apig. “Ag ded oh udat imu tipalteb. Ag ah qab ahilkad, ag e iita ele amu, ag e madateb amge ag ihinkad ah, qab daateb amu, ag ii ehanadteb,” aon apig. ² Anam daye, total danab tuelp ag aeg, danab Jesusnu oolagpa genab doopig ele amu ag oh udin, qag meeg, amelagpa apig. Ig Kayak nai matiak udat ii uumta. Ig anam hekunig am Kayak noobpa ena iita ³ amunu o lainkad, ig inam, hekunig. Ag oh oolagpanu ag danab eblaih adit laa, danab ah ag danab amunu ehed laa ii ateb, ag Kayak Oudi aopig, ahilag doyak ele am ena amu, ag danab eblaih adit amubia anateg! Danab amu ig udat amu madaput, ag hekulag. ⁴ Amge ig total danab amu, ig hanhan unuqidtata, Kayak nai amu danab ah ipuanadkunig,” aon apig. ⁵ Ag anam aeg, danab ah oh ag nai amunu oolag laipu daye, ag danab otiadpig. Ag otiadpig ele amu ag onilag am Stepanus, nug oopa genab doyak nuhig am gagatag, Kayak Oudi nug oopa am bak ele. Aria laa am Pilip amu laa am Prikoras, laa Naikena, laa am Timon, laa Pemenas, amu laa am Nikolas. Nikolas nug am Antiok ted amu nug Juda dilag metid dim lamitom. ⁶ Ag danab amu otiadna heeg, total danab tuelp noolagpa hibaitag, ag epelag qadelagpa mena, ahilagnu unuqidpig.

⁷ Ag Kayak nai mehuqegeg, danab ah kudum ag oolagpa genab doopig. Jerusalem apa danab

kuḁum ag oolagpa genab doona, kristen tamaniak oopa ukaeg, nuhig eb qak okai meeme, mana metak danab kuḁum ele oolag eduom.

STEPANUS ADAPIG

⁸ Amu Kayak Nug Stepanus ehanitak okai ele mete, nug eponak keeke danab hekunu elele iita amu danab ah oolagpa heum ⁹ amge danab laala ag ahan, Stepanusnu nai nau ham bupuak bedupa yaan aegeg, nug ag ele nai aeg ona aeg doum. Danab amu ag am Juda dilag nai doyak laka, ag lag amunu, Danab Begbeg Iita ateb ele amu, amupa ag Kayak nai doodpig. Danab amu ag am Sairini, Aleksandria, Silisia, Asia elenu udiak. ¹⁰ Am Kayak Oudi Nug doyak ena Stepanus meta he, ag nuhig nai edidna, tabapeg nokunu elele iita. ¹¹ Ag anam anidpig amunu ag kobol ham bupuakpa hena, danab laala eedateg, ahan apig. “Ig nug, Moses Kayak ele dabata, awa awa aqatete doomut,” aon apig. ¹² Ag anam ham bupueg, danab ah amu, Juda iki danab amu do mehuqak danab ele ag otaina, Stepanusnu ehed doopig. Ehed doyeg, danab ag Stepanus ele nai aeg ona aeg doum ele amu, ag gona, nug adan, aon Juda dilag hetodiak okai, onig Sanhidren, apa gona, ¹³ ag qag mak amupa heeg, danab laala ag oolagpanu ahan, Stepanusnu nai ham bupuak inam aon apig. “Danab imu nug hanhan lag imunu, do nai elenu nai ehed madite. ¹⁴ Amu nug matiaya, inam aawo ig doomut. ‘Jesus, Nasaret ted, geha nug ab imu heeb nauheb, anuka Moses nug kobol ig mekom amu ele Nug eduku,’ awa aum,” aon apig. ¹⁵ Ag anam ham bupueg, danab hetodiak okai, onig Sanhidren, apa daapig,

ag oh Stepanus neekidna, ag nug idu engel bia anidpig.

7

STEPANUS İKİ DANAB DILAG QAG MAKPA NAI MATIOM

¹ Anam anidna amu mana metak danab dilag iki nug Stepanus amegpa aum. “Nai apig umu am genabte?” awa aum. ² Amu Stepanus nug mehuqa amelagpa aum. “Da lailad mamelad ele ag doyeg! Anuka ig alanig Abraham nug Mesopotemia dayaya, nug Haran ii ukom, haen amupa Kayak, nuhig amahlak enanag ele, nug gumita noa, amegpa aum. ³ ‘Na ahan, wan nahip imu uuna, laipad ele uuadna amu, wan laa da na ipunidkul amupa uke!’ awa aum.

⁴ Kayak aum amu Abraham nug Kaldia wan uua, aha uka, Haran dayom. Apa dayeye, dimpa mameg mauhe amu Kayak Nug he, aha Kanan wan, gemu ag daateb ele imu, igupa udiom. ⁵ Amu Kayak Nug wan imupa laih nakok laa Abraham epegpanab daakunu ii metom amge Kayak Nug dimpa wan amu Abraham amu nug budub ele madakunu nai qaka aum. Amu haen Abraham nug nid iita oiyeye, Kayak Nug nai amu amegpa qaka aum. ⁶ Amu Kayak Nug inam amegpa aum. ‘Na budunad ag geha danab budub laa dilag wanpa daapeg amu budub laapan amu ag geha hepeg, na budunad ag ahilag begbeg mad 400 daapeg, ag ehed hadkulag,’ awa aum. ⁷ Nug anam anana am Kayak Nug tudita ele aum. ‘Geha dimpa da danab ah amu, ag na budunad, ag ahilag begbeg udat hekulagnu adaladkulag amu, da ag kobol

nau amunu nob madakul. Aria da anam hepi, dimpa amu na budunad ag wan amu uun udin, wan imupa amu geha ag da unuqilnana, binal mekulag.' Kayak Nug anam awa aum. ⁸ Amu Kayak Nug Abraham tituana, amegpa nai qaka anam awowa, dimpa Nug tituanak amunu do laa Abraham meta, Abraham amu nug budub ele ag oh gadalag otadakulagnu aum. Kayak aum amunu dimpa Abraham nug beka Isak menua, ded eblaih ewampa gada otadom. Aria Isak nug Jakop menua, gada otade, Jakop nug dimpa bekod tuelp menuata, gadalag otadom.

⁹ Aria ig alankad ag Josepnu oolag aeg be, ag nug aon, danab laa mataeg, men dodo matanna, ag aon, Igipta gopig amge Kayak Nug Josep dab medete ¹⁰ Josep nug ug diigdiigpa dayeye amupa ele Kayakib ehanitom amunu haen nug Igipta dilag king ele nai matieheh, Kayak Nug doyak ena Josep metom amunu king nug Josepnu oo daye, awa me, Igipta dilag gabman anuqak dayaya, king laugpanu keeke oh amu gumama, nug kingib waapa dayom.

¹¹ Anam dayeye, dimpa Igipta wanpa amu Kanan wanpa ele enug haen be, ag ug okai anidna amu ig alankad adi ag e laa aon lakulagnu iita ¹² amge ag aeg, Jakop nug, 'Igipta apa e date,' doyom. Aria nug he, alai adi ag e daden mekulagnu Igipta gopig. ¹³ Amu dimpa ag edun ukaeg, Josep nug awakud amag ele noolagpa nuka miag, 'Da am Josep,' aum. Nug anam he amu haen amupa Paro nug ag am Josep awakud doyom. ¹⁴ Paro anam doye, Josep nug mameg Jakop, Jakop baekudpa ele

oh, danab ah amu eb qak ahilag amu 75, ag nug gumidna gokulag^{nu} aum. ¹⁵ Aria Jakop nug noa, Igipta dayeye amu dimpa nug amu nug be^{ko}d ele ag oh mauhadpig. ¹⁶ Ag mauhat^{eg}, gadalag amu edun a^{ka}n gona, Sikem matmatpa boomadpig. Anu^{ka} Abraham nug silwa men dod^opa wan amu Hamo bu^dub, danab amu ag epelagpa^{nu} awom.

¹⁷ Amu Kayak Nug anu^{ka} nai Abraham amegpa keeke laa he^{ku}nu nai qa^{ka} aum amu haen amu a^{ku} be^{ku}nu miag doodo, Israel ag apategeg, agib Igipta wan am be^{ku}nu heum. ¹⁸ Amge amu ii nak haenpa Igipta dilag king ag benana, Josep nug Igipta wan ena gumom, kaya amu ag doopig. Anam daye u^{ke}, Kayak keeke he^{ku}nu aum, haen amu miag do amu danab laa ba, king dayom. Nug am Josep u^{dat} ena heum, kaya amu ii doyom ¹⁹ amunu nug ig lain^{ka}d ag nuhig u^{dat} hena, nugib ehanid^{ku}lag^{nu} ha, u^{dat}pa ug ma^{to}m. Nug ig alank^{ad} dilagpa kobol nau ehed gagat^{agnab} he, ahilk^{ad} nid naunau bau amu uuad^{peg}, dimit^{im} daana mauh^{ku}lag^{nu} wagai ma aum.

²⁰ Ag ug nau amupa daanna, haen amupa Moses anig nug menuom. Nug Kayak noobpa nid ena daye amu nug anig mameg ele a kalam ewam anam la^{ka} lo^{ku}meh dayom. ²¹ Anam lo^{ku}meh daye, dimpa nug nakok o^{ka}i me, a ub nakok itai, aoya lepa meeh dayeye amu King a^{deg} nug an^{ta} awa, nuhig nid bia gumom. ²² Anam he, Moses nug o^{ka}i ma amu Igipta dilag doyak amu oh doya malowa, nug danab, nuhig nai ma^{ti}ak amu nuhig u^{dat} ele am gagat^{ag}, anam dayom.

²³ Dimpa Moses nug mad^u nuhig 40 dayeye amu

nug laikud Israel anadkunu dab mak awa, aha oiyaya, ²⁴ amu Igipta ted laa aha, Israel laa ehed hedete anta, nug Israel ted amu ehanita, Igipta ted heum amu Moses nug nob ma, Igipta ted amu makude mauhom. ²⁵ Am nuhig dab mak am inam dayom. ‘Da hepi, da lailad ag da anidna ag, “Kayak heeb, Moses nug geha ig ehanikeb, ig baula nau ii daamta,” aon akulag.’ Nug dab mak amu awom amge Israel ag dab mak anam ii aopig. ²⁶ Nug anam he, wagde ded amupa Moses nug edua oiyaya amu Israel danab adit laa a nug qeeheh anata, uuglahnu amelahpa inam aum. ‘A diig laipu amu adinu a anam nug guitak metaya hetep?’ awa aum.

²⁷ Moses nug uuglahnu aum amge danab aha layag makudom ele amu, nug aha, Mosesnu nai otada aum. ‘Aun na ig gumignana, ihinig ug bapaidkutnu meite, na uđin atem?’ ²⁸ Na tumai Igipta ted makude mauhom bia da oidpe mauhkulnu hetemte?’ awa aum. ²⁹ Nug nai amu a amu Moses aaku oola uka, Midian dilag wanpa do danab dayaya, dimpa ah awa, nid danab adit menuatom.

³⁰ Apa dayeye, mad 40 uke, atu tadakpa engel laa qauko Sinai guguitak apa gumita neum. Ab adu amu ad nakok laapa ewewe, engel nug ab ewom amu oopa dayom. ³¹ Moses nug ab ewak amu anta, nug oo ii maite, dab mak kudum awa, nug peheta anidkunu gumita waawo, Nadi Nug aum. ³² ‘Da am na alanad dilag Kayak. Da amu Abrahamnu Kayak, Isaknu Kayak, Jakopnu Kayak,’ awa aum. Awa a, Moses nug otaiya bada, Kayak anidmanu ii neekom.

³³ Anam dayeye, Nadi Nug amegpa aum. ‘Na hipaidna daatem, wan amuam gun ele amunu na baen gada amu ude! ³⁴ Da Igipta danab, ag dahilad danab Igipta daateb ele amu, ahilagpa kobol ehed huanak heegeg anate, danab dahilad dilag qanak ele dootem amunu da ag ehanatena, ahilag ug amu aotkulnu nemi. Amu na ahan edun Igipta uke!’ awa aum.

³⁵ Moses nugib aaku, anuka ag nug guhudidna, ‘Aun nug na ig gumignana, ihinig ug bapaidkutnu meite udime?’ aon apig, danab amuib aaku Kayak awa, gumak danab mewowa he, Israel diikunu ukom. Kayak he, engel nug ad nakokpa, ab ewak oopa ba, Moses anam hekunu aum. ³⁶ Amu Moses nug danab amu ag Igiptanu omalata gokunu haaha, nug kobol danab hekunu elele iita diigdiig heum. Nug omalata ugaka, nug le kokodpa amu atu tadakpa ele, mad 40 batak anamib heum.

³⁷ Amu Moses nugib nai imu Israel amelagpa aum. ‘Kayak Nug geha ag oolagpanu lailag laa heeb, nug propet, da bia, beku,’ awa aum. ³⁸ Moses nugib dimpa Israel ele oh ag atu tadakpa, Sinai qaukopa qag mena amu nug engel amu, ig alankad ele dilag gamag danab dayeye, Engel nug Kayak nai bau dayaknu amu mete, nug awa, ag matom.

³⁹ Amge ig alankad ag Moses nug nai aum amu doyaknu uupig. Ag nug guhudidnana, ag edun Igipta gokulagnu amu oolag guatom. ⁴⁰ Ag anam henana, ag Aron amegpa apig. ‘Na ihinig kayak laala dotolag hena megape, ig omaigkulag. Moses nug Igiptanu aika omaike udimut amu adebtag ukom, ig ii dootem?’ aon apig. ⁴¹ Aria ag anam anana, haen amupa ag makau nag dotog laa hena,

ag dod main kayak ham bupuak amu metanna, ag epelagpa keeke hepig ele amunu ag gamalag ahe, nuhig hobul okai hepig. ⁴² Ag anam heeg, Kayak Nug hego mata, 'Ag ehed hekulagnu oolag dayeb amu uuadput heig!' awa aum amu ag kalam hodopai ele amu unuqidnana, propet dilag naipa, nai daate bia hepig. Nai amuam inam. 'Israel ag anuka atu tadakpa mad 40 daanna, ag bulmakau, sipsip ele aqan mana metak hepig amu dahil mana metak hepigte? Iita! Ag dahil ii hepig. ⁴³ Ag kayak ham bupuak Molok, nuhig sel lag am kayak ham bupuak Repannu hodopai ele aon oipig. Ag keeke amu dotolah hena, binalah mepig. Ag anam hepig amunu geha da ag diien, maadpi gona, laih Babilon editak upa mani guitak daaglag,' awa aum.

⁴⁴ Aria amu ig alankad anuka ag atu tadakpa daapig amu haen amupa ag metid lag dod gadapa hena, oopa amu men tapel do nai yak ele amu meeg dayeye, Kayak nug amahlak okai ele noa amupa dayaya, nai matom. Ag lag hepig, amu hekulagnu dotog amu, Kayak Nug Moses ipunitom, amubia hepig. ⁴⁵ Dimpa Josua nug ig alankad ag diie, Kanan wan imupa udiegeg, Kayak Nug danab wan imupa daapig ele amu lamate, haen amupa dod gada metid lag amu ag maon, udieg dayeye uke, dimpa Dawitnu haen batak. ⁴⁶ Amu Kayak, Nug Dawitnu oo daye, Dawit nug Kayak, Nug am Israel dilag Kayak, Nug laug hekunu unuqitom. ⁴⁷ Amge nug ii heum. Iita, nug beka Solomon nug amu heum.

⁴⁸ Amge Kayak atannab, onig ele, Nug lag danab heteb amupa ii daate. Amu propet laa nug nai

amunu maṭiom am inam. ⁴⁹ ‘Naḍi Nug inam aṭe. Hab amu dahil dayak aben, wan amu bael mekulnu balal nakok. Ag lag aṭem nab laa dahil hepeg daakul? Aben aṭenpa geha da daye hik aokul? ⁵⁰ Keeke amu oh da epelpa hein malami.’ Kayak Nug anam aum.

⁵¹ Aria Israel ag am tape nak danab, ag oolag daulag ele amu iṭa aḍi danab bia amunu ag alalkad hepig amubia ag hanhan Kayak Oudi di medteb. ⁵² Amu propet aun laa dayom, ag alalkad ag nuhigpa kobol ehed laa iite hepig? Laa iṭa. Anuka propet ag Danab Tutuku uḍikunu nai amu mehuqegeg, ag alalkad ag aqaeg mauhpig. Aria Danab Tutuku Nug udie, ag gemu daateb amu ag Nug aon, keked epelagpa mena, heeg mauhom. ⁵³ Kayaknu do nai amu engel nug ag maṭom amge ag amu dim ii lamidteb.” Stepanus anam aum.

AG STEPANUS MENPA MAKUDPIG

⁵⁴ Am Stepanus nug nai amu aum amunu ag oolag ye, guate, oolag nauhe, opodilag huan be, amelag kokod epe, Stepanusnu aelag kikidpig. ⁵⁵ Ag anam hepig amge Kayak Oudi amu Stepanus oopa am be, tutukunab hab aṭan neeka, Kayaknu amahlak enanag kobol kobol ele hab abpa andata, Jesus Nug Kayak epeg nadiappa, amuam anuqak aben, amupa Nug hibaita dayeye antom. ⁵⁶ Anta Stepanus nug aum. “Anteg! Da hab obate, Danab Bekalag Nug Kayak epeg nadiappa, amuam anuqak aben, amupa hibaita dayeye anidtem,” awa aum.

⁵⁷ Nug anam a, ag doona, ag huanaknab enana, daulag itun, ag oh ahan qaibaḍ wana Stepanus adapig. ⁵⁸ Ag aḍan aon, ab okai amu dimitim gona,

ag menpa nug makudpig. Tatam danab ag nug bedupa nai yaapig ele amu ag ahilag ulahnu lamenu amu uđan, nid bau laa gumakunu medapig. Nid amu onig Saul.

⁵⁹ Ag men aon, Stepanus makudegeg, Stepanus nug unuqita aum. “Nađi Jesus, da oudil na epenpa awe!” awa aum. ⁶⁰ Nug unuqita anam awowa, nug gateg qaun wa, nug huana ewa aum. “Nađi na ahilag hipunin imu aib nob meme.” Stepanus nug anam ewowa, nug mauhom.

8

SAUL KRISTEN TAMANIAK DILAG EHED HATOM

¹⁻² Stepanus menpa makudeg mauhe, Saul nug amunu oo ena dayeye amu danab laala Kayaknu oolagpa genab doopig ele ag Stepanusnu oolagpa ug nađi doona, gađa amu aon gona boompig. Ag Stepanus boomeg, haen amupa Juda dilag okai ag ahan dig mena, kristen tamaniak Jerusalem dayom amu heeg, nauha auta awom amunu kristen ag ahan, matatun gona, Juda Samaria ele oopa daapig. Amu kristen ag amu ahan gopig amge total danab tuelp ag am Jerusalem ii uupig, ag daapig. ³ Amu Saul nug aha, kristen tamaniak heeb iita mekunu ug madađa, nug uka lag lag oiyaya, kristen danab amu ah ele diia uka, mani guitakpa inatom.

PILIP NUG SAMARIA UKA JESUSNU NAI MEHUQOM

⁴ Anam heehe, kristen ag oolna, matatun ab laalapa gona daanna, ag Nai Ena amu mehuqpig.

⁵ Amu kristen ag anam heegeg, udat danab laa onig Pilip nug ab okai laa onig Samaria, apa noa, apa nug Kristusnu Nai Ena amu mehuqom. ⁶ Nug Kristusnu Nai Ena mehügege, danab ah kuḁumnab ag nai amu doonna, nug kobol danab hekunu elele iita amu ele hatete anidna, ag Pilip nai mehuqom amu elele aopig. ⁷ Apan danab ah kuḁumnab ag ouḁi nau ele daapig amu, ouḁi nau ag huan enana, ag uadna dona ukæegeg amu danab kuḁumnab bedulag mauhak, amu baelkad nau ele ag edun ena daapig. ⁸ Amunu ab okai amupanu danab ah ag anam anidna, ag oolag gamag huana ahom.

BAD MAK DANAB ONIG SAIMON, NUHIG KAYA

⁹ Ag oolag anam gamag ahehe amu danab laa ab okai amupa dayom, nug onig Saimon. Anuka nug am onig awak, bad mak kobol heehe, Samaria danab ah oh ag nuhignu dab mak kuḁum aoegeg, nug nuka binag ma, “Da am danab okai,” aṭom. ¹⁰ Nug anam aawo, danab ah laala onilag ele, laala onilag iita ele, ag oh Saimonnu nai dooglagnu ii daye daye, wagai mena apig. “Ig gagaṭag laa, gagaṭag amunu amu ig, ‘Gagaṭag okai,’ aot aṭem, gagaṭag amu Kayaknu uḁite ele amu, danab umu nug gagaṭag amu aaku awom,” aon apig. ¹¹ Ag anam anana, nuhig nai amu dim lamidkulagnu am hik aqom. Adinu? Haen elabnab nug nuka nuhig ham bupuak kobol laapa, nug keeke danab hekunu elele iita he anidnana, ag dab mak kuḁum aopig. ¹² Amge Pilip nug Jesus Kristusnu amu Kayaknu do maḁoḁnu Nai Ena mehüge, ag doonna, haen amupa danab ah ele ag oolagpa genab doyeg layaṭom. ¹³ Ag layaṭak aoegeg, Saimon

ele oopa genab doya, layatak awe, Pilip ele daaya, nug kobol danab hekunu elele iita diigdiig okai be anta, nug dab mak kudum awom.

¹⁴ Pilip nug layate, total danab tuelp Jerusalem daapig ele amu, ag Samaria danab ah Kayak nai doopig amu doona, ag heeg, Petrus Johanes ele noya anadpid. ¹⁵ A gumadya noya, ag Kayak Oudi aoglagnu unuqidpid. ¹⁶ Adinu? Kayak Oudi Nug ahilagpa ii neum. Ag Jesus onigpaib layatak aopig. ¹⁷ Amunu a unuqitoya, a epelah qadelagpa meeh, ag aaku Kayak Oudi aopig.

¹⁸ Amu Saimon nug Petrus Johanes ele a epelah danab ah qadelagpa meeheh, ag Kayak Oudi aoegeg anata, Nug men dodo awa doa, ahilah gagatag amu daden mekunu amelahpa inam aum. ¹⁹ “Danab adit, a udat hetep ele, gagatag amu da laa medaped amu, da ele danab laa qadepa epel mepi, nug Kayak Oudi aoku,” awa aum. ²⁰ Saimon nug aum amge Petrus nug amegpa aum. “Na Kayaknu keeke ena ena, nuhig oo metakpa hamu megte amu na men dodopa aokutnu hetem. Men dodo nahip amu na ele oh iita memayanu na dab me! ²¹ Na udat imu, ig hetem ele amu, na amu oopa daakutnu elele iitanab. Kayak anidte, na oot am tutuku iita. ²² Am na kobol nau nahip amunu oot edueb, dab mak nau nahip dab makpa beum amu, Kayak Nug amu uhuqa medakunu, na Kayak unuqite! ²³ Adinu? Da anidtem, na hipuninnu nob nau mua ele aokutnu oitem,” awa aum! ²⁴ Petrus anam awa a, Saimon nug inam aum. “A Kayak unuqidped, Nug da ehanideb, keeke a atep amu dahilpa aib beum,” awa aum. ²⁵ Amu Petrus Johanes ele

a danab ah amelagpa Kayaknu mehuqeh doyeg, aria dimpa a eduya Jerusalem gopid. A ibpa goyaya, Samerianu ab kudumpa a Nai Ena mehuqpid.

PILIP ITIOPIA DANAB AMEGPA NAI MEHUQOM

²⁶ Petrus Johanes ele a anam heyaya ukæeh, aria Kayaknu engel nug Pilip amegpa aum. “Na ahan, laih yau uditæpa gona, ib laa Jerusalemnu Gasa ukakpa daate amu apa te! Ib amuam atu tadakpanu ib,” awa aum. ²⁷ A amu aria Pilip nug aha ukom. Amu ibpa nug Itiopia danab laa antom. Danab amu nug am Itiopia dilag Kuin Kandesu amu nuhig udat gumak danab laa. Nug am danab matoi. Nug Kandesinu keeke ena oh gumtom. Danab amu nug metid hekunu Jerusalem udiom. ²⁸ Amu ded Pilip ukom, ded amupa nug edua ugaka, nuhig karispa dayaya, nug propet Jesaianu yak amu eb qaaqa ukom. ²⁹ Nug amu eb qaaqa ugeke, Kayak Oudi Nug Pilip amegpa aum. “Na karis umu gukuidna uke!” awa aum.

³⁰ Aria Pilip nug paha gumita wana, danab amu nug propet Jesaianu yak amu eb qeeqe doya, od metæ aum. “Na nai eb qetæm ele amu diig nuhignu amu na oot maidtete, o iita?” awa aum. ³¹ Am danab amu nug aum. “Danab laa da dookulnu ii ipunidebeb amu da atæm hein doopi, ool maidku?” awa aum. Awa anana, nug Pilip amegpa aum. “Na bepe, da ele daadu!” awa aum. ³² Amu nug Kayak nai laih laa eb qeum amu iiku. “Ag dod sipsip qepeg mauhkunu aon, qak abenpa gotæb bia aon gopig. Ag dod sipsip nag udig otadeg nug ii gaate, amubia Nug ele ode qamuta, toi etæ dayom. ³³ Ag

Nug onig qeeg ne dayeye, nuhig hetodiak amu, elele ii hepig. Ag Nug qeeg mauhom amunu Nug wanpa budub iita.” Laa nug Kayak naipa anam yom.

³⁴ Aria gumak danab amu Pilip amegpa aum. “Da od metem. Propet nug nai imu danab aun-nunab aum? Nug nuka nuhignute aum o iita danab laanute aum?” Nug anam od metom. ³⁵ Od mete aria Pilip nug danab amu amegpa Kayak nai, nug eb qeum, amupa dig ma, nai laala ele awa, Jesusnu nai ena amu mehuqom. ³⁶ A anam heyaya goya goya, le laa anidya, gumak danab nug aum. “Ante! Le iiku. Adi keeke laa da layatak ii aopanu da qakidte?” awa aum. ³⁷ [Aria Pilip nug aum. “Na ootpa genab doona am na aokut.” Awa a, nug odepa awa aum. “Da Jesus Kristusnu oolpa genab dootem, Nug am Kayak Beka,” awa aum.] ³⁸ Aria Kandesinu gumak danab nug a, karis dayeye, aaku Pilip, gumak danab amu ele, a le amupa noya amu Pilip nug danab amu layatak metom. ³⁹ Nug laaite, a le uuya teeh amu pahanab Kayak Oudi Nug Pilip awa uke, gumak danab nug baula ii antom amge nug oo gamag ahehe, apagpa ukom. ⁴⁰ Anam ukom amge Pilip nug Asdot apa tula ba, ab okai laalapa uka oiyaya, nug Nai Ena mehuqom. Nug anam haaha uka, Sisaria waum.

9

SAUL OO EDUE, KRISTEN BEUM

¹ Amu haen gamag amupa ele Saul nug danab ah Jesusnu oolagpa genab doopig ele amu, ag aqeb mauhkulagnu, nug gagatag anana, wagai ma

haaha, nug mana metak danab dilag iki gumita uka ² amegpa a, nug Juda dilag nai doyak lag Damaskus daateb amunu iki danab dilag pas amu nug Saul metom. Pas amupa nug inam yom. “Saul nug danabte, iita ahte ag Jesusnu oolagpa genab dooteb ele amu, apa anadku, nug hipalata diia, Jerusalem udiku,” ana yom. ³ Aria nug ya, Saul mete, nug ukom. Uka Damaskus guguitete amu laipun pahanab hab atannu amahlak laa na, huan amahalitom. ⁴ Amahalite, Saul nug wanpa na qa, wanpa niieye, nai baag laa na, inam amegpa a doynom. “Saul Saul, na adinu da ehed heidtem?” awa aum. ⁵ Anam awa a, Saul nug aum. “Nadi na amu aun?” awa od metom. Od mete amu Nadi Nug edua aum. “Da am Jesus amu na da ehed heidtem. ⁶ Amge na ahan, ab okai oopa nona daappe, geha na keeke adi hekutnu amu danab laa nug na amenpa aku,” awa aum. ⁷ Nug amegpa amu aawo, danab Saul ele oipig amu, ag nai iita hipaidna daanna, baag aakuib doopig, danab laa ii anidpig. ⁸ Nug nai matia male, aria Saul nug aha gokunu neekom amge nug ameg gatatu mane, ag nug epeg adan, omalna Damaskus abpa nopig. ⁹ Ag aon noeg, nug ded ewam ii neekom, ameg gatatuib dayeye, nug e le ele laa ii laum.

¹⁰ Nug anam dayeye, danab laa nug Jesusnu oopa genab doynom ele amu, nug Damaskus apa dayom, nug onig Ananias. Nug dayeye, Nadi nug onig diia, “Ananias,” awa aum. Awa a aku nug odepa awa aum. “Nadi, da ina daatem,” awa aum. ¹¹⁻¹² A amu Nadi Nug amegpa aum. “Na ahan, ib onig Tutuku, amupa gona, Judas laugpa tena, na Tasmus danab laa anidkut, nug onig Saul.

Nug unuqidte. Amu da hei, nug tuleglegpa, nug edua neegkunu elele daakuknu amu nug danab onig Ananias nug uka, nug ade antom,” awa aum. ¹³ Nadi Nug Ananias amegpa anam aum amu Ananias nug edua inam aum. “Nadi, danab kudum ag danab amunu aeg doomi. Nug kobol ena iita haaha, nahipad danab ah Jerusalem daateb ele amu ehed hatom. ¹⁴ Nug ipa ele anam hekunu mana metak danab okai epelagpanu pas awom. Nug danab ah ab imupanu ag nahipnu oolagpa genab doonna, na unuqidteb ele amu, ahilagnu ele nug anam hekunu udiom,” awa aum. ¹⁵ Amge Nadi Nug amegpa aum. “Na uke! Danab amu nug dahil udat danab, da nug tituanmi. Nug da onil awa uka, iita adi amu king adi am Israel ele amelagpa ab dooglag. ¹⁶ Geha nug da onil ag ipuanatata, amupa nug ug diigdiig maokunu daate amu da nug ipunidkul,” awa aum. ¹⁷ Amunu Ananias nug uka, Saul dayom ele, lag amu oopa noa, epeg qadepa ma, nug amegpa aum. “Lai Saul, Nadi Jesus Nug na ibpa gumita neum ele amu, Nug aaku he, da na gumiten udimi. Adinu? Da hepi, na edun bau neegkutnu, Kayak Oudi na ootpa am beku amunu ele udimi,” awa aum. ¹⁸ Anam awa a, Saul ameg laih laihpa keeke kakai gonelag bia adaya daapid amu, nug ameg dodopanu tolai neya qeeh, ameg ena daye, aha layatak awom. ¹⁹ Nug layatak awowa, dimpa nug e laawo, bedu gagatag qeum. Gagatag qe, Saul nug Damaskus apa ded laala danab Jesusnu oolagpa genab doopig ele amu, nug ag ele oh daapig.

SAUL DAMASKUS JERUSALEM ELE NAI

MEHUQOM

²⁰ Saul ag ele, ag apa daanna nug ameg mak ii heum. Iita, nug uka, Juda dilag nai doyak lag laalapa noa, nug Jesusnu nai mehuqa, amelagpa inam aum. “Jesus Nug Kayak Beqa,” awa aum.

²¹ Nug Jesusnu nai amelagpa mehuqege doonna, danab oh ag nuhignu dab mak kudum aonna, ag apig. “Danab amu nug aakuib danab ah ag Jesusnu oolagpa genab doon unuqidteb ele amu, nug ag aqate. Nug Jerusalem upa amu anam haaha, ipa ele nug ag hipalata diia, mana metak danab okai epelagpa mekunu udiom,” aon apig. ²² Ag anam aegeg amu Saul nug Jesusnu, Kayak Nug Nug tituanom, Kristus daate, amu tutukunab, nai ebehi elepa ipuanate, Juda ag nuhig nai tabapeg nokunu ib laa ii anidpig.

²³ Nug anam heehe, ded kudum uke, Juda ag qag mena, Saul qepeg mauhkunu nai qagapig ²⁴ amge laa nug a, Saul nug nai amu aaku doyom. Juda ag nug qepeg mauhkunu amun tuqan ele meidna, ib adan, abnu ad odpa daapig ²⁵ amge danab ag Saulnu nai dim lamidpig ele, ag tuqan Saul aon, kalegpa inan, abnu ad ode laapa padeg, dimitim noa ukom.

²⁶ Aria Saul nug oiyaya, Jerusalem uka, nug danab Jesusnu oolagpa genab doopig amu, nug ag ele oh daaglagnu heum amge ag oh nug badidpig. Adinu? Ag nug oo edue, Jesusnu oopa genab doyom amu, ag amu oolagpa genab ii doopig. ²⁷ Ag nug badidpig amge Banabas nug Saul omala, total danab tuelp gumata uka, ibpa Saul nug Nadi Jesus ante, amegpa nai aum amu Banabas nug amunu

amelagpa matiaya, nug Saul Damaskus dayaya nug Jesus onigpa nai mehuqkunu wagai meum, nug ii badom amunu ele amelagpa aum. ²⁸ Ag Saul oo eduom amu doyeg, nug ag ele Jerusalem daanna, nug ag oolagpa oiyaya, nug Nadi Jesus onigpa nai mehuqkunu wagai meum, nug ii badom. ²⁹ Nug Juda laa, ag Grik nai dooteb amu ag ele nai matin, aeg ona aeg doum amu ag nug qepeg mauhkunu ib madipig. ³⁰ Anam heeg dimpa nug kristen tamaniakpanu laikud ag amu doona, ag Saul omalna, Sisaria nona, meeg Tasmus ukom.

³¹ Saul nug oo eduom amu laih Juda oopa, Galelia apa amu Samaria ele, aben amu ohpa kristen tamaniak nug ena dayeye, keked laa ii daye amu kristen tamaniak gagatag ba, Nadinu enanag doon, oolag ele otaie, Kayak Oudi oolagpa udat ena heehe, danab ah kudum ag kristen tamaniak oopa nopig.

PETRUS NUG INIAS TABITA ELE EHANATOM

³² Petrus nug danab ag matatun ab ab gona daapig ele amu ag anadkunu oiyaya, ab okai onig Lida noa, apa danab ah Kayaknu oolagpa genab doopig ele amu anate daapig. ³³ Daanna ab amupa Petrus nug danab laa antom, nug onig Inias. Nug bedu oh mauhak ele, nug mad 8 anam abenpa niiakib niiom. ³⁴ Petrus nug anta amegpa aum. "Inias, Jesus Kristus Nug na bedun ehanidte amunu na ahan nahip niiak aben babaitel!" awa aum. Awa a aria Inias nug paha ahom. ³⁵ Nug ahe, Lidanu danab ah oh amu Saron danab ah ele ag amu anidna, ag oolag edue, Jesusnu oolagpa genab doopig.

³⁶ Aria ab laa onig Jopa, apa amu ah laa Jesusnu oopa genab doyaya dayom, nug onig Tabita, Grik naipa amu ag Dokas ateb. Nug hanhan kobol ena haaha, nug danab ah keeke iita ele amu ehanatata, keeke madatom. ³⁷ Amu Petrus nug Lida dayeye, haen amupa ah amu nug ode awa mauhe, danab ah ag mauhom gada amu le laaidna, lag oo atan laa amupa meeg dayom. ³⁸ Lida Jopa ele ou qak daapid amunu danab Jesusnu oolagpa genab doopig ele ag, “Petrus Lida daate,” amu doopig amunu ag danab adit, a Petrus amegpa, “Na paha ihinigpa udie! Na apa aib daame!” akulahnu heeg gopid.

³⁹ Aria Petrus nug ahe, danab amu ele oh gopig. Nug uka te, ag nug omaleg lag oo atan amupa te amu ah qab apanu ag oh ucin, Petrus talilidna daanna, gaanna, ag lamen diigdiig Dokas ha matom amu ipunidpig. ⁴⁰ Ag anam heeg amu Petrus nug he, danab ah oh dimitim ukaeg amu nug dup noa, gateg qaun wa unuqitowa, edua ah gada amu neekita, nug aum. “Tabita na ahe!” awa aum. Awa a, aaku ah ameg opate neeka, nug Petrus neekitata, aha hedep na dayeye, ⁴¹ Petrus epeg ada, hume hibaitom. Nug edua ahe, Petrus nug danab ah, Kayaknu oolagpa genab doopig, ah qab ele, ag onilagpa e udieg, Tabita awa matom. ⁴² Petrus nug amu he, nai amu Jopa ab okaipa uke, danab ah oh doopig. Doona amu kudum ag Nadinu oolagpa genab doopig. ⁴³ Ag anam heeg, Petrus nug ded kudum Jopa dayom. Nug danab laa, makau gada bedamanu babaitaknu dootom amu, nug ele daapid, nug onig Saimon.

10

ENGEL LAA BA, KONILIAS AMEGPA NAI AUM

¹ Aria iita adi danab laa Sisaria dayom, onig Konilias. Nug daup 100, onig Itali daup, amu dilag iki. ² Danab amu nug baekudpa ele ag oh Kayaknu enanag doonna, oolag ele otaiom. Amu nug men dodo kudum, Juda danab men dodo iita ele amu, nug ag ehanata madata, haen oh nug Kayak unuqidtom. ³ Nug anam heehe amu ded laa aam ameg ewampa nug tuleglegpa Kayaknu engel miag atiak nug laug oopa no antom. Engel nug noa, onig diia, “Konilias” aum. ⁴ A, Konilias nug engel neekitata, huanak badada nug aum. “Danab nadi, amu aditai,” awa aum. A aria engel nug amegpa aum. “Kayak Nug nahip unuqitak amu dadek ehanitak kobol nahip ele anta, nahipnu dab mete. ⁵ Amunu na gemu danab laala hepe, Jopa gona, ag danab laa, nug onig Simon, onig laa Petrus, amu anidna apeg udiad! ⁶ Simon Petrus nug Saimon, nug am makau gada bedamanu babaitak danab, nug laugpa daate. Lag amu yu ihipa daate. Ag nug apa anidkulag,” awa aum. ⁷ Engel nug Konilias amegpa anam awowa ugeke, aria Konilias nug nuhikuḍ udat hak danab adit laa amu daup laipu ele onilagpa e dopig. Daup amu nug Kayaknu oopa genab doya, nug Konilias ehanitom. ⁸ Aria Konilias nug nai amu oh tutuku diig ihuhua, danab ewam amu amelagpa awowa he, ag gopig.

PETRUS TULEGLEGPA KEEKE ANTOM

⁹ Amu danab ewam ag ukaegeg, uu do, ibpa niiona, ahan ukaegeg, aam ameg tutuku aokunu

heehe Jopa guguitegeg, Petrus nug lag aṭan un-
 uqidkunu teum. ¹⁰ Petrus nug enug qak doya,
 e lakunu dab meum. Dab meeme, lag amupa
 daapig ag e lanaknu babaitegeg amu Petrus nug
 tuleglegpa ¹¹ hab obate, keeke laa ne antom.
 Keeke amu lamen okai laa bia, mudi wadele daug
 wadelepa qakak dayeye, padaeg wanpa neum.
¹² Keeke amu oopa amu dod diigdiig oh daapig,
 mat idu idu amu ai idu idu ele. ¹³ Nug amu anta
 dayeye am baag laa Petrus amegpa inam aum.
 “Petrus na ahan, dod imu aqan la!” awa aum.
¹⁴ Nug anam aum amge Petrus nug aum. “Naḍi, da
 Juda dilag dōpa keeke nau dubuṭid ele daate amu
 da ii laṭem amunu da uumi, ii lapa. Da anuka ele da
 laa lain ii anidmi!” awa aum. ¹⁵ Petrus nug anam
 awa a, baag amu eḍua Petrus amegpa inam aum.
 “Kayak keeke heum amu nau laa iita, enaib daate
 amunu na keeke amunu, ‘Am nau, ena iita,’ aib
 ame,” awa aum. ¹⁶ Lamem okai amu nug ne, haen
 ewam bate, Petrus nug anta doynom amuib ante
 amu aria paha keeke amu eḍua, hab aṭan teum.

¹⁷ Am Petrus nug Kayak keeke amu ipunite
 antowa, nug oo ii maite, keeke amu diigdiig dab
 mak kudum awom. Nug anam dab mak awewe,
 aria danab Konilias he udipig amu ag uḍin bena,
 ag Saimon laugnu od meeg, ipuanateg dona, lag
 odpa hipaidna daapig. ¹⁸ Ag lag odpa daanna,
 enan inam od mepig. “Danab Simon, nug onig
 laa Petrus amu, nug ipate daate o iita?” aon apig.
¹⁹ Aon od meegeg, amu Petrus nug keeke antom,
 amunu dab meeme, Kayak Oudi amegpa aum.
 “Doye! Danab ewam ag na maṭidṭeb ²⁰ amunu na

ahan nope, ag ele uk_eg! Ootpa ug aib doome. Da hei, ag udipig,” awa aum. ²¹ Nug anam Petrus amegpa a, Petrus noa, danab amu ana_ta nug aum. “Ag date ma_ti_dteb? Da iiku. Ag adinu udipig?” awa aum. Nug anam awa od ma_te, ²² ag nug amegpa apig. “Konilias, nug daup 100 dilag iki daate, nug he ig u_dimut! Nug am danab ena. Nug am danab Kayaknu enanag doyaya, oo ele o_taite. Juda oh ag nuhignu amu, ‘Nug am danab ena,’ aon a_teb. Amu Kayaknu engel laa na, Konilias amegpa nahipnu, na Konilias laugpa gona, na nai laala ape nug dookunu aum amunu nug he, ig u_dimut,” aon apig. ²³ Ag Petrus amegpa nai amu ana malaeg, nug omalate, lag oopa noeg, tuqan amupa nug dab madete, wagde nug ele oh uk_aegeg amu Jopan danab, Jesusnu oolagpa genab doopig ele, ag oolagpan laala ele ahaeg, oh gopig.

PETRUS KONILIAS LAUGPA UKOM

²⁴ Aria ag gona, tuqan laipu ibpa niiona, ahan gona Sisaria tepig. Konilias nug amelag ma day-eye, nug baekudpa amu nug laikudnab ele, nug ag onilagpa e u_dieg, ag ele qag mena daapig. ²⁵ Ag qag men daaegeg, gona tena, Petrus nug Konilias laug oopa no, Konilias nug doa, Petrus baegpa dup noa binag meum. ²⁶ Nug anam heum amge Petrus nug Konilias hume ahehe, amegpa aum. “Na ahe! Da ele am danabib,” awa aum. ²⁷ Am Petrus nug Konilias ele nai ma_ti_iya, lag oopa noya, danab ah kudum qag mena daaegeg ana_tom. ²⁸ Petrus nug kudum daaegeg ana_ta, nug amelagpa aum. “Ig Juda amu ihinig do gagatag laa am Juda danab laa nug iita adi laa ele oh ou qak laipu ii daamya, o

Juda laa amu nug iita adi laa ele gumita ii wama amge Kayak Nug da ipunidom, da danab laanu inam laa ii apa. 'Da am Juda danab amunu Kayak amegpa da iita adi amu da nug edidtem!' Da anam awe ii apa. ²⁹ Amunu ag da gumate udikulnu onilpa epig amu da ahilag ewak amu tapai ii neum. Iita! Ag da udikulnu apig am da iiku udimi. Aria ag da onilpa epig amunu diig nakok apeg dookulnu ool daate," awa aum. ³⁰ Awa a aria Konilias aha, nug keeke nuhigpa be antom amunu matia aum. "Keeke anidmi amu gemu ded wadele iiku ukom am inam. Da laulpa dayeye, da aam ameg ewampa haen gemu inam iiku bia aaku da unuqititi, danab laa, nuhig lamen amu amahlaknab ele, nug da noolpa hibaita ³¹ nug aum. 'Konilias, Kayak Nug nahip unuqitak doya amu na dadek danab ehanadtem amu ele antom. ³² Amunu na hepe, danab laala Jopa gona, danab Simon, nug onig laa Petrus, apeg udiad! Danab amu nug Saimon, makau gada bedamanu babaitak danab, nug laug amu yu ihipa daate ele amu, nug danab amu ele daatep,' awa aum. ³³ Nug anam a amu da paha hei, danab laala na omaidkulagnu ukaeg, am na ena hena udime. Aria ig oh Kayak noobpa inam daatta amu Nadi nuhig nai oh Nug na ape doognignu a doome ele amu, na ape doognignu daatem." Konilias nug Petrus amegpa anam aum.

³⁴ Konilias nug nai matia male amu Petrus nug inam awa aum. "Amu genabnab gemu da dootem, Kayak Nug danab budubnu dab maama, laa oo medata, laa geditata ii hete. ³⁵ Iita, Kayak Nug danab budub ohpanu laa ag nuhignu enanag doonna, oolag ele otaita, ag kobol ena heteb

ele amu, Kayak Nug ahilagnu amu oo mauhte. ³⁶ Kayak Nug Jesus, Nug am wan ohpan dilag okai daate amu, Nug epegpa Israel danab ag madodnu Nai Ena madata, Nug nai geha iiku ami ele amu, Nug nai amu ele ag matom. ³⁷ Ag Juda wanpa keeke laa tumaiib beum amu ag dooteb. Layatak Johanes nug layataknu nai mehuqe ³⁸ dimpa Kayak he, nuhig Oudi Jesus, Nasaret ted, Nug oopa am be gagatag okai ele metom amunu Nug Galelia apa dig ma, ab ab oiyaya, danab ah ehanatom. Kayak Nug ele daaiya, danab oh Satan he, ena ii daapig ele amu, Nug bapalate, ag edun ena daapig,” awa aum. ³⁹ Petrus nug anam anana, nug nai amu tudita aum. “Amu Jesus Nug Juda wanpa amu Jerusalem abpa ele, Nug adi heum amu ig total danab ig anidmut. Jerusalem apa amu ag Nug ad emaitakpa atuleg mauhom ⁴⁰ amge ded ewampa Kayak he, Nug edua hibaite, ⁴¹ danab kudum laa ag Nug anidpig. Danab oh ii anidpig. Iita! Ig laala, ig Nug anidkunignu, Kayak Nug ig tituanikom ele amu, Nug ig gumika udie anidmut. Nug hibaite, dimpa ig Nug ele e, le ele lamut. ⁴² Amu Nug ig nai mehuqkunignu amu ig danab ah amelagpa Nug dimpa mauhak adi, bau dayak adi ele epediadku, nai amu mehuqkunignu do mekom. ⁴³ Nuhignuib propet ag inam yaapig. ‘Aun adi ag Jesusnu oolagpa genab dooteb ele amu Kayak Nug, Nug onigpa, hipunin ahilag uhuqa madaku.’” Petrus nug anam aum.

⁴⁴ Petrus nug nai mehuqege, Kayak Oudi Nug danab oh, ag Kayak nai doopig ele, ahilagpa neum. ⁴⁵⁻⁴⁶ Am Juda danab, ag Jesusnu oolagpa genab doopig, ag Petrus dim lamidna udipig ele amu, ag

Konilias adi ag Kayak Oudi ne awona, ag nailag diigdiigpa nai maṭinna, ag Kayak binag meegeg anadna, ag Kayak Oudi Juda danab maṭom bianab, Nug iita adi ag ele maṭom anidna, ag dab mak kudum aopig. ⁴⁷ Ag dab mak kudum aoegeg, Petrus nug aum. “Amu laa nug danab imu ag layatak aoglagnu gun mekunu elelete? Ag Kayak Oudi ig aomut amubiaib aopig,” awa aum. ⁴⁸ Nug anam awowa, danab haen amupa Kayak Oudi aopig amu dilag aum. “Ag Jesus Kristus onigpa layatak aweg!” awa aum. Nug anam a, ag aona amu ag nug amegpa apig. “Na ig ele ded laala ele daagnig,” aon apig.

11

PETRUS KEEKE BEUMNU MAṬIOM

¹ Aria total danab laa amu ag lailkad Juda daapig ele ag oh iita adi ag ele Kayak nai aaku aopig amu ag doopig. ² Doyeg, Petrus nug edua Jerusalem uke amu laa ag gada otadaknu wagai meteb ele, danab amu ag Petrusnu oolag aeg beum. ³ Ag anam henana, ag Petrus aidna apig. “Na gona, danab gadalag ii otadak amu laulagpa tena, ag ele daanna, e laapig,” aon apig.

⁴ Ag anam apig amge Petrus nug keeke oh be, nug heum ele amunu mehuqa, amelagpa inam aum. ⁵ “Da Jopa ab okai amupa unuqitete dayeye, da tuleglegpa keeke laa anidmi. Hab atannu keeke laa lamem okai bia muḍi wadele daug wadelepa qakak dayeye, padaeg gumida ne anidmi. ⁶ Keeke amu ne, da antena, da keeke adi amu tutuku ante dookulnu, lamem amu oopa neeke amu wanpan

dod, dod dakud idu idu, mat diigdiig, ai diigdiig ele anam anadmi. ⁷ Anam anititi amu baag laa nug amelpa aum. 'Petrus na ahan, dod imu aqana la!' awa aum. ⁸ Nug anam aum amge da ami. 'Nadi, da Juda dilag dopa keeke nau dubutid ele daate amu da ii latem amunu da uumi, ii lapa. Da anuka ele da nakoknab laa lain ii anidmi,' awe ami. ⁹ Ami amge baag hab atanu nug edua amelpa aum. 'Kayak Nug keeke oh oolagpanu amu nau laa ii heum amunu na keeke enanu, "Nau," aon aib ame,' awa aum. ¹⁰ Lamem okai amu nug ne, haen ewam bate da anten doomi, anamib aniti amu keeke amu oh edua hab atan teum. ¹¹ Da keeke amu anam aniti, edua teete amu danab ewam ag ucin lag da daami ele amupa dopig. Danab laa Sisaria daate amu, nug he, da omaidkulagnum udipig. ¹² Ag udieg amu Kayak Oudi Nug da amelpa aum. 'Na ahape ag ele ukeg! Dab mak kudum aib aome!' awa aum. Aaku da ukaiyi, lailad danab eblaih laipu ele imu, ag Jopa danab, ag da ele oh gota, ig danab amu laugpa temut. ¹³ Laka teut, danab amu nug engel, nug laug oopa noa hibaita dayaya, nai amegpa aum amu nug amunu ig amenigpa matiom. Konilias nug engel inam aumnu ig amenigpa aum. 'Na danab hepe, Jopa gona, ag Simon, nug onig laa Petrus, nug apeg udia, ¹⁴ nug geha na amenpa nai laala mehuqeb doope, Kayak Nug na edua awidku. Nug na amu na baenadpa ag ele oh diiku.' ¹⁵ Nug anam matie aria da ahen, nai dig mein matiyi, Kayak Oudi ahilagpa neum, Nug tatam dig makpa ihinigpa ne, ig aomut amubia aaku. ¹⁶ Am da amu antena amu Jesus nai aum amu,

nai amu aaku daulpa doum. Nai amuam inam. 'Layatak Johannes nug lepa danab ah layatom amge geha ag amu Kayak Oudipa layatak aoglag,' awa aum. ¹⁷ Amu anuka tatam ig Nadi Jesus Kristusnu oonigpa genab doomut, Kayak Nug Nuhig Oudi ig mekom, anamib gemu ag ele Kayak Nug ag matom. Kayak hete amunu da nuhig ib oo ii nepa." Petrus anam awa aum. ¹⁸ Petrus nug anam awa a, ag nai amu doona, ag nai ahilag madipig amu uuna, ag Kayak binag mena apig. "Kayak heehe, iita adi danab ele ag oolag edute, bau dayak aoteb," aon apig.

KRISTEN TAMANIAK ANTIOK ABPANU

¹⁹ Amu ag Stepanus qeeg mauhe, amu dimpa ag tamaniak hepeg nauhkunu hepig, diig amunu danab ag oolagpa genab doopig ele amu, ag oolna matatun gopig amu ag Pinisia, Saipras amu Antiok ele batak gona daapig. Daanna, ag danab oh amelagpa Nai Ena amu ag ii mehuqpig. Iita, ag Juda danabib amelagpa Nai Ena amu mehuqpig. ²⁰ Aria ag anam hepig amge ag oolagpanu danab laipu laipu, ag am Saipras amu Sairini danab ele, ag gona, Grik danab Antiok daapig ele amu ag amelagpa Nadi Jesusnu Nai Ena mehuqpig. ²¹ Ag anam heegeg, Nadinu gagatag ag ehanate, danab ah kudum ag oolag edue, oolagpa genab doon, ag Nadi oolag medapig.

²² Ag Nadinu oolagpa genab doyeg, kristen tamaniak Jerusalemnu ag nai amu doona heeg, Banabas Antiok ukom. ²³ Nug Antiok uka, danab ah ag Kayaknu ehanitak okai hamu megte ele amu, ehanitak amu ag aweg, ag oolagpa udat heehe,

ag Kayak dim lamidpig anta amu nug oo gamag ahe, dab mak aoglagnu, ag hanhan ag oolag Nadiib metan oiglagnu ib ipuanatom. ²⁴ Banabas nug danab ena, Kayak Oudi nug oopa am bak daye, nuhig oopa genab doyak am ele gagatag amunu nug danab ah ehanatete, danab ah ameg nadi ag Nadinu oolagpa genab doopig.

²⁵ Aria Banabas nug Saul anidkunu Tasus uka ²⁶ anta, nug omale Antiok ukaeh, mad laipu kristen tamaniak apanu ele daanna, a danab ah ameg nadi Kayak nai ipuanadpid. Antiok apa danab ag tatam dig mena, danab ag Jesusnu oolagpa genab doopig ele amu ahilagnu, Kristen apig.

²⁷ Aria haen amupa propet laala ag Jerusalemnu ahan Antiok nopig. ²⁸ Ag noeg, Kayak Oudi Nug propet laa onig Agabas amu ipunite aha, geha enug haen nadi Rom wan ohpa beku amunu nai matiom. Amu dimpa Klodias nug king dayeye, haen amupa enug haen amu beum.

²⁹ Amu be, kristen ag nai laipu anana, ag men dodo ag lailkad Juda ehanadkulagnu mepeg gokunu dab mepig. Kristen oh ag bedulagpa men dodo gane daate amu doona, ag laih udat amunu otipig.

³⁰ Ag men dodo amu qag mena, Banabas Saul ele mataeg, a men dodo amu aoi goya, tamaniak iki danab epelagpa mepid.

12

ENGEL PETRUS MANI GUITAKPANU UHUQOM

¹ Haen amupa King Herodes Agripa nug kristen tamaniaknu toliak laala ug mada kunu adalatom.

² Adalata amu nug Jakobus qep elabpa dug o

mauhom. Jakobus Johanes ele a am eamag. ³ Nug kobol am he, Juda danab ag Jesusnu oolagpa genab ii doopig ele amu, ag oolag ena daye an̄ta, nug Petrus ele adom. Kobol amu Pasowa metid hobul haenpa beum. ⁴ Nug ada amu nug Petrus mani guitak oopa meum. Nug amu mani guitak gumak danab ameg wadele, ameg ohpa danab wadele wadele anam daapig, ag guman daaglagnu epelagpa meum. Herodes Agripa nug Pasowa metid hobul uueb, Juda noolagpa Petrus epedia, heeb mauhkunu dab meum.

⁵ Amu Petrus nug mani guitak oopa dayeye, kristen tamaniakpanu danab ah ag nuhignu oolagpa genab gagatag ele Kayak unuqidpig. ⁶ Unuqitegeg, ded Herodes Agripa Petrus danab noolagpa mekunu ii wagkadom, tuqan amupa gumak danab adit laih laih daaeheh, Petrus nug gamagpa niiom. Ag sen aditpa nug hipalpig. Nug anam niieye, gumak danab adit laa a odpa daaiya, od gumapid. ⁷ Ag anam daaegeg, laipun Nadinu engel laa apa hibaita dayeye, amahlak lag amu oopa amahlom. Amahlele, engel nug Petrus qeti laih qeqala, mad eta aum. “Pahanab ahe!” awa aum. Awa a amu laipun sen Petrus epegpanu amu uhugya nepid. ⁸ Neeh, engel aum. “Imuanpa matagid takan, baen gada ele maate!” awa aum. Petrus nug anam he amu engel aum. “Ulahnu lamen amu aon mena, dope godu!” awa aum. ⁹ Awa a amu Petrus anam heum amge nug oo ii maitom. Nug, “Da tuleglegtai niitem,” awa aum. ¹⁰ Goyaya, gumak danab anuqakpanu amu a aben amu edidya waya, laa amu ele edidya wapid. A danab amu oh edadyaya, udi udi, batakpa od aen

elepa, ag matulna ab okaipa noteb ele, amupa wapid. Waeh od gagaṭag amu nug nukā matule, a dimitim goya, ibpa noyaya, laipun engel nug Petrus uuita ukom.

¹¹ Aaku Petrus nug adi kobol beum amu doya aum. “Herodes Agripa nug da adaillele, Juda danab ag da ehed heidkulagnu dab mepig amge gemu da genab dootem, Kayak Nug he, engel nuhig uḍia, da ag epelagpanu awidom.” awa aum. ¹² Nug anam anana, kobol beum amunu dab maama, Jon Mak anig Maria, nug laugpa ukom. Apa danab kudum ag qag mena, unuqidnana daapig. ¹³ Daaegeg, Petrus nug dimitim od qeqale, uḍat ah Roda, nug od matulkunu doa, ¹⁴ Petrus baag doya, oo gamag ahe, od ii matulom. Iita. Nug edua lag oopa qai eṭa uka, amegpa aum. “Petrus dimitim hibaitom daate!” awa aum. Awa a amu ag qag mena daapig ele ag apig. ¹⁵ “Na kaaka!” aon apig. Amge nug, “Iita! da ham ii bubutem,” anana, wagai meum amunu ag apig. “Amu nuhig engel,” aon apig. ¹⁶ Anam maṭiegeg, Petrus nug od qeqalala dayeye, daaeg wana uke, ag od matulna, nug anidna oṭaipig. ¹⁷ Oṭaieg, nug epegpaib to eṭaglagnu awowa, Nadi aṭem he nug mani guitak oopanu dimitim doum amunu amelagpa matiom. Nug amunu maṭia mala nug, “Ag Jakobus amu ig lainkad laala ele imunu apeg doyeg!” awa aum. Anam awowa, nug laih ukom.

¹⁸ Aria wakade gumak danab ag ootot okai aqe, aka aka nai huan madipig. Ag apig. “Petrus nug aṭem heum?” ¹⁹ Amu Herodes Agripa nug Petrus ii daate amu doya, ag matiglagnu a madipig amge nug ii anidpig amunu nug he, gumak danab ag

naipa daapig. Daaegeg, nuhig dab makpa ag elele iita anta amu ag aqapeg mauhkulagnum. Imu dimpa Herodes Agripa nug Judanu aha, Sisaria uka apa nakok dayom.

HERODES AGRIPA MAUHOM

²⁰ Aria Herodes Agripa nug Taia Saidon ele dilah danab ah dilagnum oo aeg beum. Anam dayeye, wan amun danab ag e Judanu hanhan daden mepig amunu ag enug aqamanu, danab ah amu ag qag mena gumidna uḍin, ag Herodes ele nai bapaidkulagnum hena, ag nuhig niiak lag oo gumak iki danab Blastas amegpa Herodes Agripa nug oo aeg bak amu uukunu gaaeg, nug ehanadkunu aum.

²¹ Ag anam heeg aria Herodes Agripa nug doya, amu hekunu ded laa mewowa, nug ded amupa king bala ma, kingnu balalpa dayaya, ag amelagpa nai maḥiom. ²² Nug nai maḥie, danab ah ag amu doona inam aon epig. “Nai maḥiom umu am kayak laa baag. Danab baag iita,” aon apig. ²³ Ag anam aegeg, Herodes Agripa nug nuka binag ma, Kayak binag ii meum amunu Naḍinu engel paha makude, bedu gauat qe, aaku mauhom.

²⁴ Amge Naḍinu nai amu gagatag aha, ab kudum laa ohpa tuala ukom. ²⁵ Naḍinu nai amu anam aha ugeke, Banabas Saul ele a Jerusalem daaiya, udat ahilah maloya, edui Antiok gokulahnu heya, a Jon Mak aoeh, nug ele oh gopig.

13

BANABAS SAUL ELE MISIN UDATNU MAATEG GOPID

¹ Aria Antiok kristen tamaniakpa propet amu ipunitak danab laala ele apa daapig. Ag onilag am Banabas, Simion, nug onig laa Naisa, Lusias, nug am Sairini ted, Maneyen, nug Herodes Antipas ele budub laipu, amu Saul aaku. ² Ag am Nadi binag mena, e oh lanaknu kud mena daaegeg, Kayak Oudi Nug ag amelagpa aum. “Da Banabas Saul ele a udat laa hekulahnu otiate onilahpa emi amunu ag diiatpeg, udat amu hekulah,” awa aum. ³ Aria ag e oh lanaknu kud mena daanna, ag unuqidnana, epelag qadelahpa mena heeg, a ahai gopid.

BANABAS SAUL ELE SAIPRAS GOPID

⁴ Kayak Oudi Nug he, a ahai goya, Selusia noya, Selusia apa a ub laa anidya teya, Saipras nudpa gopid. ⁵ Saipras goya, a Salamis teya, apa Juda dilag nai doyak lag laalapa teya, a Kayak nai mehuqeheh, Jon Mak nug ele oh daanna, nug ehanatom.

⁶ A nud Saipras apa oii oii, nud amupa aben laih goya, Pepos teya, Pepos apa a Juda danab laa anidpid. Nug am bad nau mak danab, propet ham bupuak ele, Nug onig Ba-Jesus. ⁷ Nug gabman okai Sesias Polasnu ehanitak danab laa. Aria Sesias Polas nug nuhig dab mak ena ele amunu nug Banabas, Saul ele a udiglahnu onilahpa eum. Nug Kayaknu nai dookunu oo dayom. ⁸ A nai mehuqeh amu bad nau mak danab Ba-Jesus, Grik naipa nug onig am Elimas, nug awa awa aqata, a nai madipid ele, amu tapeb nokunu heum. Nug gabman okai amu nuhig dab mak heeb edueb, Kayaknu oopa genab ii doomanu heum. ⁹ Heum amu Saul, nug onig laa Paulus, nug Kayak Oudipa gagatag okai

ele amunu nug Elimas gagatag neekitata, amegpa aum. ¹⁰ “Na Satan beka. Na kobol ena oh dilag keked. Ham buprak kobol oh amu kobol naunab oh ele na bedunpa am baknab. Na Nadinu ib tutuku oh he nauhte amu na kobol amu iite uumna? ¹¹ Aria da api doye! Gemu Nadi epeg amu na oiteb, amen gadueb, na ib ii anidna, amunnu amahlak ii anidnana, nakok haen elab anam daakut,” awa aum. Paulus nug anam aawo, pahanab keeke bud bia Elimas ameg haute, ameg gatatu mane, ib ii anta dayaya, oiyaknu elele iita amunu danab laa ehanita, ib ipunidkunu aum. ¹² Am gabman okai nug keeke amu anta, nug oopa genab doyom. Amu Nadinu nai ipunidpid ele amunu nug dab mak kudum awom.

BANABAS PAULUS ELE ANTIOK, PISIDIA WANPANU, GOPID

¹³ Am Paulus nug danab nug ele oh oipig ele ag Pepos apanu ub aon gona, Pampilianu ab laa Pega apa gopig. Teeg amu Jon Mak nug uuata, edua Jerusalem ukom. ¹⁴ Uke amu a Peganu ahaya goya, ab onig Antiok, Pisidia wanpa dayom ele, amupa teya, Juda dilag Metidpa a Juda dilag nai doyak lag oopa noya daapid. ¹⁵ Juda dilag nai doyak lag amunu iki danab ag do nai yak amu propet dilag yak ele eb qewona, dimpa ag Paulus Banabas ele dilah nai meeg uke od matan apig. “O lainti, nai laa danab ah gagatag aqaglahnu dayeb amu aria mehuqped dooglag,” aon apig.

¹⁶ Aon aeg aria Paulus nug aha, epeg huma, nug aum. “Ag Israel danab amu danab laa ag Kayaknu enanag doon, oolag ele otaita amu, ag doyeg! ¹⁷ Ig Israel budub ele daatem amu ihinig Kayak, Nug ig

alankad tituanata he, ag apateg, dimpa Nug nuhig gagatagpa Igiptanu edua diia udiom. ¹⁸ Nug edua diia udieye amu atu tadakpa nug ahilag hak nau amu mad 40 Nug mawom. ¹⁹⁻²⁰ Nug diia udia, Kanan wanpa amu danab budub eblaih aditnu Nug aqa lamatowa, wan ahilag awa, Israel mate, ag wan amu mad 450 anam daegeg, ahilkad gumak danab, ag am epediak danab, ag benan gumaegeg, uke uke, propet Samuel haenpa bata. ²¹ Samuel dayeye, nuhig haenpa ag king aoglagnu aeg amu Kayak nug Kis beka Saul awa me, ahilag king mad 40 dayom. Nug am Benyamin budubpan danab. ²² Saul nug dayom amge Kayak Nug nug geditowa, Dawit awa, Israel dilag king daakunu tituanowa amu nug Dawitnu inam aum. ‘Da Jesi beka Dawit anidmi, da nuhignu ool mauhte, nug am geha dahil nai oh dim lamidku,’ awa aum. ²³ Amu Kayak Nug anuka nai matia qaka, Nug heeb, Dawit budubpan danab laa nug udia, ig edua awikak danab daakunu aum. Edua awikak danab amuam Jesus aakuib. Kayak he udiom. ²⁴ Amu Jesus ii nak haenpa Layatak Johannes nug Israel, ag oolag edueb layatak aoglagnu nai mehuqom. ²⁵ Layatak Johannes nug a, udat malakunu miag dayeye, nug Juda danab amelagpa aum. ‘Ag dahilnu, “Nug am Kristus,” dab metebte? Anam iita. Da am Nug iita. Amge laa Nug da dimulpa udite amu, danab amu nuhig gagatag amu dahil edidte. Nug am danab okainab, da am okai iita. Dahil hak imu nuhig hak amu ele elele iita,’ awa aum.

²⁶ O lailad, ag laala Abraham budubpan danab, amu ag laala iita adi danab ag Kayaknu enanag

doon, oolag ele otaite amu, ag doyeg! Kayak Nug Johannes odepa danab ehanadkunu aum am ihinig ohnu aum. ²⁷ Aria danab Jerusalem daateb amu ahilkad iki danab ele, ag am ehanitak danab amu anidna ii doopig, ag propet dilag yak, haen oh Metidpa eb qeteb ele amu, ag amu diig tutuku ii anidna, ag Nug hetodiakpa mena, qeeg mauhom amunu propet ag anuka nuhignu apig amubia hena, ag nai amu elele medapig. ²⁸ Ag nuhig ehed hakpa Nug qepeg mauhkunu laa ii anidpig amge ag Pilatus nug hamu qeeb mauhkunu epig. ²⁹ Ag keeke oh propet ag nuhigpa hekulagnu yaapig amu ag hena malaeg, ag ad emaitakpanu aona, mod laapa boompig. ³⁰ Ag anam hepig amge Kayak he, Nug edua hibaitom. ³¹ Nug edua hibaitowa amu Nug ded laala danab ag Galelianu ahaeg, nug ele Jerusalem gopig ele amu, Nug ahilagpa tula be anidpig. Danab amu ag am gemu Juda oolagpa nai amu mehuqteb,” awa aum.

³² Aria Paulus nug anam aum amu nug nai baula ele tudita aum. “Ig nai ena mehuqtem am inam. Kayak Nug anuka ehanikak danabnu ig alankad amelagpa nai qaka aum ³³ amu Nug he, Jesus edua hibaitom amupa nai amu aaku meu oum. Amuam nai Sam tupa daate bia. Nai amuam inam. ‘Na am dahil nid, da gemu na danab bedu aon daakutnu awiten meidtem.’ ³⁴ Aria Kayak Nug he, Jesus Nug edua hibaitom, Nug baula ii mauhma amuam Kayak Nug anuka anam hekunu Jesaia amegpa inam a, Israel dilagpa yom. ‘Da Dawit amegpa keeke laa hekulnu ami, nai amuam dahilnu, bekununab daate, amu da hein madakul.’

³⁵ Nai amunu mehuqak diig am Sam laapa inam daate. ‘Na geha nahip danab, opia awak ele amu, Nug uupe ii bedama,’ awa yom.

³⁶ Amunu ig dootem nai amuam Dawitnu iita. Adinu? Dawit nug danab ah nug ele daapig, ag oolagpa Kayak ode dim lamitata oiyaya, dimpa nug mauhe, alakud boomadpigpa boomeg, bedu wan meum. ³⁷ Amge danab imu, Kayak Nug me u dia, danab bedu awa beum amu, Nug bedu ii bedom. ³⁸ Amunu, o lailad, ag doyeg! Ig Jesusnu udat okai, amupa ig hipuninnu uhuqa metaknu nai ag amelagpa mehuqtem. ³⁹ Do Moses epegpa udiom amu ag ahilag hipuninnu uhuqa metak amupa aoglagnu elele iita. Amge danab imu, Jesus, aun adi ag nuhignu oolagpa genab dooteb, ag nuhigpa hipuninnu uhuqa metak aona, opia awak danab daaglag. ⁴⁰ Ib laa iita amunu ag kobol laa, propet ag amunu anuka apig ele, ag amu hemananu dab meig! Propet ag inam apig. ⁴¹ ‘O ag awa awa qetak danab, ag anteg! Da ahilag haenpa udat laa hekul. Da hepi, danab laa nug ag amelagpa udat amunu mehuqeb amu ag oolagpa genab ii doomna amunu ag amelagpa anidnana, dab mak kudum aonna, mauhkulag.’ ” Paulus nug anam aum.

⁴² Aria Paulus Banabas ele a dimitim ukaeheh amu danab ah ag ii daye daye inam apig. “Dimpa, metid laapa, a eduya nai amu baula mehuqped dootu!” aon apig. ⁴³ Ag anam anana qatina, Juda kudum amu iita adi danab ele, ag Juda dilag metid amu dim lamidpig ele, ag ahan, Paulus Banabas ele dim lamatpig. Amu a danab amu ag Kayaknu ehanitak okai hamu megate ele amu ag amunu

oolagpa genab doon oiglagnu apid.

⁴⁴ Anam aoya aeh, Juda dilag Metid laapa amu ab amupan danab ah oh bia ag Kayak nai dooglagnu u_din qag mepig. ⁴⁵ Amge Juda okai ag danab ah oh qag meeg anadna, ag oolag aeg be, ahan, Paulus nai ma_tiom amu, laa ag amu doomnanu, nai amu tabapeg nokunu henana, nai idu idu ma_tin, dapidna, aon aon qedapig. ⁴⁶ Ag anam hepig amu Paulus Banabas ele a amunu ii badapid. Iita! A nai gagatag ele ma_tiya amelagpa apid. “Imu genab, i Kayak nai tatam ag amelagpa apud dooglagnunab ib dayom amge ag nai imu dooglagnu uun, miag atiak heeg be_te amunu ag imu doyeg! Gemu i ag uuadda, iita adi gumadda gokunih. ⁴⁷ Adinu? Nadi Nug i anam hekunihnu do inam metom. ‘Da na iita adi, ag gatatupa daateb, ag ib anidkulagnu amahlak madakutnu otidmi. Na iita adi ehanadpe, ag oolag edueb Kayak danab ah wan atu ohpanu amu edua diiadku.’ Nadi anam awa aum.” ⁴⁸ Am iita adi ag nai amu doona, ag oolag gamag ahehe, ag Kayaknu nai amu humidnana amu danab ah laala, ag Kayaknu bau hanhan dayak aoglagnu daapig ele amu, ag oolagpa genab doopig.

⁴⁹ Aria Nadinu nai amu laih apa amu aben ohpa tuala uke doopig. ⁵⁰ Apanu ag Nadinu nai doopig amge Juda okai ag ahan, ab amupan iki danab amu ah laala onilag ele, ag Juda dilag metid ele dim lamidpig amu, ag oolag yaaeg, ag ahan, Paulus Banabas ele amu a ab amupa daaeheh, ehed hatna gedatpig. ⁵¹ Ag anam heeg amu a baelahpanu wan gapud amu apan danab laala ag kobol ehed hepig

amunu eponak keeke daakunu, a ab amu uuya gokulahnu heyaya, a gapud amu qeqaleh neene, a ahai, Aikoniam gopid. ⁵² Amu kristen ag oolagpa gamag ahak ena doyegeg, Kayak Oudi Nug ag oolagpa am qak dayom.

14

BANABAS PAULUS ELE AIKONIAM APA UDAT HEPID

¹ Paulus Banabas ele a Antiok uuya, ahai Aikoniam goya, udat hanhan hepid amu, apa ele anam hepid. A Juda dilag nai doyak lag oopa noya, nai mehuqpid. A nai diig ena elele mehuqehh, danab ah ameg nadi, Juda Grik ele, ag oolagpa genab doopig. ² Amge Juda laala, ag oolagpa genab doyaknu uupig ele amu, ag ahan, iita adi amu ag oolag yaaeg, ag kristen dilag oolagpa aeg beum. ³ Amunu Paulus Banabas ele a haen elab Aikoniam apa a Nadinu nai mehuqehh, Nadi Nug gagatag mate, a eponak keeke, danab hekunu elele iita kudum diigdiig ele hepid. Anam heehh, amupa Nadi Nug nuhig nai, amuam genab, danab ah ipuanatom. ⁴ Ipuanatom amge danab ah ab amupan ag opatna, ameg adit daan, ameg laa ag Juda dilag nai amu doon, ag ele oolag laipu daapig amge laa ag Paulus Banabas ele nai mehuqpid amunu oolagpa genab doon, ag a ele oolag laipu daapig. ⁵ Anam daaegeg, dimpa iita adi laala amu Juda laala amu ahilkad iki danab ele ahan, Paulus Banabas ele ehed hatna, men aon makudatpeg mauhkulahnu dab mepig ⁶ amge a amu dooya, a ahai oolya Likionia ab adit, Listra Debi ele, amu ab adit amu dilah wan taliliatak ele amu, a apa

goya oiya,⁷ aria apa a Nai Ena danab ah amelagpa mehuqpid.

BANABAS PAULUS ELE LISTRA APA UDAT HEPID

⁸ Am Listra apa danab laa dayeye anidpid. Nug baekud nau amunu ii oiyom, dayakib dayom. Nug anig oopan baekud amu anam ele doa, laa ii oiyom. ⁹ Nug Paulus nai maṭieye doyeeye, Paulus nug tutuku danab amu neekita, nug nuhig oopa genab doyakpa edua ena daakunu elele antom ¹⁰ amunu Paulus nug baag okaipa amegpa inam aum. “Na ahan hibaitē!” awa aum. Awa a amu danab amu laipun qa oṭaiya, aha hibaita oiyom.

¹¹ Paulus nug anam heum amu apan danab anidpig ele, ag Likionia nailagpa inam apig. “Kayak adit aaku danab bia wanpa neya uḍiya, ihinigpa bepid,” aon apig. ¹² Ag anam anana, Banabasnu amu ahilag kayak ham bupuak onig Sus amu adatona, Paulus, nug am nai maṭiom amunu nuhignu amu ag ahilag kayak ham bupuak onig Hemis atadpig. ¹³ Amu ahilag kayak ham bupuak Susnu mana metak lag amu ab daugpa heeg dayom. Amu lag amunu mana metak danab nug bulmakau dawai diiata amu bala mudipa giatak ele diiata, ab amunu ad odpa uḍie, nug danab ah ele ag dod main, Paulus Banabas ele mataglagnu hepig.

¹⁴ Amge total danab adit, Banabas Paulus ele, a ag anam hekulagnu heegeg, a nai amu dooya, ahilah lamen patidya, qaibad danab ah oolagpa goya, eya apid. ¹⁵ “Danab, ag adinu anam heteb? I ele am danab, ag biaib. I Nai Ena amu ag amelagpa

mehuqteḡ amu ag doon, ag keeke nau hamu meu iita amu uuadna, ag Kayak bau daate amu Nug dim lamidk_ulag_{nu} amelagpa aṡep. Nug am hab, wan, yu ele, amu keeke oh amupa daateḡ ele, amu oh Nug haṡom. ¹⁶ Haen anuka, Kayak Nug danab ah budub ohnu ag ib diigdiig go_kulag_{nu} aib ii aum ¹⁷ amge Nug daate, Nug amunu haen amupa ele ag ipuanataṡa, Nug hab aṡan dayaya he, gu ahilagpa neum, ahilag e ena beum, ag e elele aopig amu ag gamalag ele ahom,” aoya apid. ¹⁸ Paulus Banabas ele a nai amu amelagpa madipid amunu danab ah amu ag main ii matapig amge Paulus Banabas ele wagainab ii melop am main matalob.

BANABAS PAULUS ELE EDUIA, ANTIOK, SIRIA WANPANU, GOPID

¹⁹ Aria a Listra daaeheh, Juda laala Antioknu Aikoniamnu ele udiadp_ig. Ag danab ah amu eedadna, Paulus qepeg mauhk_unu oolagpa noeg, ag menpa Paulus ma_kudeg, mauhak bia niieye, ag eedna, ab giginpa gona mepig. Ag, “Nug mauhom,” anana, anam hepig. ²⁰ Ag anam hepig amge laala Jesusnu oolagpa genab doopig ele, ag u_din, Paulus niieye, talilidna daaegeg, nug e_dua aha, ab amupa noum. Aria ded amu uue wagde, nug Banabas ele a edui Debi gopid. ²¹ Paulus Banabas ele a ab amupa Nai Ena amu mehuqya, ipuanadya heeh, danab ah kudum ag oolagpa genab doyegeg, dimpa a e_dui Listra, Aikoniam, Antiok ele gopid. Antiok amuam Pisidia wanpa dayom. ²² A goya, kristen gagatag aqai, ahilag oopa genab doyak na qemanu, ag gagatag daanna oiglag_{nu} ayaya, inam ele apid. “Tatam ig ug kudum aot oit, ig Kayaknu

do madod oopa nota, bau hanhan dayak aognig,” aoya apid. ²³ Anam heyaya amu a kristen tamaniak amu ohpa iki danab laala otiadya maadpid. A e oh lanaknu kud meya daaiya, unuqidyaya, a kristen tamaniak amu oh diiya, Nadi, ag nuhignu oolagpa genab doopig ele amu, Nug epegpa maadpid. ²⁴ Amu dimpa a goya, Pisidia gamag tikui goya goya, Pampilia tepid. ²⁵ A teya amu Pega abpa Nai Ena mehuqoya, dimpa amu a noya, Atelia gopid.

²⁶ A Atelia noya amu ub laa anidya teeh, ub amu a diiata Antiok ukom. Ab amupa anuka kristen tamaniak danab ag a Kayak epegpa maateg, nuhig oo metak amu ahilagpa dayeyeb, a nuhig udat hekulahnu apig. A udat amu heyaya, gemu a edui apa udipid. ²⁷ A udiya Antiok beya, a kristen tamaniak qag maataya, a amelagpa Kayak ahilahpa adi heum amunu oh matiya, a inam ele apid. “Kayak Nug he, iita adi ag ele oolagpa genab doopig,” aoya apid. ²⁸ A kristen tamaniak amelagpa goya udat hepid amunu awoya, a ded kudum ag ele apa daapig.

15

KRISTEN TAMANIAKNU QAG MAK OKAI JERUSALEM BEUM

¹ Haen Paulus Banabas ele a Antiok apa kristen tamaniak ele daegeg amu danab laala ag Juda wanpanu udina, kristen amelagpa apig. “Laa nug Jesusnu oopa genab doote amu nug gada ele otadad! Laa ag Mosesnu do amu ii dim lamidna, gadalag ii otadkulag amu aria geha Kayak Nug ag edua ii diiadma,” aon ipuanadna apig. ² Ag

anam aon aeg, Paulus Banabas ele nai amu dooya, amunu ena ii dooya ahaeh, Juda ele huanak aeg ona aeg doum amunu kristen ag Paulus Banabas amu danab laala ele ag ahan, Jerusalem gopeg, total danab amu iki danab ele ag nai amu bapaidkulagnu otiadpig. ³ Amu kristen tamaniak ag heeg, ag ahan Pinisia Samaria ele gamalah tikun gonana, ag apan kristen amelagpa, Kayak Nug he, iita adi ag oolag eduom amunu amelagpa apig. Ag anam heegeg, kristen amu ag oolag gamag huana ahom. ⁴ Ag anam henana gona, Jerusalem teeg, kristen tamaniak danab ah amu total danab am iki danab ele ag ena humateg, Paulus Banabas ele a keeke oh Kayak he hepid ele, amunu amelagpa madipid. ⁵ A amu matieheh amu do gumak danab-Parasia dilag huupan, ag Jesusnu oolagpa genab doopig ele amu, ag ahan apig. “Kayak anuka gada otadaknu do meum niite amunu iita adi danab ag kristen daaglagnu oolag dayeb amu ag ele gadalkad otadkulagnab. Ele amu ig aput, ag Mosesnu do oh ele dim lamidkulag,” aon apig.

⁶ Aeg amunu total danab amu kristen tamaniak iki danab ele ag nai amu bapaidkulagnu qag mepig. ⁷ Qag mena ag amunu nai kudum matin hena, Petrus nug aha amelagpa aum. “O lailad, ag imu dooteb. Anuka Kayak Nug udat ig mekowa, Nug da iita adi amelagpa Nai Ena amu api, ag doon oolagpa genab dooglagnu, otidom. ⁸ Amu Kayak, Nug danab ah oh oolag diig doote ele amu, Nug iita adi, ahilagnu oo ena dayom amu ig ipunikaka, Nug nuhig Oudi ig mekom bia ag matom. ⁹ Nug ihinigpa kobol laa haaha, ahilagpa kobol laa ii

heum. Iiṭa, ag nuhignu oolagpa genab doyeg, ahilag oopa genab doyak amupa he, ag oolag opia awak dayom. ¹⁰ Ig anam anidtem amge ag iṭa adi ag Juda dilag do oh dim lamidkulagnu aṭeb, amupa ag keeke ug ele aon, kristen qadelagpa mena heṭeb. Anuka ig alankad amu ig ele ug amu mawaknu amu elele iṭa. Ag adinu anam hepeg, Kayak Nug amunu opodi bekunu heṭeb. ¹¹ Doyeg! Ig Kayak, Nug ehanitak okai, Jesus Kristus Nug hamu megte ele, amupa Nug ig edua awikom amubiaib Nug iṭa adi ag ele amupa edua diite, oonigpa genab dootem,” awa aum.

¹² Am Petrus nug nai amu anam maṭie, ag qag mak amupa daapig ele, ag nai laa ii madipig. Ag nai ii maṭieg amu Paulus Banabas ele a nai maṭieheh, amuib dab metaegeg, a Kayak Nug a epelahpa eponak keeke, danab hekunu elele iṭa kudum, diigdiig ele, iṭa adi oolagpa heum amunu madipid. ¹³ Paulus Banabas ele a nai amu maṭiya malaeh amu Jakobus nug aum. “O lailad, da nai imu api ag doyeg! ¹⁴ Simon nug ag amelagpa a, ag aaku doopig. Dig makpa Kayak Nug iṭa adi dilagpa neum, nug nuhikud danab ah ag oolagpan amu diiatom. ¹⁵ Amuam propet ag Kayak ode aon yaapig amubia. Kayak naipa, nai amunu daate am inam. ¹⁶⁻¹⁷ ‘Nadi Nug aum. Da geha danab budub laa oh ag Nadi maṭin anidkulagnu, iṭa adi oh, da ag dahilad tituanadmi amu, ag Nadi maṭin anidkulagnu, geha dimpa da edue udien, Dawit laug imu na qeeb, da geha edue hume qabakul. Lag imunu keeke oh nauheb, geha da bau edue hein qabakul. ¹⁸ Anuka Kayak Nug nai amu maṭia aum

amu gemu ele Nug anamib ate.’

¹⁹ Anam amu dahil dab mak amu inam, iita adi ag oolag edueb, Kayak doopeg amu ig ag ug ii matamta. ²⁰ Iita. Ig imuib udugpa yaat aput dooglag. ‘Ag dod laa main kayak ham bupuak medapig ele amu, ag ii lamana. Ag gapai kobol ii hemana. Amu danab ag dod mudipa o epelagpa baag adaeg mauhom amu ag tepu amu ii lamana. Aria ag dod tiig amu ele ii lamana.’ Ig amuib aput dooglag. ²¹ Adinu? Ig dootem, anukan udie gemu ele, ab okai ohpa danab ag Mosesnu do nai mehuqna, ag ele Juda dilag nai doyak lag ohpa nai amu eb qeteb,” awa aum.

AD UDUG IITA ADI DILAGPA UKOM

²² Jakobus nug nai amu a amu totoo danab amu iki danab amu kristen tamaniak oh ele ag nai amu bapaidna, ag danab adit otiatpeg, a Paulus Banabas ele oh Antiok gokulag nu dab mepig. Ag anam dab mewona, ag Judas, onig laa Ba-Sabas amu Silas ele, danab adit amu a tamaniak oopa anuqak daapid ele amu, a otiatona, ²³ ag udug yak ele aoya gokulahnu epelahpa mepig. Udugpa yaapig am inam. “O lainkad, ag Antiok, Siria amu Silisia ele daateb, ag am iita adi danab amu ig kristen tamaniaknu totoo danab amu kristen tamaniaknu iki danab ele, ig ag lailkad daatem amu ig pas imu ag eb qena dooglag nu iiku yaatem. O lainkad ig ag humadtem. ²⁴ Amu ig aaku anidmut. Ihinigpan danab laala ag gona, ag nai mehuqegeg, ag apanu ag nai amu doon otaipeg. Amu ihinigpanu ag gona, nai matinna, ag ahilag dab mak kabolipig ele amu, ag gona, apa anam hekulag nu amu ig

laa ii amut. ²⁵ Ag gona anam heeg, nai amu udie ig doota, ig nai matit, oonig laipu meta, ig lainti adit gokulahnu otiaatmut. Amu ig lainti adit laa ele ig ahilahnu oonigpa huanak daate ele, amuam Banabas Paulus ele, a ele aaku gokulagnu amut. ²⁶ A amu ihinig Nadi Jesus Kristus onignu a ug maoya mauhkulahnu amu a ii badatep. ²⁷ Ig Judas Silas ele aaku heut, a odelahpa nai ig yaamut ele amu, a madiped amu ag dooglag. ²⁸ Kayak Oudi Nug ig ele daata, ig nai imu matit inam amut. 'Ig do laa aot, ag qadelagpa ii memata. Ig ag imu iikuib dim lamidkulagnu maidmut. ²⁹ Amu ag dod, laa ag main kayak ham bupuak medapig ele amu, ag dod amu ii lamana. Ag dod tiig ele ii lamana. Amu danab ag dod mudipa o epelagpa baag adaeg mauhom amu, ag tepu amu ii lamana. Aria ag gapai kobol ele ii hemana.' Ag keeke amu oh tutuku dab metan, ii hemana am ena. Aakuib. Ag ena daaglagnu oonig daate." Ag anam yaapig.

³⁰ Aria kristen tamaniak ag otiadna, maateg gona, Antiok nona amu ag kristen tamaniak qag maatan, ag udug yak amu madapig. ³¹ Amu kristen tamaniak ag udug yak amu eb qena, ag gagatag aqak nai amunu ena doon, gamalag ahom. ³² Amu Judas Silas ele, a am propet amunu a nai meu ele kristen ipuanadya, gagatag aqapid. ³³ A anam heyaya, nakok haen elab Antiok daaeheh amu kristen ag ahilahnu oolag ena dayeye, a eduya Jerusalem tamaniakpa gokulahnu heeh, "Enad uked," apig ³⁴ [amge Silas nug Antiok daakunu dab meum.] ³⁵ Aria Paulus Banabas ele a Antiok daaiya, Kayak nai danab ah ipuanateheh, danab

kudum laala ele oh udat amu henana, ag Jesusnu Nai Ena amu mehuqna ipuanadpig.

PAULUS BANABAS ELE A OPATPID

³⁶ Dimpa ded laala uke amu Paulus nug Banabas amegpa aum. “I ahad edud goda, ab ohpa anuka i Nadinu Nai Ena amelagpa aud doopig ele amu i laintad amu anadkuni. Amu ag nai amu adan ena daatebtai o iitatai amu anadkuni,” awa aum. ³⁷ Paulus nug anam awa a amu Banabas nug Jon Mak ele aweb oh gokulagnum aum. ³⁸ Nug aum amge Paulus nug aum. “Jon Mak nug anuka Pampilia i uuite, nug ele oh udatpa ii gomut amunu i nug aopud ii gomata,” awa aum. ³⁹ Paulus anam awa a amu a amunu nai okai matiya hepid amunu a udatpa laipu baula ii oidpid. Iita. Banabas nug Jon Mak awe gokulahnu a, ub laapa teya, Saipras gopid. ⁴⁰ Ukaeh, Paulus nug Silas tituana awe amu kristen ag apig. “Nadinu ehanitak okai hamu megte amu a ele uked!” aon apig. ⁴¹ Paulus nug Silas otiowa, nug uka, Siria Silisia ele gamagpa oiyaya, kristen tamaniak gagatag aqom.

16

TIMOTIUS NUG AMU PAULUS SILAS ELE OH GOPIG

¹ Nug anam haaha uka, Debi ta amu uka, Listra teum. Ab amupa kristen danab laipu laa dayom, nug onig Timotius. Nug Juda ah laa beka, mameg amu Grik danab. ² Listranu kristen am Aikoni-amnu kristen ele ag hak nuhig amu anidna, “Timotius nug danab ena,” aon apig. ³ Amu Paulus nug Timotius anta, oh gokulahnu oo dayom amge Juda

ag apa daapig ele amu ag doopig, Timotius mameg nug am Grik danab amu Grik danab ag gada otadak ii heteb, amunu Juda ag oolag nauhmanu Paulus nug aha, Timotius gada otadom. ⁴ Paulus nug anam he amu ag gona, ab abpa oina, totol danab, kristen tamaniak iki danab ele ag tatam Jerusalem qag mena nai apig amu ag kristen amelagpa ag do wadele amu dim lamidkulagnu apig. ⁵ Kristen tamaniak ag nai doyegeg, Jesusnu oopa genab doyak ahilag am okai meeme, ded oh kristen dilag eb qak amu tuditeg okai meum.

PAULUS NUG TULEGLEGPA MAKEDONIA DANAB ANTOM

⁶ Aria Paulus Silas amu Timotius ele ag oiyegeg, Kayak Oudi Nug ag Nai Ena amu Asia apa mehuqmananu ib oo neum amu Paulus adit laa ele amu ag ahan wan obatak adit onilah Prisia Galata ele amu gamagpa gonana amu ⁷ ag gona, Misia tompa apanu ag ahan Bitinia gokulagnu heeg amu Jesus Oudi Nug apa ele gomananu ib oo neum. ⁸ Nug anam he amu ag Misia edidna nona, Troas gopig. ⁹ Aria Troas apa tena, tuqanpa Kayak he, Paulus nug tuleglegpa Makedonia danab laa hibaita dayaya, Paulus onigpa ewa, “Na ahan, yu matadna uđin, ig ehanike!” awa onigpa eewo antom. ¹⁰ Paulus nug keeke amu anam ante aria wagde, ig ahat paha Makedonia gokunignu ib matimut. Ig amut. “Ig doomut, Kayak Nug ig oninigpa eum, ig gota Nai Ena amu ag amelagpa mehuqput dooglagnu aum,” aot amut.

LIDIA OO EDUE, KRISTEN BEUM

¹¹ Ig anam atata amu Troas apanu ub laa aot teut, ub amu tutuku awika, Samatres uke, wagde ded laa apanu ahat, Niapolis gomut. ¹² Amu Niapolis apa ub nug ig meike, ig ahat baenigpa gota, Pilipai temut. Ab amuam Rom dilag ab okai laa, Makedonia wanpa anuqak dayom. Ig ded laala ab okai amupa daamut.

¹³ Apa daatta amu Juda dilag Metidpa ig, “Unuqitak aben le ihipa daatetai” atata, ig abnu ad odpa dimitim gota amu ig le ihipa gomut. Ig le amupa gota amu ah laala ag qag mena daeegeg anadta, ig daatta, ag amelagpa nai matimut. ¹⁴ Amu ah laa onig Lidia, nug amu Kayak Jehowa doya unuqidtom ele amu, nug nai amu doyom. Nug am ab okai Tiatiranu ah amu nug lamen ed haaha, amupa men dodo aotom. Nadi he, nug oo edue, Paulus Nai Ena mehugege doya, dookunu nug daug humom. ¹⁵ Nug nai doya, oo edue, layatak awe, nug baekudpa ele ag aopig. Lidia layatak awowa, nug ig amenigpa aum. “Ag da Nadinu oolpa genab dootem elele anidteb dayeb amu, aria ag uđin, da laulpa dayeg!” awa aum. Nug anam anana, wagai ma he, ig nug ode dim lamidta, gota nug laugpa daamut.

PAULUS SILAS ELE MANI GUIŦAKPA DAAPID

¹⁶ Ded laa ig unuqitak abenpa ukaut, begbeg ah laa, nug oopa oudi nau ele, nug ibpa uđanig teum. Oudi nau amu nug he, ah amu nug buti adi keeke adi bekunu amu miag atiom. Amunu ah amunu gumak danab ag men dodo kudumnab aodpig. ¹⁷ Nug Paulus ig ele dim lamikaka amu nug inam ewa aum. “Danab imu amu, ag am

Kayak atannabnu udat danab! Kayak Nug atem ha, ig edua diikunu ib babaitom ipunigteb,” awa aum. ¹⁸ Nug kobol amu ded kudum he uke uke, Paulus nug oopa guitak doya, nug edua oudi nau amegpa aum. “Jesus Kristus onigpa na nug uuidkutnu atem!” awa aum. Anam a amu oudi nau geha aaku ah amu uuita ukom.

¹⁹ Aaku ah amunu gumak danab ag ahilag men dodo awaknu diig amu iita meum anidna, ag Paulus Silas ele adualatna, diiatna, qag mak abenpa gopig. ²⁰ Ag Rom dilag hetodiak danab noolagpa diiatna wana apig. “Danab adit imu, a am Juda danab amu, a kobol nau ig apanigpa hetep. ²¹ Heyaya, a kobol nau, ig Rom danab amunu gun dootem, ig amu aognignu elele iita amu, ig amu dim lamidkunignu atep,” aon apig.

²² Ag anam aegeg, ab amunu danab kudum laala ele anam aegeg, epediak danab ag Paulus Silas ele bedulahpanu lamen patidna, ehed matadatkulagnu apig. ²³ Aria ehed matadateg, mani guitakpa maatna, gumak danab nug gumata auta aokunu amegpa apig. ²⁴ Aria mani guitak gumak danab nug nai gagatag amu doyowa, nug maate, mani guitak opanab, ad nakok laapa noeh, adpa baelah qakom.

²⁵ Qake anam daaiya, tuqan tugmag Paulus Silas ele Kayak unuqidyaya ahi edapid. Anam heekeh, mani guitak danab laa ag doyatpig. ²⁶ Ag anam daaegeg amu mim okai laa laipun na he, mani guitak lag amu oh udalele, od paha matulate, mudi gagatag hipaladpig ele amu oh uhuqatom. ²⁷ Anam heehe, gumak danab nug aha, mani guitak lag od

matulak anatowa, nug mani guitak danab oh oolna gopig anana, nug qep okai awa, nug nugaka dug wa mauhkunu heum ²⁸ amge Paulus nug huana ewa aum. “Na naka aib duut ome! Ig oh am iiku daatem,” awa aum. ²⁹ A amu mani guitak gumak danab nug doya, amahlaknu ewa, lag oopa noa, nug otaiia badada, nug Paulus Silas ele baelahpa na qeum. ³⁰ Na qa, edua aha, nug diiata dimitim wana, od matom. “O danab adit, da atem hepi Kayak Nug da edua awidku?” awa aum. ³¹ Anam a amu a apid. “Na Nadi Jesusnu ootpa genab doope, Kayak Nug na edua awidku, na amu na baenadpa ele oh edua diiadku,” aoya apid. ³² Anam awoya a Kayak nai, nug amu nug baekudpa ele, ag oh amelagpa madipid. ³³ Amunu tuqan geha aaku nug a diiata, ihilah babaite amu nug baekudpa ele oh ag layatak aopig. ³⁴ Aona amu nug diiata, laugpa uka, e matom. Nug, nug baekudpa ele oh ag oo gamag ahak aopig. Adinu? Ag Kayaknu oolagpa genab doopig.

³⁵ Daaehewagde butua amu epediak danab ag heeg, daup danab laala uqin mani guitak lag gumak danab amegpa apig. “Na danab adit amu uuatpe uked!” aon apig. ³⁶ Amu gumak danab nug doya, Paulus amegpa aum. “Epediak danab ag nai meeg uqiom am da a uhuqatpi, a dimitim doya gokulahnu apig amunu a oolah ena dayebewagked!” awa aum.

³⁷ Ag apig amu nug Paulus amegpa a doya, nug aum. “I amu Rom danab, amge ag i hetodiakpa meitna, i ehed hemudtai o iitatai amu ag ii doopig. Iita, ag i danab ah noolagpa hamu adaitna,

makuditnana, mani guitakpa hamu meitpig. Ag anam hewona amu adinu ag gemu lokumakpa henana, i dimitim gokunihnu heteb? Ag anam ii hemana. Iitanab! Ag aka uđin, i omaitpeg dimitim gokunih,” awa aum. ³⁸ Paulus anam awa a aria daup ag nai amu aon edun gona, epediak danab amelagpa aeg, epediak danab ag Paulus Silas ele a am Rom danab doona, ag badapig. Ag inam dab mepig. “Ig Romnu do tipalmut amunu Paulus Silas ele aped, Rom okai ag ig ehed laa heigkulagtai,” aon apig. ³⁹ Ag anam doona, ag gona, oo mak nai amelahpa anana, omalateg dimitim doeh amu ag a ab amupa ii daamya, a ahai laih gokulahnu od matapig. ⁴⁰ Ag anam aeg amu a mani guitak lakanu doya, a Lidia laugpa goya, a kristen anadya, gagatag aqaknu nai laala amelagpa ayaya amu gopid.

17

PAULUS SILAS TESALONIKA APA UDAT HEPID

¹ Paulus Silas ele a Pilipainu ahai goya, Ampolis teya, apanu amu goya, Apolonia teya, apa ele ii daapid, a ab amu edidya goya, Tesalonika tepid. Ab amupa amu Juda dilag nai doyak lag laa dayom. ² Amunu Paulus nug hetom amubia ha, nug Juda dilag nai doyak lag oopa noa, Juda dilag Metid ewam amu oh nug anam heehe, nug ag ele Kayaknu yak amunu madipig. ³ Nug Kayak nai amu diig mehuqaga amelagpa aum. “Kristus Nug nuhig udat ha malakunu amu Nug guitak naupa mauha, edua hipaidkunu dayom,” awa aum. Nug nai mehuqe doyegeg, nug aum. “Jesus, da

nuhignu ag amelagpa a^{tem} ele amu, Nug amu Kristus,” awa aum. ⁴ Paulus nug Jesus Kristusnu nai mehuqe doona, Juda danab ah laala ag Jesusnu oolagpa genab doon, Paulus Silas ele dim lamatpig. Grik danab kudum, ag Kayak doonna binag medapig ele amu, ag ele Jesusnu oolagpa genab doopig. Amu danab okai waalkad kudum ele ag ele anam hepig.

⁵ Ag anam hepig amge Juda okai ag amunu oolag nauhom amunu ag ahan, dad^{ek} danab nau, danab amu ag keeke he nauhak danab, ag qag mak abenpa hamu daapig ele amu, ag danab amunu kudumnab diin, qag maadna heeg, ag ahan heeg, ab amupan danab ag ahan mu^{tub} qenan heegeg, danab nau ag Jeson laug amu oo me^{tan}, Paulus Silas ele adalatna diiatna dimitim gona, danab ah mataglagnu hepig. ⁶ Ag anam hepig amge apa ii anatna, ag Jeson amu kristen laala ele eedateg neeg, diin ab amupanu iki danab gumadna gona, ag inam aon epig. “Danab nau amu kobol nau wan ohpa heeg bete ele amu gemu ag u^{din}, ipa heteb. ⁷ Ag u^{dieg}, Jeson nug diiata, laugpa ukom. Ele amu danab amu oh ag Kaisanu do amu tapaeg ne henana, ag inam a^{teb}. ‘King laa daate, nug onig Jesus,’ aon a^{teb}.” Ag anam epig. ⁸ Ab amupan danab oh, iki danab ele ag nai amu doona, ag otaina ehed doonna ⁹ amu iki danab ag heeg, Jeson nug laala ele ag dimpa genab hetodiakpa edun bekulagnu amu ag daden meeg, heeg gopig.

PAULUS SILAS ELE BERIA GOYA NAI MEHUQPID

¹⁰ Anam heeg, kristen ag tuqan amupaib Paulus Silas ele maateg, ab amu uuya Beria gopid. A Beria teya amu Juda dilag nai doyak lag oopa nopid. ¹¹ Am Juda danab Beria daapig ele amu, ag dab mak ena ele, ag Juda danab Tesalonika daapig amu edadna, ag oolag gamag ahak ena ele nai aon dab makpa mepig. Ag Paulus nug nai atom amu genabte o iita genab iitate amu dooglagnu ded ohpa Kayak nai eb qepig. ¹² Amu Paulus nai mehugqege, Juda danab ah ab amupan kudum laala ag Jesusnu oolagpa genab doopig. Am Grik danab ah binalag ele kudum ele ag Jesusnu oolagpa genab doopig.

¹³ Genab doyegeg, dimpa Juda Tesalonikanu ag Paulus nug Beria apa nai mehugte amu doonna amu ag ahan, Beria gona, ahilag hak nau amu aon, danab ah apanu amu oolagpa noeg amu doon otaina, ahan heegeg, ¹⁴ amu kristen ag paha ahan, Paulus aon meeg noa, yu ihipa gokunu ugeke, Silas Timotius ele a amu Beria daapid. ¹⁵ Danab Paulus omaleg gopig ele ag omalna gona, Atens tena, uuidna edun gokulagnu heegeg, Paulus nug Silas Timotius ele dilah nai amu ag aon gona apeg dooglahnu inam aum. “A paha udiya, da anided!” awa aum.

PAULUS NUG ATENS UKA NAI MEHUQOM

¹⁶ Amu Paulus nug Atens apa Silas Timotius ele amelah maama, nug ab amupa kayak ham bupuk dotolag amu kudumnab anata, nug keeke amunu oo huanak nauhom. ¹⁷ Paulus nug oopa anam doyaya, nug Juda dilag nai doyak laka uke, Juda danab amu iita adi danab ag Kayaknu

doonna, binag mepig ele amu, ag ele nai madipig. Amu nug ded oh e odiak abenpa uke, danab ah uđinna daateb amu, ag ele nai madipig. ¹⁸ Amu nug anam heehe, aria doyak danab ameg adit daapig ag nug ele aeg ona aeg doum. Doyak danab ameg laa amu ag Epikuriannu nai adapig, laa amu Stoiknu nai adapig. Ag oolagpa laala Paulusnu inam apig. “Danab umu nug adi nai mauhnoak madite?” Aegeg, Paulus nug Jesusnu amu mauha edua hibaitaknu nai ele matiom amunu laa ag apig. “Nug ab laapan dilag Kayak, ig ii dootem ele, amunutai nai mehuqte,” aon apig. ¹⁹ Ag anam matina, Paulus aon, ag qag ma nai matiak lag okai, ag amunu Ariopagas ateb amu, ag apa gona, “Ig na nai bau danab ah ipuanadtem amu doognignu oonig daate,” aon apig. ²⁰ Ag anam anana, ag tudidna apig. “Nai na mate doomut am nai baunab amunu ig nai amu diig doognignu oonig daate,” aon apig. ²¹ Amu Atens danab oh amu danab laihnu udiak Atens daapig ele oh, ag udat laanu amu dab ii mepig. Iita, ag nai baunu matin, diig anidna, nai bau amu dooglagnu amuib henan daapig.

²² Aria ag Paulus aon ukaeg, hetodiak aben onig Ariopagas amupa tena, nug amegpa anam aeg amu nug aha amelagpa matia aum. “Atens danab, da ag anadmi, ag kayak diigdiig binalag maknu amu ag bahilag ii yaate. ²³ Da uđien, da tatam ab mate oiyeye, ag ahilkad kayak diigdiig amu binalag menan daateb abenlag anadmi. Amu da qadab laa ele nuhigpa ag, ‘Imu nug am kayak laanu, ig nug ii dootem ele,’ anam yaapig dayeye

anidmi. Aria Kayak amu ag ii dooteb, ag Nug binag hamu meteb ele amu, gemu da nuhig nai amu mehuqpi, ag dooglag,” awa aum.

²⁴ Paulus nug anam anana, nug tudita aum. “Amu Kayak Nug wan imu hewowa, keeke oh wanpa daateb, laa ig anadtem, laa ig ii anadtem ele amu, Nug heum. Kayak amu Nug habnu, wannu ele Nadi daate amunu Nug metid lag, danab epelagpa heteb, amu oopa, Nug ii daate.

²⁵ Amu Kayak Nug keeke laanu tutu metete amunu ig danab ig Nug ehanidkunig? Iita. Nug nuka eleleib daate. Nug nukai baw dayaknu oudi, baw dayak amu keeke laa oh ele ig danab oh ig megate.

²⁶ Amu danab ah budub oh amu Nug ag alalag laipu heum amu nuhigpanuib ag bena apatpig. Apateg, Nug he, ag gona, wan ohpa daaegeg, Nug nuka haen ahilag mata, apalag ele matom. ²⁷ Amu Kayak Nug danab oh Nug dooglagnu oo daate amunu ag wagai mena bahi qenana, Nug daate tutuku anidkulagnu keeke amu oh heum. Amge Nug ig laib laib ohpa uma ii daate. ²⁸ Adinu? Nuhigpa ig baw ena dayak aotut, Nug ig gagatag megeke, ig oitem. Amu ig nuhigpaib aaku ena daatem. Ahilkad doyak danab laala ag ele amunu inam apig. ‘Ig ele Nug bekod daatem,’ aon apig.

²⁹ Aria ig Kayak bekod daatem amunu ig ihinig dab makpa, ‘Danab ag gol, silwa, men ele aona, ahilag dab makpa ag epelagpa dotog heteb amu Kayak Nug keeke amubia daate,’ ii doomta.

³⁰ Anuka danab ag ii doonna, ag keeke epelagpa hena, binag mepig amunu ahilagnu amu Kayak Nug dab mak okai ii awom. Amge gemu amu keeke amunu Kayak Nug danab oh wan ohpa

daateb amelagpa inam ate. ‘Ag oolag edueb oinna amu ag baula kayak ham bupuak aib binalag mepig!’ awa ate. ³¹ Adinu? Nug wanpan danab ah oh epediakunu amu ded aaku otiom daate. Dimpa geha, epediak amupa amu danab ah oh ag ahilag hak amu kobol adi hepig amupa Nug epediakku. Epediak nuhig amu tutuku eledenab. Amu Nug danab laa epediak amu gumakunu otiom. Danab amu Nug mauhe, Kayak Nug he, Nug edua hibaitom amunu danab oh ag keeke amu genab beku amu ag oolagpa genab dooglagnu elele,” awa aum.

³² Aria nai doopig ele amu, ag danab edua hipaidkunu nai amu ag doon, laala ag ahan awa awa qetak nai matiegeg, laala ag apig. “Dimpa geha ig nahip nai keeke amunu matime amu baula ape doognig,” aon apig. ³³ Ag nai anam anam matieg amu Paulus nug aha, ag uuata ukom. ³⁴ Paulus nug uuata ukom amge danab laala oolagpa genab doona dim lamidpig. Laa amu Daionisias, nug am Ariopagasnu hetodiak danab. Laa amu ah nug onig Damaris amu laala ele.

18

PAULUS NUG KORINT UKA UDAT HEUM

¹ Amu dimpa amu Paulus nug Atens uua aha, Korint ukom. ² Nug uka, Korint ta amu Juda danab laa onig Akwila antom. Nug apag diig amu Pontus. Nakok matu bia, nug wau Prisila ele a ab okai Rom, apanu ahai udipid. Adinu? Rom dilag king Klodias, nug Juda danab ah amelagpa, “Ag Rom ii daamna, ag Rom uun, ab lalapa gona dayeg!” awa aum amunu Akwila Prisila ele a Korint apa

daapid. Aria Paulus nug uka, a anate ³ nug a ele udat laipu amunu a nug ele oh daanna, udat amu hepig. Ag dod gadapa sel lag koitak udat hepig. ⁴Ag udat amu henana, Paulus nug Juda dilag Metid ded ohpa amu Juda dilag nai doyak laka noono, nug ag ele nai matina, nug heeb, Juda amu Grik ele ahilag dab mak amu edun ag Jesusnu oolagpa genab dooglagnu oolag yom.

⁵ Am Paulus nug anam heeche, dimpa Silas Timotius ele a ahai, Makedonia uuya neeh, Paulus nug udat laa heum amu uua, nug Kayak naiib ded oh mehuqom. Nug Juda danab amelagpa, “Jesus Nug am Kristus,” matia aum. ⁶ Amge Juda ag nai amu tabapeg nokunu wagai men hena, dapidna, aon aon qedapig amunu nug uuaa ugaka, nug lamen nuhigpa kauko dayom amu qeqale neene, nug amelagpa aum. “Ag padal mekulagtai amu aka bedulagpa, da ehed ii hemi. Amunu gemu da iita adi gumate gokul,” awa aum.

⁷ Paulus nug anam anana, nug Juda dilag nai doyak lag amu uua doa, danab laa onig Tisias Jastas laugpa ukom. Tisias Jastas nug Kayak binag metom ele. Nug laug amu Juda dilag nai doyak lag amu guguitak dayom. ⁸ Paulus nug apa dayeye amu Juda dilag nai doyak lag amunu iki, onig Krispas amu nug baekudpa ele ag am Jesusnu oolagpa genab doopig. Korint kudum laa ele ag Paulus nai mehuqe, ag oolagpa genab doona amu layatak aopig.

⁹⁻¹⁰ Amu ded laa tuqan Kayak he, Paulus nug tuleglegpa Jesus ante, nug amegpa aum. “Da na ele daatep amunu na aib badame! Na dahil nai

ape do^yeg! Oden aib qamutme. Danab laa nug na ii ni^tama. A^dinu? dahilad danab ah ku^dum ag ab imupa daate^b,” awa aum. ¹¹ Amu Paulus nug Na^di anam a do^yowa, nug Korint apa ma^d laipu kalam eblaih laipu ele dayaya, nug Kayak nai ipuanat^om.

¹² Am Paulus nug Korint dayaya, anam heum amge dimpa Galio nug Grik dilag gabman okai dayeye, haen amupa Juda ag oh qag mena, Paulus keked metan, adan aon hetodiak abenpa gopig. ¹³ Ag Paulus aon hetodiak abenpa gona, ag hetodidna inam apig. “Danab imu nug danab ah oh ag do nai daate amu tabapeg neeb^eb, ag kobol laapa Kayak binag mekulagnu ipuanad^te,” aon apig.

¹⁴ Ag anam aeg, Paulus nug ag nai apig amunu nug nob edua akunu hee^e, Galio nug aha, Juda amelagpa aum. “Danab imu nug do laa tipallo o nug kobol nau laa helo amu ag nug heum amu apeg, da nai amu dookulnu ib ele. ¹⁵ Amge ag u^din, ag nainu, onig laalanu ele amu ag aka ahilag donu ele da od medate^b amunu da amu ii hepa, ag aka babait^eg! Da keeke amu epedikulnu, da uumi!” awa aum. ¹⁶ Nug anam anana amu nug ag hetodiak aben amupanu lamat^om. ¹⁷ Galio nug lamate amu ag ahan hetodiak aben guguitakpa Sostensis, nug am Juda dilag nai doyak lag amunu iki amu, ag nug adan makud^pig. Juda ag anam hepig amge Galio nug amunu ii dab meum.

PAULUS NUG EDUA ANTIOK UKOM

¹⁸ Juda danab ag Paulus adan anam hepig amge Paulus nug paha ab laapa ii ukom. Nug ded nakok kudum apa dayowa, dimpa nug Senkiria

abpa ukom. Nug Kayak amegpa keeke laanu nai nuhig gagatag qetom amunu nug Juda dilag kobol dim lamita, apa nug he, danab laa nug Paulus iki udug hoiye uke, nug Siria gokunu ubpa teum. Nug Prisila Akwila ele oh gopig. ¹⁹⁻²¹ Aria ag gona Epesus tena, Paulus nug uka, Juda dilag nai doyak laka no, Juda danab ag nug ele nai madipig. Nug ag ele nai matin, ag nug amegpa apig. “Na haen nakok elab ig ele daatu!” aon apig amge nug aum. “Da anam hekulu elele ii dootem,” awa aum. Paulus nug anam awowa, gokunu haaha, nug ag amelagpa aum. “Kayak Nug ab amu da edue udie anadkul,” awa aum. Nug anam awowa, nug Prisila Akwila ele ab amupa daaglahnu uuate daaeheh, nug ubpa ta, Epesusnu aha ukom.

²² Aria ub amu uka Sisaria eede, Paulus nug ubpanu noa, nug Jerusalem ukom. Uka ta, nug kristen tamaniak humataa amu nug noa, Siria wanpa ab onig Antiok apa ukom. ²³ Amu Paulus nug uka Antiok noa, nug apa haen nakok elab dayowa amu dimpa nug aha, Galata, Pinisia ele dilag wanpa ab laalapa uka oiyaya, kristen gagatag aqom.

APOLOS NUG EPESUS UKA NAI MEHUQOM

²⁴ Paulus nug anam heehe amu Juda danab laa, onig Apolos, nug anig ab laa onig Aleksandria, Igipta wanpa apa menue dayeye uke, Paulus Epesusnu aha oiyeye, Apolos nug uka Epesus dayom. Nug am doyak kudum ele amu nug amu Kayak nai, Juda ag adapig ele amu, nug amu oh doyom. ²⁵ Haen nug Epesus ii ukom amu laa nug Layatak Johanes heumnu a doyeye, Layatak Johanes nug

Jesusnu adi aum amu ele doynom. Nug Jesusnu nai doynom ele amu nug amunu danab ah eledenab ipuanatom amge nug Jesusnu nai oh am ii doynom. ²⁶ Aria nug ii badada, nug Juda dilag nai doyak laka noa, nai mehuqom. Amu Prisila Akwila ele a nug anam anidya, nug aoya, Kayak Nug ib ihinig babaitom amu a keeke amu ohnu ipunidpid.

²⁷ A ipunitih amu dimpa Apolos nug Griknu wan obatak laa onig Akaia apa gokunu he, Epe-susnu kristen oh ag nug nai doynom amu awa uka tudidkunu dab mak nuhig amu gagatag qedapig. Aria Grik danab kristen mepig, amu dilag, ag udug yak laa ukeb ag aoglagnu yaapig. Yaaeg, Apolos uka Akaia te amu danab ah Kayaknu ehanitak okai hamu megte amu aona, ag oolagpa genab doopig ele amu, Apolos nug ag gagatag aqom. ²⁸ Nug Juda danab ele danab ah noolagpa nai matinna, nug Kayak naipanu, Jesus am Kristus, ipuanatata matiaya heehe, nuhig nai am Juda dilag nai huana editom.

19

PAULUS EPESUS UKA UDAT HEUM

¹ Apolos nug Korint apa dayeye, haen amupa Paulus nug uka, atu heqo laih qauko elepa oiya oiya, nug Epesus ta, apa nug kristen laala daaegeg anata, ² Nug od matom. “Ag oolagpa genab doyona amu ag Kayak Oudi aopigte?” awa aum. Awa a ag apig. “Iita! Ig Kayak Oudi daate, nai amu laa nug a ii doomut,” aon apig. ³ Aon aeg aria Paulus nug od mata aum. “Aaku amunu ag layatak adi aopig?” od matom. Od mate amu ag apig, “Ig am Johannes nai matiom, nai amu dim lamidta layatak

aomut,” aon apig. ⁴ Anam aeg amu Paulus nug aum. “Anuka Johanes nug danab ah layata, nug inam amelagpa aum. ‘Kayak Nug ahilag hipunin uhuqa madakunu amu ag oolag edueb, ag layatak aweg!’ awa aum. Nug ele, ‘Danab nug da dimulpa udite, ag nuhignu oolagpa genab doyeg!’ awa aum. Danab amu nug Jesus,” awa aum. ⁵ Paulus anam a, ag nai amu doona amu ag Nadi Jesus onigpa layatak aopig. ⁶ Paulus nug epeg qadelagpa me, Kayak Oudi ne aona, ag ab ab nailagpa nai matinna, ag Kayak nai ele mehuqpig. ⁷ Danab layatak aopig ag oh amu 12 keeke anam.

⁸ Aria Paulus nug Juda dilag nai doyak lag oopa noa, nug Kayaknu do madodnu nai gagatag mehuqom. ⁹ Nug kalam ewam anam mehuqege, laala ag nai amu ii adaglagnu gagatagnab daapig amu ag oolagpa genab ii doopig. Ag danab ah kudum amelagpa Nadinu ib amu dapidna, nai nau madipig. Anam heeg, Paulus nug ag uuata, kristenib diia uka, ded oh Tirasnu sul lag oopa noa, nai mehuqtom. ¹⁰ Mad adit Paulus nug anam heehe, danab ah Asia daapig, Juda amu Grik ele, ag oh Nadinu nai doopig. ¹¹ Kayak Nug Paulus epegpa kobol danab hekunu elele iita okainab heum. ¹² Danab ag takaknu lamenu amu lamenu qati laala ele akan ucin, Paulus bedupa mena aon, dimpa ag amu aon ode danab gumadna gona, bedulagpa maateg, danab ode ele ena daapig. Oudi nau ele amu uuadna gopig.

¹³ Am Juda laala ag oinna, oudi nau lamadpig ele amu, ag Nadi Jesus onigpa apeg heeb, oudi nau danab ah uuadna gokulagnu aon anana, ag

inam apig. “Ig Jesus onigpa, Paulus nug nai nuhig mehuqte ele amu ig, ‘Ag danab imu uuidna ukeg!’ ag amelagpa atem,” aon apig. ¹⁴ Aria Juda dilag mana metak danab okai laa Skiwa, nug am nid danab eblaih adit ele amu, nug bekod ag kobol amu hedapig. ¹⁵ Ag anam henana, ag Jesus onigpa oudi nau laa amegpa anam apig amge oudi nau amu edua amelagpa inam aum. “Jesus amu da dootem, Paulus ele amu da dootem amge ag am aun?” awa aum. ¹⁶ Oudi nau amu anam awa od mate amu danab oudi nau nug bedupa dayom ele amu, nug aha oola qadelagpa ta, ehed makudata, bedulag he nauha auta awe, ahilag lamem ele patide ne, ag lag amupanu bedulag miag ele day-eye, tiilag neene, ahan oolna gopig.

¹⁷ Ag anam heeg, dimpa Juda danab amu Grik danab ele Epesus daapig amu ag nai amu doon, ag oh badan, ag Nadi Jesus binag mepig. ¹⁸ Anam heegeg amu danab ah kudum ag oolagpa genab doopig ele amu ag adi keeke nau anuka hepig amu oh ag miag mena anam madipig. ¹⁹ Amu ag oolagpanu danab kudum ag anuka onig awak, bad maknu buk ele aon adan, udat amu hepig ele amu, ag buk amu akan qag mena, danab ah oh noolagpa manateg ewom. Ag buk amunu ahilag nob men dodo amu oh eb qepig amu 50,000 men dodo silwa. ²⁰ Anam heegeg, Nadinu nai tuala ugeke, kudumnab doona, kudum ag Jesusnu oolagpa genab doopig.

²¹ Amu dimpa amu Kayak Oudi Nug Paulus dab mak mete, Paulus nug aha, Makedonia Akaia ele dilagpa uka oiyowa amu dimpa nug Jerusalem gokunu dab meum. Dab ma amu nug aum. “Da

Jerusalem apa ukoya, dimpa amu da uken ab okai onig Rom ele anidkul,” awa aum. ²² Nug anam awowa amu danab adit nug ehanidpid ele amu maate, Makedonia gopid. A am Timotius Erastas ele. Paulus nukā Asia wanpa, apa nakok dayom.

EPESUS DANAB AHAN MUTUB QEPIG

²³ Paulus nug apa dayeye, haen amupa danab laala ag Nadinu ib amu keked metan, ahan mutub nadi qenana hepig. ²⁴ Kobol amu inam beum. Danab laa onig Demitrias nug am keeke silwapa haknu doyak ele. Aria danab laala ag ele udat amu doopig amu ag nug waapa daanna udat amu henana, ag kayak ham bupuak onig Atmas, nuhig metid lag dotog naunau henana, men dodo okai aodpig. ²⁵ Nug danab amu qag matowa amu danab laala ag silwapa, keeke diig laala haknu doyak ele amu, ag ele he udieg, nug amelagpa aum. “O danab, ag dooteb, udat imupa men dodo ihinig ena bete. ²⁶ Amu danab laa onig Paulus nug udia, danab ah ameg nadi eedata ham bupuewe, ahilag dab mak am kaboliak daate. Ag amu ele anidna dooteb. Anteg, nug Epesusib anam ii heum. Iita! Nug Asia wan imu ohpa bia oiyaya, nug anam hete. Nug inam ate. ‘Nigul, ig epenigpa hetem imu am, Kayak iita!’ Nug hanhan anam ate. ²⁷ Paulus nai ate, amuam ihinig men dodo aognignu udat imu onig aaku heeb nauhkutai. Amuib iita, nug nai ate amuam geha danab ah ag genab doopeg amu kayak ah onig Atmas amu nuhig mana metak lag amunu geha danab ah ag, ‘Umu am keeke genab iita, keeke ham bupuak,’ aon akulagtai. Gemu Asia oopanu oh amu danab ah wan ohpanu ele ag

kayak ah onig Atmas binag meteb amge Paulusnu nai heeb, Atmas onig nadi aaku iita mekurai,” awa aum.

²⁸ Demitrias nug anam awa a, ag nai amu doona, ag opodilag huana be, ag huanak qalan ena apig. “Atmas, nug amu ig Epesus ihinig kayak, nug am nadi, anuqak,” aon epig. ²⁹ Ag anam aon eeg amu ewak baag nadinab ab amupa ahehe, danab ah oh ag mutub qenana, ag ahan oh qaibad qag mak abenpa gonana, ag Gaias Aristakus ele adualatna eedatna ag ele oh gopig. A amu Makedonia danab adit, a Paulus ele oh oipig. ³⁰ Aria ag gona amupa daaegeg, Paulus nug noa danab ah noolagpa nai madikunu heum amge nug guitak aomanu kristen ag nug hagaka aopig. ³¹ Asia gabman laala, ag Paulus ele layam batapig amu, ag nai meeg uke, ag Paulus nug qag mak abenpa ii gomanu ii daye daye apig.

³² Danab ah ameg nadi amu ag ahilag dab mak kaboliom, ag kudum ag adinu qag makpa udipig amu ag ootot aqom amunu danab laala ag nai idu laa anan eegeg, laala ag nai idu laa anan epig. ³³ Ag anam heegeg, Juda daapig ele amu ag ab amupan danab ag ahilagpa nai yaaglagnu badan, ag ahan, Aleksanda dutuneg noolagpa no amu danab laa apa daapig ele, ag nug nai madikunu heeg, Aleksanda nug epeg huma, danab ah amelagpa nai ab dooglagnu dig ma akunu heum. ³⁴ Amge mutub qenan daapig ele, ag nug anidna doopig, nug am Juda amunu ag oh odelag ooho, ag huanak epig. “Atmas, nug am ig Epesus ihinig kayak, nug am nadi, anuqak!” Ag anamib aam ameg adit anam anana epig.

³⁵ Anam heegeg, dimpa Epesus abnu do metak danab amu nug he, danab ah ag to eteg, nug amelagpa aum. “Epesus danab! Wan ohpan danab oolagpanu amu aun laa nug Epesus, ab imupan danab, ig nadi Atmas, nug nigul hab atannu igupa na qeum amu, ig nuhig mana metak lag ele gumatem ii doote? ³⁶ Amu danab laa nai amu tapeb nokunu elele iita amunu ag uun to eteg! Ag aib ahan pahanab keeke laa hepig. ³⁷ Danab adit imu ag a diiatna udipig amge a Atmasnu mana metak lakanu keeke yab laa ii aopid. A ihinig kayak ah ele dapidya, aoi aoi ii qedapid. ³⁸ Amu Demitrias nug nuhikud udat danab ele ag danab laa nug ahilagnu ehed laa heum dayeb amu ag danab amu hetodiakpa mekulagnu ib daate. Gabman okai daateb. Ag geha hetodiakpa nai amu bapaidkulag. ³⁹ Amu ag oolagpa nai laala dayeb amu aria ag qag mak haenpa ag qag mena, nai amu bapaidkulag. ⁴⁰ Ag gemu hepig imu am ehed laa ana bekutai. Adinu? Gemu ag aaku mutub qenan hepig amu gabman okai amunu nai hekulag bia, amuam aditai keeke laa ehed dayom amunu hepig laa iita. Aria am laa ag ig qag mak nau imunu od megapeg amu geha ig nai laa akunignu elele iita.” ⁴¹ Aria abnu do metak danab nug amelagpa anam awowa he, danab ah amu qatiadna gopig.

20

PAULUS NUG MAKEDONIA OIYAYA UKA GRIK TEUM

¹ Oqotilag ahom amu iita me amu Paulus nug kristen onilagpa e, gumidna udieg, nug nai laala

gagatag aqakunu amelagpa awowa, uuata gokunu humitak nai madata amu nug aha Makedonia ukom. ² Nug ugaka, kristen laih apanu amu amelagpa nug nai kudum ag gagatag aqeb daaglagnu matiom. Dimpa amu nug uka, Grik wanpa teum. ³ Grik wanpa ta, apa nug kalam ewam dayowa amu dimpa nug aha, ub awa Siria gokunu haaha, Juda ag nug qepeg mauhkunu nai qagapig doyom amunu nug edua Makedonia gokunu dab mak awom. ⁴ Dab mak awom amunu Beria danab Sopata, nug am Pirias beka, amu Tesalonika danab adit Aristakus, Sekandas ele amu Debi danab Gaias amu Timotius amu Asia danab adit, Tikikas Tropimus ele, ag oh Paulus ele gopig. ⁵ Danab amu Paulus ele gona, Troas tena, ig amenig mepig. ⁶ Ig amu Juda hobul laa, amuam Bret Yis Iita Latebnu Hobul, hobul amunu metid amu uka male amu dimpa ig ahat, Pilipai apa ubpa teta, ig ukautut, ded tanig ele uue, ig Troas teut, laa anuqna gopig, ag ele qag memut. Ig ded eblaih adit ele apa daamut.

⁷ Amu Sarere tueb, Juda kobolpa metid haen amupa dig meum amunu amupa ig kristen danab ele e laipu aognignu qag memut. Am Paulus nug wakadeb gokunu dayom amunu nug nai elab danab amelagpa matieye uka, tu meum. ⁸ Amu lam kudum lag oo atan, ig qag meta daamut ele, amupa eopig. ⁹ Amu nid bau laa, nug onig Yutikas, nug am ulah ipu atan ta dayom. Amu Paulus nug nai elab matieye, Yutikas nug ameg na auta awe, nug niia gad ma, lag oo atan ewampanu na qa uka, wanpa qa mauhe, ag nona aon doeg, ¹⁰ Paulus nug noa, nid bau amu guguita ona, gomela nid odakia, nug

aum. “Ag aib badapig, nid imu bau daate,” awa aum. ¹¹ Aria Paulus nug edua atan ta, bret awa pane lawona, dimpa amu nug ag ele nai matiegeg wagdom. Wagde amu Paulus nug ukom. ¹² Ugeke, ag nid bau amu nug bau ena dayeye, ag aon laka ukaegeg, ag oolag edua enanag dayom.

¹³ Paulus nug baegpa Asos gokunu dab maama heum amunu, nug babaitom bia ig ubpa apa gokunignu ahat, anuqta oolta ub atan teta gota, Asos teta, Paulus apa anidta aoput, oh ubpa gokunignu gomut. ¹⁴ Paulus nug Asos uka, ig apa anike, ig nug aot ubpa teta amu ig Mitilini gomut. ¹⁵ Ub amu ig aika uke, Mitilini teta niimut. Wagde ig ahat gota, Kaios gukuidtata niitut, wagde amu ig ahat gota, Semos temut. Niiut wagde amu ig edut ahat gota, Mailitas temut. ¹⁶ Paulus nug Pentikosnu ded ii nak haenpa Jerusalem tekunu dab mak awom amunu Asia wanpa haen amu edidmanu ig Epesus qe edidkunignu aum.

PAULUS HUMATAK NAI EPESUS IKI MATOM

¹⁷ Amge ig Mailitas teta amu Paulus nug Epesus kristen tamaniak iki danab ag nug gumidna udiglagnu onilagpa eum. ¹⁸ Onilagpa e, ag ucin nug gumidna beeg, nug amelagpa aum. “Ag da ag oolagpa dig mein udat hei uke uke, da ag uuadmi batak, haen gamag amu ag da kobol adi hemi amu ag aaku dooteb. ¹⁹ Ag dooteb, haen kudum Juda ag da tapidpeg nokulnu hepig, amupa amu da ug kudum aomi amge da onil qei, honap noono amu da Nadinu udat hemi. ²⁰ Amu da nai oh ig ehanigkunu mehuqkulnu dayom amu da madikulnu bodo ii etami. Iita, da qag mak

abenpa, ag laulkadpa ele ipuanadmi. Amu ag amu ele dooteb. ²¹ Da anam heinne amu Juda danab amu Grik danab ele ag Kayak nai doonna, oolag edueb, Nadi Jesusnu oopa genab doyak aoglagnu nai mehuqmi.

²² Aria doyeg, gemu da dahil dab mak gagatag da dutunida he, da iiku Jerusalem gotem. Apa adi keeke geha dahilpa beku amu da ii dootem. ²³ Amge imuib amu da dootem, da ab ab ohpa oitem amu Kayak Oudi Nug da tutuku ipunidada, amelpa inam ate. 'Geha ag na mani guitakpa meidpeg, na ug kudum aokut,' awa ate. ²⁴ Amge da amunu ii dab metem. Da bedul bau daakunu amu da dab mak amu gagatag ii adatem. Iita! Da ib gomi ele amupa oiyeye, da Kayak Nug ehanitak okai hamu megaka, edua awikunu Nai Ena, nai amu mehuqpi danab oh dooglag amunu dab metem.

²⁵ Ag doyeg! Anuka da ag oolagpa oiyeye, da Kayaknu do madodnu nai amelagpa mehuqmi, am gemu da dootem, geha dimpa ag oh da idul baula ii anidmana. ²⁶ Amunu gemu da ag amelagpa iiku maditem. Am ag oolagpanu laipu laa nug padal meku amuam dahil ab iita. ²⁷ Adinu? Da Kayaknu dab mak oh ag amelagpa mehuqkulnu dayom amu da ii bodo etami. Iita. Da matimi. ²⁸ Amunu ag aka ahilagnu amu Kayaknu danab ah, Kayak Oudi Nug ag gumak danab ahilag daaglagnu otiatom ele amu, ag amu dilag ele oh dab menan dayeg! Ag kristen tamaniak, Kayak Nug nuka Nug tiigpa nuhig tamaniak amu daden meum ele amu, ag nuhig tamaniak amu tutuku gumateg! ²⁹ Amu da genab tutuku dootem, da ag uuaaten gopi, dimpa

ham bupuak ipunitak danab, ag qai nau bia, geha ag oolagpa bena, hepeg nauhkulagnu hekulag. ³⁰ Am ag aka ahilkad danab laala ag ahan, ag laa bupualadnana, kristen eedadpeg, ahan dim lamadkulag. ³¹ Amunu ag mad ewam, tuqan amun ele da ag laib laib ahilag dab mak mad edakulnu amu ii bodo etami, da amel leb neene, ag ipuanatena, ai doopig, ag amunu dab mena, dimitimmu danab nau ag hepeg, ag padal mem-ananu ag dab menan dayeg!

³² Am gemu da ag Nadi epegpa maate, nuhig ehanitak okai hamu megte, nai amu waapa ele aaku maadtem. Nai amu nug gagatag amu ulum ele madaḱunu elele. Ag ulum amu aona, ag keeke Kayak Nug opia awak danab madaḱunu aum amu ag aoglag. ³³ Amu da danab laanu silwa, gol, lamen keeke, da amunu amel ii qeum. ³⁴ Ag aaku dooteb, da epelpa udat hein, da keeke adinu tutu memi amu awewe, danab da ele udat hemut amu, da ag ele ehanadmi. ³⁵ Da Jesusnu nai laa dab meinne, da ehanitak kobol amupa amu da ag danab ah, keeke iita, hamu daateb, ig ag ehanadkunignu daatem amu, da kobol amupa ag amu dilag ehanadkulagnu ib ipuanadkulnu aaku udat amu hemi. Jesusnu nai amuam inam. ‘Danab nug danab laa keeke madaḱunu gamag ahate, gamag ahak amuam danab nug keeke awa, gamag ahate, gamag ahak amu edidte.’” ³⁶ Paulus nai amu matia malowa, nug gateg qaun o, Epesus kristen tamaniak iki danab ele unuqidpig. ³⁷ Unuqitona amu iki danab ag oh huana gaanna, ag Paulus adan ootuqidpig. ³⁸ Ag Paulus nug, “Ag baula da idul ii anidmana,” aum, nai amunu ag ug nadi

doopig. Ug doonna, ag Paulus omalna gona, ubpa uuidpig.

21

PAULUS NUG JERUSALEM GOKUNU UBPA OIYOM

¹ Ig uuadta gota, ub atan teut, ub ahe, ig ahat tutuku Kos gomut. Wagde ded laapa amu ig gota, Ros teta, edidta gota, Patara temut. ² Patara apa ub laa wan onig Pinisia gokunu heehe anidta, ig oolta ub amupa teut, aha awika ukom. ³ Aria gotata ig nud Saipras anidtata, nanehpa edidta gota, Siria nota amu Taia eedmut. Uupan keeke apa hipaglagnu dayom. ⁴ Anam dayeye amu ig gota, kristen danab anadta, apa ig ded eblaih adit ele daamut. Amu Kayak Oudi Nug kristen amu dilag dab mak mad ete, ag Paulus amegpa, nug Jerusalem ii gomanu apig. ⁵ Aeg, ig ab amupanu ahat gokunignu haen miag do amu kristen danab ag, amu ag waalkad, bekalkad, adelkad ele ag qag mena, omaikeg ab dimitim dota, yu ihipa gatenig qaun ota, unuqidmut. Unuqitota, ag ig gokunignu humikegeg amu ig ag ena daaglagnu humadtata, ⁶ ig ub atan teta ukautut amu ag edun laka gopig.

PROPET AGABAS PAULUSNU NAI AUM

⁷ Ig ub atan teta, Taia uuta, ig gota Tolemes teta, ig kristen humatut amu ig ded laipu ag ele daamut. ⁸ Ded amu uue wagde, ded amupa ig Tolemes uuta gota, Sisaria teta amu ig gota, total danab Pilip laugpa nug ele daamut. Nug am dig makpa danab eblaih adit ele laa ag total danab ehanadpig ele, nug am amunu oolagpan laa. ⁹ Nug am adekud

wadele, ag danab ii aopig. Adekud ag ele Kayak nai mehuqtapig.

¹⁰ Amu ig ded laala ele Sisaria daautut, propet laa, nug onig Agabas, nug Juda uua Sisaria neum.

¹¹ Nug ig gumika u^udia, nug Paulusnu ma^utagid awa, nug nuka nug baeg epeg ele amupa qakowa, nug aum. “Kayak Oudi Nug inam awa ate. ‘Juda Jerusalemnu, ag geha ma^utagid imu mameg amu inam hipalna, aon gona, iita adi ma^utaglag,’” awa aum.

¹² Nug anam ha, nai amu a doota amu ig danab ab amupanu ele ig Paulus nug Jerusalem ii te-manu ii daye daye amut. ¹³ Ig anam amut amge Paulus nug aum. “Ag adinu amunu gaanna, ag dahil dab mak heeg nauhte? Da mani guitakpa daakulnu am elele dootem amge amu aakuib iita. Da Jerusalem apa, Nadi Jesus Nug onig atan ta daakunu mauhkulnu ele elele dootem,” awa aum.

¹⁴ Nug anam awa a, ig nuhig dab mak edugnignu elele iita anidmut amunu ig nai amu baula ii matita inam amut. “Nadi nuhig dab mak aakuib nug bad!” aot amut.

¹⁵⁻¹⁶ Amu ded laala uke dimpa Sisarianu kristen laala ag ig ele oh gota, Jerusalem teta, ag omaikeg, ig Nason laugpa gomut. Nug am Saipras danab, kristen anukanu. Ig nug laugpa daagnignu oo dayom.

PAULUS JERUSALEM TEUM

¹⁷ Ig Jerusalem teut amu kristen ag ig awigkulagnu gamalag ahom. ¹⁸ Gamalag ahe, ded amu dimpa Paulus nug ig ele oh Jakobus anidkunignu ukaut, kristen tamaniak iki danab

oh ag Jakobus ele daaegeg ¹⁹ amu Paulus nug ag humatowa, nug keeke oh Kayak Nug iita adi oolagpa udat nuhigpa heum amunu oh amelagpa matiom.

²⁰ Paulus nug kaya amu matie doona, ag Kayak binag mewona, nug amegpa apig. “O lainig, na dootem, Juda tausen kudumnab ag kristen bepig amge kristen amu oh ag do ihinig ele dim lamidkulagnu wagai huana meteb. ²¹ Ag anam wagai meegeg amu danab laala ag ahan, danab amu amelagpa nahipnu inam apig. ‘Paulus nug oiyaya, Juda laih laih, iita adi oolagpa daateb ele amu, nug ag Mosesnu do di metanna, ag ahilkad nid gadalag ii otadnana, do anukanu ele amu ii dim lamidmananu ate, aon apig. ²² Aria na ipa udime daatem amu Juda, kristen bepig daateb, ag amu dooglag amunu nai nahipnu apig amu Juda kristen ag amuam genab iita dooglagnu ig na inam hekutnu oonig daate. ²³ Ig danab wadele ag keeke laa hekulagnu Kayak amegpa nai gagatag qetan daateb amunu ²⁴ na danab amu diin, mana metak laka gona, na Juda dilag do laa, do amuam danab nug opia awak daakunu ipunigte amu, na anam bia daakutnu na kobol amu oh hepe, ag ele hepeg, na ag ele oh opia awak daaglag. Udat amunu nob amu na mana metak danab madape, ag ikilag udug hoiglag. Na anam hepe amu danab oh ag dooglag, ag nahipnu apig, nai amuam genab iita. Ag dooglag, na ele do dim lamidtem. ²⁵ Amu iita adi ag kristen bepig daateb ele amu, ag kobol adi ii hemananu amu ig anuka nai amu udugpa yaata, meut uke, ag amunu dab mekulagnu doopig. Iita adi ag dod laa, danab ag dod amu main kayak ham

bupuak medapig ele amu, ag dod amu tepu amu dod tiig ele amu dod danab ag mudipa o epelagpa baag adæg mauhom, amu ele ii lamananu, ag gapai kobol ele ii hemananu yaamut.” Ag Paulus amegpa anam apig.

JUDA AG MANA METAK LAG OOPA PAULUS ADAPIG

²⁶ Aaku Paulus nug danab wadele amu diie, ded amu dimpa ag gona, nug kobol oh nug ag ele opia awak daaglagnu heum. Nug amu hewowa, nug mana metak lag oopa noa, mana metak danab amelagpa ded atempa ag aaku opia awak daapeg ukeb malaglagnu amu ag anen anen ahilag mana metaknu dod aon dokulagnu ele aum.

²⁷ Nug anam he, dimpa ded eblaih adit amu malakunu heehe, Juda Asianu ag Paulus mana metak lag oopa anidna, ag ahan heeg, danab ah oh ag oolag nauhe, ag ahaeg, Asia danab ag Paulus adan huana inam epig. ²⁸ “Israel danab, ag ig ehanikeg! Danab imu nug atu wan ohpan danab ihinig huunu, ihinig donu amu mana metak lag ihinig imunu ele am ena iita ipuanadte. Amuib iita. Nug Grik danab laala ele diie uđin, mana metak lag oopa nona, ag lag gun imu dubutid medteb!” Ag anam anana epig. ²⁹ Ded laa ag Epesus danab Tropimus, nug Paulus ele ab okai amu oopa daaeheh anatpig amunu ahilag dab mak ham bupuakpa amu Paulus nug Tropimus omala, mana metak lag oopa noum anana hepig. ³⁰ Ag anam heeg, Jerusalem oh otaina, ahan uđin qag meeg, ag ahan Paulus adan eedna aon mana metak lag dimitim gonana, ag od oh manadpig.

ROMNU DAUP DILAG OKAI LAA PAULUS EHANITOM

³¹ Ag Paulus qekulagnu heegeg amu Romnu daup Jerusalem daapig, amu dilag okai nug, “Jerusalem danab oh ahan otaitēb,” doyom. ³² Nug doya, paha aha, daup 100 dilag iki laala amu daup laala ele diie, ag qaibaḍ Paulus Juda ele gumadna noeg, Juda ag daup dilag okai, daup ele nopig anadna, ag Paulus baula ii makudpig, uupig.

³³ Uueg daup dilag okai nug gumata wana, Paulus ada, daup amelagpa, “Ag nug sen aditpa qakeg!” anana, nug Juda danab oḍ matom. “Imu danab aun, nug adi heum?” awa oḍ matom. ³⁴ Oḍ mate danab ah ameg nadi daapig ag ahan, laa nai laa anana eegeg, laa ag nai laa anana eegeg, mutub huanak ahe heeg, daup dilag okai nug nai amu diig dookunu elele iita amunu nug daup nuhikud amelagpa, “Ag Paulus omalna gona, ag laulag oopa noig!” awa aum. ³⁵ Ag Paulus omalna ukaeg, Paulus nug uka lag amunu adqadpa teete, danab ah ag Paulus qekulagnu wagainab mepig amunu daup ag Paulus aon maon gopig. ³⁶ Ag Paulus maon ukaegeg, danab ah ameg nadi ag dim lamadnana, huanak ena apig. “Qepeg mauhad! Qepeg mauhad!” aon epig.

PAULUS JUDA AMELAGPA NAI MATIOM

³⁷ Daup ag Paulus omalna lag oopa nokulagnu heegeg amu Paulus nug daup dilag okai, nug amegpa nai laa madikunu oḍ mete, daup dilag okai nug Paulus Grik naipa nai matiom doya, otaiia, Paulus oḍ metom. “Na Grik nai dootēmtē? ³⁸ Amu na am Igipta danab nug nakok matu gabman

ele ban hekulagnu haaha, nug aha, danab 4,000 gabman ele ban hekulagnu diie, qep elab adaegeg omalate, ag atu tadakpa gopig amu na am nugtai iita? Na am aun?” awa od metom. ³⁹ Od mete am Paulus nug aum. “Da amu Juda danab, da ab onig Tasmus, Silisia wanpa daate, amupan danab. Ab okai dahil amu onig okai ele. Amu na ape, da danab ah amelagpa nai madikulnu ool daate,” awa aum. ⁴⁰ Awa a amu daup dilag okai nug ena awa a, aria Paulus nug aha, adqadpa hibaita, danab ah amelagpa epeg huma heehe, ag oh to etan, odelag qamuteg, aria Paulus nug Hibru naipa ag amelagpa nai madikunu ha, nug inam aum.

22

¹ “O da lailad, mamelad adi, ag doyeg! Da geha iiku ahilag nai amu nob mekulnu hetem,” awa aum. ² Aria ag Paulus nug Hibru naipa nai matie doona, ag oh to etan, oqoti iita, odelag qamutna daaegeg, Paulus nug nai madikunu ha, nug aum. ³ “Da am Juda danab. Da anil amu nug da Tasmus Silisia wanpa menuidom amge da ab okai imupa ena mein, Gamalielnu sulpa sul hei, nug ig alankad dilag do amu oh nug da tutuku ipunidom. Ipunide amu da Kayak dim lamidkulnu wagainab memi, gemu ag do amu dim lamidna, wagai mena heteb amubia. ⁴ Amu kristen danab ah ag Jesusnu oolagpa genab doona, ib imu dim lamidpig ele amu, da ag ehed haten, danab ah ele aqai mauhegeg, laala senpa hipalaten, diie uken, mani guitakpa maadmi. ⁵ Da anam hemi amu mana metak danab dilag iki nug, amu Juda dilag hetodiak okai, onig Sanhidren, amunu danab ele

oh ag dooteb, ag amunu matiglagnu elele. Da hei, ag ig lainkad Damaskus dilagnu udug yan, da medaeg, da Damaskus gokulnu gomi. Da kristen danab ah apanu amu hipalaten diien, Jerusalem udipi, ag hetodiakpa guitak aoglagnu gomi,” awa aum.

⁶ Paulus nug nai amu anana, nug nai tudita aum. “Da uken Damaskus guguiten ukai, belo meeme amu hab atannu amahlak okainab na, da talilida amahlom. ⁷ Amahlele amu da nein qein, da baag laa dooyi amu Nug inam aum. ‘Saul, Saul, na adinu da ehed heidtem?’ awa aum. ⁸ A amu da ami. ‘Nadi, na am aun?’ Ai am Nug aum. ‘Da am Jesus, Nasaret ted. Na da ehed heidtem,’ awa aum. ⁹ Aria danab laala ag da ele gomut amu ag amahlak anidpig amge Nadi Nug nai da amelpa matiom ele amu, ag amu ii doopig. ¹⁰ Nug nai amu matia male amu da ami. ‘Nadi, da aditai hekul,’ awe ami. Ai amu Nug aum. ‘Na ahan, Damaskus gona daape, apa amu danab laa nug Kayak na adi adi hekutnu tituanitom daatem amu, nug ab, na dookut,’ awa aum. ¹¹ Nug anam ana male amu amahlak okainab amupa da neegkulnu elele iita amunu laala ag da ele gomut amu ag da epel adan omaideg nota, Damaskus daami.

¹² Aria apa danab laa dayom, nug onig Ananias. Nug am do dim lamitak danab. Juda oh, Damaskus daateb ele, ag nuhignu, ‘Nug am danab ena,’ aon ateb. ¹³ Da daaiyi, danab amu nug da gumida udia, gukuida hibaita dayaya, nug da amelpa aum. ‘Lai Saul, na amen edua obateb, na neeke!’ awa aum. ¹⁴ Nug anam a da ena neeki, nug da amelpa aum. ‘Ig alankad dilag Kayak, Nug na nuhig dab mak dookutnu amu, na nuhig

Danab Tutuku anidkutnu, nuhig nai ele na daupa dookutnu tituantom. ¹⁵ Nug a doome amu na keeke oh anidna doome ele amu na geha nai amu danab amelagpa mehuqpe dooglag. ¹⁶ Aria na aib hamu daame! Na ahan, layatak aon amu na Jesus onigpa unuqidpepe, Nug hipunin nahip uhuqa medaku.' Ananias nug anam da amelpa aum.

¹⁷ Aria dimpa da eduen, Jerusalem udien amu da mana metak lag oopa unuqidmi. Unuqitti amu amel edue, ¹⁸ aria da Nadi anti, Nug da amelpa aum. 'Na paha ahan, Jerusalem uun uke! Na dahil nai ipa mehuqkut amu ag nai amu dooglagnu oolag ii daama,' awa aum. ¹⁹ A am da ami. 'Nadi ag da dooidteb. Anuka da Juda dilag nai doyak lag ohpa oiyeye, danab ah ag nahipnu oolagpa genab doopig ele amu, da diie hipalaten, da ag bu aqami. ²⁰ Amu anuka ag Stepanus qeeg mauhom, nug am nahip nai mehuqak danab, haen amupa amu da nug antiti, ag nug qeeg mauhom amunu am da oolena dayom. Amu ele da danab Stepanus qepig, amu dilag lamen amu da gumami.' Da anam awe, Kayak amegpa ami. ²¹ Anam ami amge Nadi Nug da amelpa aum. 'Na uke! Da na meidpi, na atu uma, ita adi, amu gumadna gokut,' awa aum." Paulus nug anam aum.

ROMNU DAUP DILAG OKAI NUG PAULUS GUMOM

²² Paulus nug nai amu matie, Juda danab ag Paulus nai matiom amu doyeg uke uke, nug ita adi gumata gokunu aum, haen amupa ag ahan, huana qatidna, baalag okaipa epig. "Qepeg mauhad! Danab anam amu nug daakunu elele ita," aon

apig. ²³ Ag anam anana, ahan mutub qenana, lamen ulahnu bedulagpanu amu udadna akaeg uke, gapud akan, akaeg atan teum. ²⁴ Ag anam heegeg amu daup dilag okai nug he, ag Paulus omalna, daup laulag oopa noeg, daup dilag okai nug adinu Juda ag Paulusnu anam henan epig ele amu, nug amunu diig dookunu, nug nuhikud daup ag Paulus wippa ehed matadakpa hetodiglagnu aum. ²⁵ Nug anam a, Paulus mudipa hipalegeg amu daup iki laa nug Paulus guguita hibaita dayeye, Paulus nug amu amegpa inam aum. “Rom dilag do am atem ipunigte? Ag Rom danab amu nug tatam wippa ehed matadpeg, dimpa nug hetodiakpa, nug ehed heumtai o iitatai anidkulagnu atete?” awa od metom.

²⁶ Daup 100 dilag iki amu nug nai amu doya, nug uka daup dilag okai amegpa aum. “Na imu atem hekut? Danab imu nug Rom danab,” awa aum. ²⁷ Daup dilag okai nug amu doya, nug Paulus gumita uka, nug od metom. “Na da amelpa ape doyei! Na amu Rom danabte?” awa aum. A amu Paulus nug aum. “Ao, da Rom danab,” awa aum. ²⁸ Nug anam a, aria daup dilag okai nug aum. “Da amu men dodo nadi ewoya, Rom danab daatem,” awa aum. Awa a amu Paulus nug aum. “Da am anam iita, da anai Rom danab tutuku menuidom,” awa aum. ²⁹ Amu danab ag nug wippa ehed matadna od metaglagnu hepig ele, ag Paulus anam a doon, ag pahanab edun uuidna gopig. Aria daup dilag okai nug Paulus nug am Rom danab doya, nug he hipalpig amunu nug oo badom.

PAULUS NUG JUDA DILAG HETODIAK OKAIRA

DAYOM

³⁰ Ag anam heeg, wagde, ded amupa daup dilag okai nug Juda ag Paulus bedupa nai yaan hepig, amu diig dookunu nug Paulus senpa qagapig amu uhuqowa, nug nai me uke, mana metak danab okai amu Juda dilag hetodiak okai, onig Sanhidren, amunu danab oh ele qag meeg, nug Paulus omala doa, ag noolagpa he hibaitom.

23

¹ Paulus nug noolagpa hibaita dayaya, hetodiak okai danab daapig amu oh neekatata, nug aum. “O lailad, da oiiyi udie, gemu ele oitem amu da Kayak noobpa, da doyeye ehed laa ii hemi,” awa aum.

² Paulus nug anam awa a amu mana metak danab dilag iki Ananias, nug aha, danab Paulus guguitak daapig amu ag nug oti matadkulagnu amelagpa aum. ³ Nug Paulus matadkulagnu a amu Paulus nug amegpa aum. “Na am gilil dubutid tak amu, amupa gau hakab hamu atantan laaidpig amubia daatem! Geha Kayak Nug na oidku! Na do adi ate amupa epedilkutnu udime amge na danab imu amelagpa, ‘Ag nug oig!’ ame, amupa na do tapae neum,” awa aum. ⁴ Anam awa a amu danab ag guguitak hipaidna daapig ele amu ag apig. “Na Kayaknu mana metak danab dilag iki, nuhignu nai nau akutnu iite badatem?” aon apig. ⁵ Aeg Paulus aum. “O lailad, nug mana metak danab dilag iki daate amu da ii doomi. Kayaknu yak ate, ‘Nahip huupan iki danabnu amu na nai nau aib ame,’ amu da dootem,” awa aum.

⁶ Aria Paulus nug anam a daaegeg, nug doyom, hetodiak okai danab laala ag am do gumak danab-

Sadusi amu laala ag do gumak danab-Parasia amunu nug hetodiak okaipa ewa aum. “O lailad, da am do gumak danab-Parasia. Da mamel ele am do gumak danab-Parasia. Danab mauhpig amu dimpa ag edun hipaidkulagnu amu da oolpa genab doyen, ameg metem amunu gemu ag da iiku hetodiakpa meideg daatem,” awa aum. ⁷ Paulus nug nai amu a amu do gumak danab-Parasia amu do gumak danab-Sadusi ele gamagpa oo aeg bak be, aeg ona aeg do, aaku qag mak amu lopadpig. ⁸ Do gumak danab-Sadusi ag, “Danab mauhteb, ag edun ii hipaidmana amu engel ele iita amu oudi ele iita”, aon adapig. Amge do gumak danab-Parasia ag amu nai amu oh genab daate, ag amunu oolagpa genab doopig.

⁹ Amunu qag mepig ele amu ag ahan, wagai mena, huana baalag okai eegeg uke amu do gumak danab laala, ag do gumak danab-Parasia huupanu, ag ahan gagatag mena apig. “Ig danab amu anidtem amu nuhigpa ehed hak laa daye ii anidtem. Amu oudi laatai, iita engel laatai ele nai madipid,” aon apig. ¹⁰ Amu ag anam aon aeg, oo aeg bak okainab be, huana heeg, daup dilag okai nug anta, “Ag Paulus adan eedna, gamagpa pagupeg mauhkutai,” anana, oo bade, nug daup amelagpa, “Ag nona, Paulus gamagpanu aon, omalna gona, ag laulag oopa noig!” awa aum. ¹¹ Ag anam heeg, ded amu tuqan amupa Nadi Nug Paulus guguita hibaita dayaya nug aum. “Na hipaidna gagatag daye! Na aib badame! Na dahil nai Jerusalem mehuqme amubia na dahil nai Rom apa mehuqkut.” Nadi Nug anam awa aum.

JUDA AG PAULUS QEPEG MAUHĶUNU APIG

¹² Nadi Nug Paulus amegpa anam a, wagde ded amupa Juda laala ag qag mena, ag nai laipu gagatag qetan, ag inam apig. “Genab atan ig Paulus qeput mauhku. Ig e le ele paha ii lamata. Iita ig hamu daata, ig Paulus qeput mauheb, ig edut e le ele lakunig,” aon apig. ¹³ Amu danab Paulus qepeg mauhkuu nai gagatag qedapig ele amu, ahilag eb qak amu 40 editak. ¹⁴ Ag anam hewona, ag ahan, mana metak danab okai amu Juda dilag iki danab ele gumadna gona apig. “Ig nai gagatag qetat, atan atata, ig inam amut. ‘Ig e nakok laa paha ii lamata. Iita, ig hamu daaput ukeb, Paulus qeput mauheb amu ig edut e lakunig.’ Ig anam amut,” aon apig. ¹⁵ Ag anam anana amu ag nai baula tudidna apig. “Ig anam amut amunu ag amu hetodiak okai danab ele ag gemu nai mepeg, daup dilag okai topa ukeb, nug Paulus omala ag gumata nekunu od metaglag. Ag inam aon amegpa aig! ‘Ig Paulusnu nai amu baula diignab doognignu oonig daate!’ Ag anam apeg, nug omala neebeb amu ig bapaidta meidta daagnig amunu Paulus nug ag gumata ii beeb, ig geha nug qeput mauhku,” aon apig.

¹⁶ Ag anam hekulagnu apig amge Paulus apinag beka nug ag ib adan daapeg, Paulus noobob, qepeg mauhkuu matiegeg doya amu nug uka, daup laulag oopa noa, nug Paulus amegpa amunu aum. ¹⁷ Paulus nug nai amu doya amu nug daup 100 dilag iki laa onigpa e do, nug aum. “Na nid bau imu omalna, daup dilag okai topa gope, nug nai laa ab dookunu ate,” awa aum. ¹⁸ Aria daup 100 dilag iki nug nai amu doya, nug nid amu omala, daup dilag okai gumita uka, nug aum. “Mani

guitak danab Paulus, nug da onilpa e ukai, nug nid bau imu omale nagatopa udikulnu amelpa a, da omale bemi. Nug nai laa ele na amenpa akunu oo daate,” awa aum. ¹⁹ Aria nug omala uke, daup dilag okai nug nid amu epeg ada, omale giginpa goya, aya daaiya, nug nid amu amegpa aum. “Na adi nai da amelpa akut amu na a!” awa aum. ²⁰ Awa a amu nid bau amu nug amegpa aum. “Juda ag Paulusnu nai amu edun baula diig dooglagnu, na buti Paulus omalna hetodiak okai qag makpa nokutnu od metaglagnu apig. ²¹ Amge ag ham bubuteb amunu na ahilag nai amu aib dim lamidme. Adinu? Ag ahilkad danab 40 editak amu ag Paulus qepeg mauhkunu nai gagatag qetan, inam apig. ‘Ig e le ele paha ii lamata. Iita, ig hamu daaput ukeb, ig Paulus qeput mauheb dimpa ig edut e lakunig.’ Ag anam apig. Ag anam hekulagnu matin bapaidpig amu geha iiku ag na ahilag nai amu doon, adi ape dooglagnu dab mena, ameg mak daateb” awa aum. ²² Daup dilag okai nug nid bau nai amu matie doyowa amu nug amegpa aum. “Na da amelpa nai imu miag ame amu na danab laa amegpa nai amunu iinab matimna!” Nug nai gagatag amu awowa, he ukom.

DAUP DILAG OKAI NUG HE PAULUS SISARIA UKOM

²³ Aria daup dilag okai nug nai amu doya, nug daup 100 dilag iki adit onilahpa e doeh, amelahpa aum. “A daup 200 diiya, danab 70 hospa gokulagnu ele diiya, danab 200 laa amu ag ban adaglagnu ele diiped bapaidna, ag tuqan nain kilok amu Paulus omalna Sisaria gokulag. ²⁴ Ag Paulusnu hos laala

bapaidna medapeg, ena dayebbeb, ag nug omalna gabman okai anuqak onig Piliks topa gokulag,” awa aum. ²⁵ Nug anam ana malowa aria daup dilag okai nug ad udug laa inam yom.

²⁶ “Da Klodias Lisias, da ad udug imu danab okai, gabman danab anuqak okai, Piliksnu yaatem. Da na humidtem. ²⁷ Juda ag danab imu adan, qepeg mauhkunu hepig amge nug am Rom danab doomi amunu ag anam heegeg, da daup ele ig gota anadta, Paulus ag epelagpan aomut. ²⁸ Ag anam hepig amunu da ag nai adi diignu hepig amu da dookulnu danab imu omale, hetodiak ahilag qag makpa nomi. ²⁹ Noin, da od matai, ag da amelpa ahilag do naipanu nai laala nug bedupa yaana madipig amge ag nug keeke ehed heum amunu nug qeput mauhkunu o mani guitakpa mekunignu laa matieg ii doomi. ³⁰ Ag anam heeg, da nug aoi dayeye amu aria laa nug, Juda ag aka danab imu qepeg mauhkunu lokumakpa nai qagapignu doya, da amelpa aum amunu da danab imu iiku paha awe mei, nahippa ukom. Amu da danab ag nuhignu nai ele amu ag gona, na amenpanab nug adi ehed heum madipeg, amu anidkut.” Nug anam yom.

³¹ Amu daup ag ahilag okai ode dim lamidna, ag tuqan Paulus aon, Antipatris gopig. ³² Gona tena daaegeg, wagde butua daup laa oh ag edun laulagpa ukaegeg amu, danab hospa gopig amu ag Paulus omalna, Sisaria nopig. ³³ Danab hos ele ag Sisaria nona, ag yak udug amu gabman danab okai anuqak amu metona, Paulus ele omalna waeg, noobpa hibaita dayom. ³⁴ Paulus nug

hibaita dayeye, danab okai Piliks nug ad udug amu eb qa antowa, nug Paulus od metom. “Na apan diig am wan obatak okai adepa daate?” A amu Paulus nug aum. “Da am Silisia danab,” awa aum. ³⁵ Amu Piliks nug aum. “Laa ag na bedunpa nai yaapig ele amu, ag udipeg aria geha da nai nahip dookul,” awa aum. Awowa nug nuhikud daup amelagpa, “Ag Paulus aon, Herodesnu gabman laugpa inapeg dayad!” awa aum.

24

PAULUS PILIKS NOOBPA DAYOM

¹ Paulus lag amupa meeg dayeye, ded tanig ele uue, mana metak danab dilag iki Ananias, nug amu Juda iki danab laala ele ag danab laa onig Tetalas, nug hetodiakpa Paulus adi ehed heum amu ag oh odelag ma, nug nai amu gabman okai Piliks amegpa madikunu otieg, nug ag ele oh Sis-aria nopig. ² Noeg amu Piliks nug Paulus onigpa e, omalna doeg amu Tetalas aha, nug Paulus nug adi ehed heum amunu madikunu ha aum. “Danab nadi Piliks, na am ig ena ehanigtem. Ban hak iita, hamu enaib daatem. Nahip dab mak enapa keeke ena idu idu bete. ³ Amupa ig ab ab ohpa ig oonigpa enanag doota, ig nahipnu, hanhan ena heme aot aatem,” awa aum. ⁴ Tetalas nug anam awowa nug baula aum. “Anam aaku amge da nai elab madipi amel ii memananu, da na ihinig nai tutu imu api, na madodpa dookutnu unuqidtem.

⁵ Danab imu ig nug anidmut. Nug ehed kudum he bete. Nug wan atu ohpa, Juda oh dilagpa, nug he, Juda ag ahan nug qak bia heteb. Aria

huu ena iita laa, ag amunu Nasaret huu aon ateb amu, danab imu nug ahilag anuqak danab daate. ⁶ Nug anam haaha, mana metak lag ihinig amu ele dubutid medakunu heum amunu ig nug adamut. [Am ig ihinig dopa nug epedignignu hemut ⁷ amge daup dilag okai Lisias, nug aha, wagai ma, nug danab imu ig epenigpanu awom. ⁸ Nug danab imu ig adamut ele amu awa, danab ag danab imu nug bedupa nai yaapig ele amu, nug ag amelagpa, 'Ag Piliks gumidna gona hetodieg!' awa aum.] Amunu na naka danab imu nug hetodidna, od medape, geha nug ab, na nug ehed he, ig nug bedupa nai yaatem ele amu na amunu diig dookut." Tetalas nug Piliks amegpa anam matiom. ⁹ Am Juda apa daapig ag ele Tetalas nug nai matiom amu ehanidna ag apig. "Nai amu oh amu genabib," aon apig.

¹⁰ Am Tetalas nug nai matia male, gabman okai Piliks nug doyowa amu nug Paulus nug nai madikunu epegpa he, aria Paulus nug nai amu nob ma inam matiom. "Danab nadi, da dootem, na wan imupan epediak danab matu dig mena dayeye udie, gemu ele anam daatem amunu da oolpa ena doyeye, na noompa nai amu nob mekul. ¹¹ Na geha ag od madape amu ag ele inam ana apeg na dookut. Haen matu iita, metid laa amupaib da Jerusalem apa Kayak binag mekulnu gomi. ¹² Da mana metak laka nomi amu, da lag oopa apa danab laa ele aud ona aud ii doum. Juda ag da anam heiyi ii anidpig. Amu ag da Juda dilag nai doyak lag ohpa amu ab okaipa ele da danab ah ehed hekulagnu qag maate hei, laa ii

anidpig! Iitanab. ¹³ Amu gemu ag nai da bedulpa yan maditeb amu ag hepeg, na nai diig aaku am genab anidkutnu laa iita. ¹⁴ Amge da nai laipu imu ag amunu genab apig amu da api dookut. Da huu laa, Juda ag huu amunu, 'Ena iita,' aon ateb, huu amu ib ipunigte amu, da ib amu dim lamidtem. Da ib amu dim lamite, ig alankad dilag Kayak amu da Nug binag meinne, do nai niite amu propet dilag yak amu oh ele, oolpa genab dootem. ¹⁵ Da amu oolpa genab dootem amu da Kayak Nug geha heeb, danab nuhikud ag edun hipaidkulag, imu heteb amubia, da ameg metem. Opia awak danab amu danab nau ele oh, Kayak Nug heeb, ag edun hipaidkulagnu ameg metem. ¹⁶ Amunu da hanhan ded oh da ool opia awak, keeke ehed laa Kayak noobpa, danab ah amelagpa ele ii daamanu, da wagai metem.

¹⁷ Amu da anam hein, maq laala da uken, ab laalapa dayeye oiyeye, dimpa amu da eduen, da men dodo Judanu dadek madakulnu amu dod manen Kayak medakulnu Jerusalem temi. ¹⁸ Am da udat anam heinne, da Juda dilag kobolpa opia awak daakulnu kobol hein, mana metak lag oopa daaiyi amu ag da anidpig. Danab ah kudum da ele laa ii daamut, apa ele da hei, danab laala oqotilag laa ele ii hepig. Iita. ¹⁹ Amge Asianu Juda laala udipig amu, ag da adailpig amunu danab amu ag dahilnu nai ele dayeb amu ag ucin, na noompa da bedulpa nai yaalob am ena. ²⁰ Anam iita amu haen da Juda dilag hetodiak okai, onig Sanhidren, amunu qag makpa daaiyi, adi ehed laa dahilpa daate anidpig amu danab ucin, gemu daateb, ag

tutuku apeg doye! ²¹ Ag keeke laa ii anidpig. Iita, ag laipuib anidpigta. Amuam da ag oolagpa hibaiṭe, da nai laipu imu ein ami. ‘Dimpa Kayak Nug heeb, danab mauhpig amu ag edun hipaidk_ulagnu oolpa genab dooṭem amunu da hetodiakpa meidpig.’ Da anam emi amunutai ag da na noompa hetodiakpa meidpig,” awa aum.

PAULUS MANI GUITAKPA MAD ADIT DAYOM

²² Piliks nug Paulus nai amu maṭie doya, nug am kristen dilag oopa genab doyak amu kristen kobol ele tutuku doyom ele amunu nug Juda amelagpa, “Ag daapeg,” awowa, nug aum. “Dimpa daup dilag okai Lisias nug neeb amu da nai imu bapaidk_u,” awa aum. ²³ Nug anam awowa, nug daup 100 dilag iki amegpa, “Na Paulus aona, mani guitakpa me!” awa aum. Nug mani guitakpa meku amge mani guitak gagatagnab ii memanu aum. Amu Paulus laikud ag nug ehanidna, keeke aon gona meṭaglagnu amu aib ii aum.

²⁴ Am ded laala uue, Piliks nug wau Drusila ele, Drusila nug Juda budub, a uḍiya, Piliks nug Paulus nai laala maṭieb dookunu onigpa e, Paulus nug Kristusnu oopa genab doyaknu ib maṭieye doyom.

²⁵ Paulus nug opia awak kobolpa oiyak amunu mehuqa amu danab nug nuka nuhignu atog noa tutuku oikunu amu, geha dimpa Kayak Nug danab oh epediadkunu nai ele mehugēge amu, Piliks nug nai amu doya, oo baḍe, nug Paulus amegpa aum. “Ahan uke! Dimpa da haen ena laa dayeb amu da geha baula dookulnu na oninpa ekul,” awa aum. ²⁶ Nug oo baḍom amge nug ele inam dab meum. “Paulus nug men doḍo laala medeb

uhuqkul.” Anam dab maama, nug haen kudum Paulus onigpa e udie, nug ele nai madipid. ²⁷ Amu Piliks nug anam haaha dayeye, dimpa mad adit uke amu Porsias Pestus nug udia, Piliksnu udat amu nug adita aokunu heum amge Piliks nug Juda ag oolag ena daakunu Paulus mani guitakpanu ii uhuqom.

25

PAULUS NUG PESTUS NOOBPA DAYOM

¹ Pestus nug wan obatak okai amu gumakunu udia, Sisaria daye, ded ewam uue nug aha, Jerusalem teum. ² Pestus nug Jerusalem te amu mana metak danab okai amu iki danab ele ag gumidna gona, ag Paulus ehed heum amunu amegpa awona, ag gagatag inam ele apig. ³ “Na ig ehanigna, danab amu aon mepe, ipa Jerusalem udiad!” gagatag apig. Ag anam apig amge ag ib adan lokumna daanna, Paulus qepeg mauhku amunu hepig. ⁴ Ag anam aeg amu Pestus amelagpa aum. “Paulus nug Sisaria apa mani guitakpa daate amu haen elab iita da edue Sisaria nokul ⁵ amunu iki danab ag da dim lamidpeg oh nokunig. Aria danab amu nug ehed heum dayeb amu aria ag nug bedupa nai yaaglag,” awa aum.

⁶ Pestus nug Jerusalem ag ele ded eblaih ewantai iita ten anam dayona, nug edua Sisaria noum. Ded amu uue, wagde ded amupa nug aha, hetodiak abenpa dayeye amu nug daup nuhikud amelagpa, “Ag Paulus omalna udieg!” awa aum. ⁷ Ag Paulus omalna doeg amu aria Juda Jerusalemnu nopig amu ag dona daanna, ag

nai kudum Paulus bedupa yaan madipig amge ag ahilag nai amu diig iita. Ag hetodiakpa nai hamu kudum Paulus bedupa yaapig.

⁸ Ag anam heeg amu Paulus aha, ahilag nai amu nob ma, inam aum. “Da keeke aditai ehed laa ii hemi. Da Juda dilag donu amu mana metak lagnu amu Kaisanu ele ehed laa ii hemi,” awa aum. ⁹ Paulus anam awa aum amge Pestus nug Juda, ag oolag ena daakunu, ag oolagpa ya, nug Paulus amegpa inam aum. “Da hepi, ig oh Jerusalem teta, nahip hetodiak apa anidkunignu elele dootemte?” awa aum. ¹⁰ Nug anam aum amge Paulus nug aum. “Da gemu Rom dilag hetodiakpa daatem amuam ena. Da eduen Juda dilag hetodiakpa ii daapa. Na aaku doome, da Juda dilagnu ehed laa ii hemi. ¹¹ Da mauhkulnu keeke laa hemi dayeb amu ag hepeg mauhkul amu elele, ag ena da iupeg mauhkul. Amge Juda ag da hetodiakpa meidna, nai madipig ele amu, nai amuam genab iita dayeb amu danab laa nug da ag epelagpa meidkunu amu ehed amunu da Rom uken, Kaisa topa tein api, nug dahil hetodiak amu nug dookunu ool daate,” awa aum. ¹² Paulus nug anam a amu Pestus nug kaunsil danab ele tatam nai mationa amu nug Paulus amegpa aum. “Na Kaisa nug nahip hetodiak dookunu onigpa etem amunu aria na Kaisa gumidna gokut,” awa aum.

PESTUS PAULUSNU AGRIPA OD METOM

¹³ Am ded laala uue amu king Agripa amu nug apinag Benaisi ele a Pestus humidkulahnu Sisaria udipid. ¹⁴ A udiya, ded nakok kudum Sisaria daaeh-heh amu Pestus nug king amu amegpa Paulusnu

nai amu matia aum. “Piliks nug danab laa nug anuka mani guitakpa meum ina daate. ¹⁵ Anuka da Jerusalem tein daaiyi, mana metak danab okai amu Juda iki danab ele ag nai nug bedupa yaan, ag da amelpa nuhig ehed hak amu nob medakulnu apig.

¹⁶ Amge da eduen ag amelagpa inam ami. ‘Ig Rom, ihinig kobol amu ig danab laa hamu qeut ii mauhte. Tatam danab nug ehed heumtai o iitai hetodiakpa anidtem. Nug ehed heum anidta amu ig nug nob metagnig. Iita am iita,’ awe ami. ¹⁷ Ag anam heeg, da ai, ag da ele oh udit daamut. Amu da haen ii kakidmi. Iita, ded amu uue wagde, ded amupa amu ig hetodiak abenpa daata, danab amu omalna dookulagnu amelagpa ai, aon doeg, ¹⁸ danab ag nug bedupa nai yaapig ele ag ahan hipaidna, nug bedupa nai yaapig amge ag ahan, nug kobol laa ehed heumnu, da ag hekulagnu dab memi bia laa ii madipig. Ag anam iita. ¹⁹ Ag ahilag metid hak kobolnu amu danab laa onig Jesus, Nug mauhom amge Paulus nug, ‘Danab amu Nug am bau daate,’ awa ate amu ag amunu nug ele aeg ona aeg do hepig. ²⁰ Ag anam matieg amu da nai amu ool ii maite, diig dookulnu hemi amge da elele iita, ool ii maitom amunu da nug od metami. ‘Na Jerusalem gope, da geha apa nai nahip amu oh dookulnu elele dootemte?’ awe ami. ²¹ Da anam ami amge Paulus nug mani guitakpa dayebob, dimpa Kaisa nuhig nai amu bapaidkunu oo daye aum amunu da nug mani guitak lag oopa dayebob, haen laa da nug hepi, Kaisa topa gokunu ai, ipa ina daate,” awa aum. ²² Nug anam a amu, aria king

Agripa nug Pestus amegpa aum. “Aaku amu da ele, da danab amu nuhig nai dookulnu ool daate,” awa aum. A am Pestus nug aum. “Am ena, buti ab dookut,” awa aum.

PAULUS NUG AGRIPA AMEGPA NAI MATIOM

²³ Aria ded amu uue, wagde ded amupa king Agripa nug Benaisi ele a ahai, bala meya, ded amupa amu qag mak lag oopa noya daaeheh, daup danab okai okai amu ab okai amunu iki danab oh ele nona daaegeg, Pestus nug he, Paulus omalna wapig. ²⁴ Paulus omalna waeg, Pestus nug ag daapig ele amu, nug ag amelagpa aum. “King Agripa na aaku daatem amu danab oh ig ele daatem ag danab imu anteg! Juda danab ah oh ag Jerusalem apa am ipa ele, ag da amelpa nug dimug mena, ag huana apig. ‘Na danab amu qepe mauhad! Nug ii daama,’ aon apig. ²⁵ Amge da nug keeke ehed heum, nug mauhkunu amu da laa ii anidmi. Amge nug nukka Kaisa nug nuhig nai dookunu onigpa e amu da nug Kaisa topa mepi gokunu ai, nug amu ameg ma daate. ²⁶ Amge imu ele, da nug keeke adi heumnu nai amu genab antena, udug yaapi ukeb, ihinig Kaisa anidkunu amu ele laa ii anidmi. Anam daate amunu king Agripa na iiku dayeye am danab laa oh ele ag daaegeg, da danab imu omale nahippa domi. Ig oh nai nuhig anidta, da nuhignu nai laa udugpa yen mepi gokunu anam hemi. ²⁷ Adinu? Da mani guitak danab laa nug ehed adi heum udugpa ii yen mepi gokunu oolpa ena ii dootem,” awa aum.

26

¹ Pestus nug anam a, Agripa nug edua Paulus amegpa aum. “Aria na adi heme amunu na hetodiakpa daatem amu na amunu madikutnu elele.” Nug anam a amu Paulus nug epeg huma, nug adi adi heum, nai amu inam dig ma matiom.

² “O King Agripa, da na noompa dayeye, Juda danab ag da adi adi heminu yaaidteb amu da keeke adi adi hemi amunu madikulnu ug ii dootem.

³ Adinu? Na Juda dilag kobol amu ahilag dab mak pide pide ele oh eledenab dootem amunu da ug ii dootem. Na amu oh dootem amunu na ootpa madod ele nai dahil imu dookutnu unuqidtem,” awa aum.

⁴ Paulus nug nai amu anana, nug nai tudita inam aum. “Da nid nakokpan udia gemu batak atem atem oimi amu Juda danab ag dooteb. Yo, da apal diig domipa amu Jerusalem apa ele, da atem atem oimi amu ag dooteb. ⁵ Ag haen elabnab da aaku dooidteb amunu ag oolag dayeb, ag da ihinig metid laih laa, gun kudumnab ele, amuam do gumak danab-Parasia, da huu amunu laa daami akulagnu elele daateb. ⁶ Amu Kayak Nug anuka ig mamenkad amelagpa Nug heeb, mauhak adi ag edun hipaidkulagnu nai qaka aum amu da amu gog tekunu dab metem amunu Juda ag da bedulpa nai yaateb. ⁷ Jakop bekod tuelp, ag budulkad, am Juda danab, ag Kayak binag amun tuqan ele meegeg, ag amu gog tekunu oolag huana daate. O King da ele nai qaka anak amu gog tekunu dab metem amunu ag da ehed heminu ateb. ⁸ Amge Kayak Nug heeb, danab ag edun hipaidkulagnu elele iitate? Adinu ag Juda ag amunu ug dooteb?”

⁹ Da ele anuka Nasaret ted Jesus amu Nug onig hepi iita mekununab dab mak gagatag aomi. ¹⁰ Da anam aaku Jerusalem apa hemi. Mana metak danab okai ag aeg amu da danab kudum, ag Jesus dim lamidpig ele amu adalaten, mani guitakpa maadmi. Maati amu laa mauhkulagnu apig amu da ele anam ami. ¹¹ Haen kudum da Juda dilag nai doyak laka uken, ag Jesus dapidna, aon aon qetaglagnu wagai mein, guitak matami. Da ahilagnu opodi bak huanaknab doomi amunu da atu laihpan ab laalapa ele ug madaikulnu apa dim lamadmi.

¹² Anam heiyi, ded laa mana metak danab okai ag da Damaskus gokulnu aeg aaku gomi. ¹³ O King, da aam ameg tutukupaa oiyi, amahlak laa hab atannu na, da amu laala da ele gomut amu ig talilika amahale anidmi. Amahlak amuam aamnu amahlak editak. ¹⁴ Amahlak amu talilike, ig oh neta qeut, baag laa Hibu naipa inam a doomi. 'Saul, Saul na adinu da ehed heidtem? Na hetem am genab, ena iita. Na da waalpa ii daatem.' ¹⁵ Nug anam a amu da ami. 'Nadi, na am aun?' Ai am Nug aum. 'Da am Jesus, na da ehed heidtem. ¹⁶ Amge na hipaidna daye! Da na dahil udat nid daakutnu, na dahilpa adi anidme amu dimpa da na adi ipunidkul, na amunu danab laala amelagpa madikutnu aaku tituanidtem amunu da gumiten udimi. ¹⁷ Amu Israel danab amu iita adi danab ele ag hepeg nauhkutnu hekulag amge da na ehanidpi, ena daakut. ¹⁸ Da hepi, na gona hepe, ag oolag edueb, ag Satannu gatatupa ii daamnanu, ag dahil amahlakpa oiglagnu, ag Satannu gagatag waapa ii daamnanu, ag Kayaknu gagatag waapa

daaglagnu, ag hipunin uhuqa metak aoglagnu, ag danab laala, ag oopa genab doyak ahilagpa opia awak daateb ele amu, ag ag oolagpa ele daaglagnu, amelag opatkulag.' Nug da amelpa anam aum.

¹⁹ Aria King Agripa, Kayak da adi hekulnu ipunidom amu da Nug ode tapai ii neum. ²⁰ Iita. Da tatam Damaskus danab amelagpa nai matieye amu dimpa Jerusalem danab amu Juda danab amu iita adi ele amelagpa ami. Da ag amelagpa nai inam matimi. 'Ag oolag edueb, ag edun Kayak waapa daanna, danab laala ag genab oolag eduom anidkulagnu, ag kobol tutukuib dim lamiteg!' awe ami. ²¹ Da anam hemi amunu Juda danab ag iupeg mauhkulnu mana metak laka apa adailpig. ²² Amge Kayak Nug da ehanide udie, gemu ele ehanidte amunu da gemu iiku hibaiten dayeye, danab okai adi amu danab laa oh ele amelagpa nai imu maditem. Da nai laa ii maditem. Iita. Propet adi am Moses ele ag adi bekunu apig amu da amu aakuib maditem. ²³ Nai amuam inam. 'Kayak Nug anuka Kristus Nug guitak doyowa, Nug anuqa edua hibaita, nug Juda danab amu iita adi danab ele ehanitak aoglagnu ib ipuanadkunu dab meum,' ” awa aum.

²⁴ Paulus nug anam aawo amu Pestus nug Paulusnu nai otada eum. “Paulus na am kaaka nitom. Na sul huanak heme amunu doyak okai nahip amu he, kaaka nidate,” awa eum!

²⁵ Pestus nug anam a amu Paulus nug aum. “O Nadi Pestus, da am kaaka ii nidate! Da maditem imu am genab, nai kaaka iita. ²⁶ King imu amu nug keeke imu oh doote amunu da nug amegpa ii badede, da nai imu maditem. Keeke imu am

lokumakpa ii beum amunu da dootem, nug keeke imu oh doyom,” awa aum. ²⁷ Paulus nug nai amu Pestus amegpa anana, nug edua Agripa amegpa aum. “King Agripa, na propet dilag nai ootpa genab dootemte?” awa aum. Paulus nug anam anana, nug nai tudita, nug nuka od mak nuhig nob ma aum. “Yo, da dootem. Na ootpa genab dootem,” awa aum. ²⁸ Paulus nug anam a amu Agripa nug Paulus amegpa aum. “Nahip nai matiak haen tutu imupa da kristen bekulnu miag dootemte?” awa aum. ²⁹ Nug anam a amu Paulus nug aum. “Da haen elab madikul o da haen tutu madikul amuam keeke okai iita. Keeke okai amu na da daatem bia daakut amu da amunu unuqidtem. Na naka iita. Gemu danab laa imu oh ag dahil nai dooteb, ag ele anam daaglagnu unuqidtem. Sen imu aakuib am ag aoglagnu da ool ii daate,” awa aum.

³⁰ Paulus nug nai amu matia male, king Agripa amu gabman okai Pestus amu king apinag Benaisi amu danab daapig ele, ag ahan, ³¹ dimitim gona, aka aka inam madipig. “Danab umu nug keeke laa, nug mani guitakpa daakunu o qeput mauhkunu laa ii hete.” ³² Am king Agripa nug Pestus amegpa aum. “Danab umu nug Kaisa nuhig hetodiak dookunu ii elo amu na padape golo,” awa aum.

27

PAULUS ROM GOKUNU UBPA TEUM

¹ Ag nai matin, ig Rom gokunignu dab mak awona, ag Paulus nug am mani guitak danab laala ele amu ag daup 100 dilag iki nug gumadkunu apig. Nug am Kaisa huunu daup iki onig Julias. ² Ig

gokunignu ahat, oolta Adramtiam dilag ub laapa temut. Ub amuam Asia dilag ab okai okainu aben ilon daatebpa oiyaya eedkunu ukom. Aristakus, nug am Tesalonika ted, nug ig ele oh gomut. Tesalonika am Makedonianu ab okai laa.

³ Ukautut, ded amu uee, wagde, ded amupa ig gota Saidon eedmut. Julias nug Paulus nuhigpa kobol enaib haaha amu Paulus nug laikud gumata oiyebbeb, e keeke metaglagnu aum. ⁴ Aria apanu ig ahat, Saidon uuta ukautut, ulah nug ehed dutunika heum amunu ig nud Saipras hego laih ulah ii ukompa gomut. ⁵ Gota gota ig Silisia Pampilia ele dilah yu gamagpanab okulta gota, ig Maira, Lisia wanpa, apa temut. ⁶ Ab amupa teta amu daup 100 dilag iki nug Aleksandrianu ub laa Rom gokunu dayeye anta, nug omaike, ub amupa temut. ⁷ Aria ig ahat, ub amu huana ii ugeke, ded laala qinonob gota gota, Kinidus gukuidta gomut. Aria ulah nug he, ig ib gokunignu dab memut am elele iita amunu ig nud Krit hego laih ulah huana ii ukompa gota, Salmani gukuidta temut. ⁸ Ulah nug heehe, ig qinonob, kagi ele Krit lang aidta gota gota, aben laapa temut. Aben amunu ag, "Ilon Ena," aon ateb. Amu ab okai Lasia guguitak.

⁹ Ig anam qinobnob gota, ded kudum kakidmut, Juda dilag kud ma e ii lanaknu ded amu uka iita meum amunu yupa oiyaknu elele iita haen aaku doum. Yu nauha auta awom amunu Paulus nug aha amelagpa aum. ¹⁰ "O danab, ig ahat gokunig dayeb amu geha ig qagaitak okai anidkunig dootem. Keeke kudum padal mekulag. Ub oopanu keeke amu ub eleib ii padal memaya! Iita. Ig bedunig ele

padal meku,” awa aum. ¹¹ Paulus nug amelagpa aum amge daup 100 dilag iki nug ub gumak iki amu ulum adak danab ele, nug amu dilah nai oopa genab doya, Paulus nai aum amu oopa genab ii doyom. ¹² Ilon amupa amu ulah nadi haenpa ub eeda daakunu amu aben ena iita amunu ubpan danab kudum ag aben amu edidna gokulag nu apig. Ag gona, Piniks tena, aben amupa oug haenpa daaglag nu oolag dayom. Piniks amu Kritnu ilon laa amupa amu ulah heeb, lokuma dayaknu aben ena.

ULAH NADI YUPA EHED NAUNAB AHOM

¹³ Am dimpa ulah yau udiom, nug am gagatagnab ii heum amunu ag apig. “Ig onig dayom bia, ulah imu udi te amunu ig ilon imu uut laih gokunig,” aon matinna amu ag anga eedeg te, ig Kritnu langnab aidta gomut. ¹⁴ Amge ig nakokib wautut amu ulah yawalti gagatag Kritnu neum. ¹⁵ Na ulah amu ub dutune, ub tutuku gokunu elele iita daye, ig hamu maya memut. ¹⁶ Maya meta gota, nud laa Koda ateb amu hego laih gota, ig oolaknu ub nakok amu qakagnignu udat nadinab heta, ig qakamut. ¹⁷ Aria ag mudi laala akan, ub okai amu gagatag daakunu gamagpa itapig amge ag badapig. Adinu? Ag, “Ig ehed gota, Aprika gukuidtata, malpa temata,” dab menan doopig amunu ag ahan, ubnu lamen gagatag ulah dutunte ele amu, uhuqeg ne, ig hamu maya memut. ¹⁸ Amu ulah duban ele ig ehed naunab iqom amunu ded amu dimpa ag ahan, dig mena ubpanu keeke akaeg yupa noum. ¹⁹ Ag anam heeg uke, ded ewampa amu ag aka epelagpa ubnu keeke laa autna budieg noum. ²⁰ Am ded kudum ig

aam hodopai ele ii anadmut, ulah okainab hanhan ig dutunigtom. Anam heehe, ig ihinig dab makpa, “Geha ig gota aben laapa teta ena daagnig,” laa ii dab memut. Iita, “Ig aaku padal mekunig,” aot amut.

²¹ Anam dayeye, aria ded kudum ag e ii lapig, baalag qetom. Amu dimpa anam daaegeg, Paulus nug aha, hipaita aum. “Danab ag da tatam nai ami amu dim lamidna Krit ii uulob, ig apa daalom am ena. Anamlob amu ig qagaitak imu ii anidlom. Amu keeke oh padal ii melo. ²² Amge da geha iiku ag amelagpa atem. Ag oolagpa madod ena dayeg! Ig oonigpanu danab laipu laa ii mauhma. Ub nuka nauhku,” awa aum. ²³ Paulus nug anam awowa amu nug baula tudita aum. “Gemu tuqan imupa, Kayak, da nuhig daatem, da Nug binag ele metem amu, nuhig engel nug da gukuida hibaita dayaya, ²⁴ nug aum. ‘Paulus na aib badame! Na am gona, Kaisa noobpa hipaidkut. Am doye! Danab oh na ele ubpa daateb amu Kayak Nug unuqitak nahip doyom amunu geha ag ii mauhmana.’ Nug anam awa, da amelpa aum. ²⁵ Amunu ag aib badapig. Adinu? Da Kayak, Nug da amelpa nai aum amu keeke amu anam bekonu oolpa genab dootem. ²⁶ Anam aaku amge ig gota, nud laa gukuidput ub aolku,” awa aum.

ULAH HE UB LOPADOM

²⁷ Aria ded amun tuqan ele eb qak 14 amupa ig maya meta, Adria yupa gotata, tuqan aam ameg tutuku aokunu heehe, ubpanu danab ag, “Ub udia, nud laa aaku guguitom,” doopig ²⁸ amunu ag melemel mekulagnu melemel yupa budieg no

amu melemel anidpig, amu le noa ukak 40 mita. Aria ig nakok wata gota, ag edun melemel mepig am le noa ukak 30 mita anidna, ²⁹ aaku ag badan, “Ig gota gota, aben men elepa aolkunigtai,” apig. Ag anam dab mena amu ag anga wadele akan eeg, ub nob laih dimugpa noeg, ag ahan paha wagdeb aam nekunu tapadna unuqidpig. ³⁰ Anam henana, ubpanu udat danab ag ahan, ub uun gokulagnu ib matin, ag oolaknu ub nakok amu uhugeg noono, ag ham bupuna, “Ub okai noobpa anga eput nokulagnu hetem,” anana hepig ³¹ amge Paulus nug daup 100 dilag iki am daup ele amelagpa aum. “Am danab umu ag ubpa ii daaglag amu ag ubpa daateb amu ag padal mekulag,” awa aum. ³² Nug anam aum amunu daup ag oolaknu ub amunu mudi otadeg, ub nakok maya ma ukom.

³³ Aria wagde, aam bekunu heehe, Paulus nug aha, danab oh ag nakok bedulag gagatag cekunu amu nug ag amelagpa aum. “Ag ahan, e nakok aon laig! Haen elabnab ag oolagpa madod iita daanna, oolag ug ele daapig. E laa ii lapig. Ded 14 iiku hamu daapig. ³⁴ Amunu da ag amelagpa iiku atem. Ag e laala aon lana, gagatag aweg! Doyeg! Ag oolagpa laipu laa nug ii mauhma,” awa aum. ³⁵ Nug anam awa amelagpa anana amu nug bret awe, ag antegeg, nug ag noolagpa Kayak unuqita, nug bret pana awa laum. ³⁶ Paulus nug anam he amu danab oh ag anidna, ag oolagpa gagatag doon, ag ele e aon lapig. ³⁷ Ig danab ubpa daamut ele oh amu 276. ³⁸ Ag e laeg elele daye amu aria ub amu ug iita daakunu ag wit akaeg yupa noum.

³⁹ Ag anam heeg, wakade, aam be, ag atu anidpig

amge ag wan amu adepa amu ag ii doopig. Ag ii doopig amge ag ilon laa wana ukak ihi ena ele anidna, “Apa gota ihipa tekunignu eleletai,” apig. ⁴⁰ Ag anam anana, anganu muḍi otadeg yupa noono amu ag muḍi ulum gagatag daakunu itapig am ele uhuqnana, ulah lamen heeg te, ub ihi amupa tekunu ukom. ⁴¹ Ukom amge yu gamagpa ihi duḥune bak, nud amu guguitak daate ele amu, ub nug uka, amupa ta, aola gagatag epom. Ub nob amu aola, gagatag epa dayeye, aaku duban ub nob laih dimugpa o, ub aaku aodom.

⁴² Ub aode, daup ag ahan mani guitak danab ilog mena oolna gomananu aqaglagnu hepig. ⁴³ Ag anam hepig amge daup 100 dilag iki nug Paulus ehanita, ag anam ii hemananu ana, nug danab oh laa ilog mak doodpig ele amu ag tatam ubpanu oolna, yupa ilog men gona, yu ihipa gokulagnu aum. ⁴⁴ Aria danab laala amu ag ilog mak ii doodpig ele amu ag ub aodom amunu ad maha laipu laipu diin, maya mena gona eedkulagnu aum. Nug anam a amu ag anam henana, danab oh ag enaib gona, yu ihipa tepig.

28

PAULUS MALTA DAYOM

¹ Ig oh enaib gota, yu ihipa teut amu ag nud amu onig Malta aeg doomut. ² Danab ah amupanu ag ihinignu kobol enaib hepig. Am gu ne, atu oug meum amunu ag ab ilon, ig oh omaikeg, udigkunignu guguitak gomut. ³ Am Paulus nug ab hidig laala aka, ab ewewe me, am mat nau laa ab hidigpa dayeye, ewe ba, Paulus emala,

aegpa aiha ilul ewa dayom. ⁴ Mat Paulus epegpa anam ha dayeye, ab amupanu danab ah ag mat amu Paulus epeg emala, ilul ewa daye anidna, ag aka aka ahilag dab makpanu madipig. “Danab umu nug amu danab laa qe mauhom bia dootem. Amupa nug nob awa mauhkunu dayom amge nug yupa ii mauhom. Yupa ii mauhom amge geha nug Kayaknu nob metak qe edidkunu elele iita,” aon apig. ⁵ Ag anam aon apig amge Paulus nug mat amu maute, ab adupa no, nug bedupa keeke atentai laa iita, eleleib ena dayeye, ⁶ abpan danab ag nug dab metan, neekidna mat emalom abenpa titideb anidkulagnu o iita mauha na qeeb anidkulagnu dab menan, ag haen elabnab daapig. Daapig amge Paulus nug bedupa ug laa ii be anidpig amunu ag dab mak edun, inam apig. “Nug am Kayak,” aon apig.

⁷ Aria aben amu guguitak amu, nud amunu gumak danab okainu wan laa dayom. Danab amu nug onig Pablias. Danab amu nug ig omaike, nug laugpa gota, ded ewam apa daautut, nug dab meka auta awom. ⁸ Ig apa daatta, Pablias mameg nug bedu gakadak ode amu hiodak ode ele awom niieye, Paulus nug gumiita wana unuqita, epeg qadepa me, ena dayom. ⁹ Paulus nug anam he amu nud amupanu ode danab laa oh ele ag uдин, ehanitak aon, ena daapig. ¹⁰ Aria ag kobol enapa dab mekaegeg, dimpa ig gokunignu heutum, ag keeke kudum, ig keeke amunu iita ele amu, ig aot gokunignu megapig.

PAULUS ROM TEUM

¹¹ Am ig nud amupa amu kalam ewam daamut dimpa ig Aleksandrianu ub laa, ulah nadi amu iita mekunu ameg ma dayom ele amu, ig amupa teut, aika ukom. Ub amu noobpa kayak ham bupuak gani ele dotolah daapid. A onilah Kosta, Paluks ele. ¹² Ig gota, Sairakyus teta, apa ig ded ewam daamut. ¹³ Am ig Sairakyusnu ahat gota gota, Risiam teut, ded laipu uke amu ulah yau udiom. Ded amu uue, wagde ded amu ig Piutiolai temut. ¹⁴ Ab amupa am ig kristen laala anatat heeg, ig ded eblaih adit ag ele dayota, dimpa amu ig ahat baenigpa Rom tekunignu gomut. ¹⁵ Ig Rom gokunignu teutut, Romnu kristen ag ig ukautut amu doona, laala ag ahan, e daden medapig aben onig Apias apa gona, laala ag aben laa onig Hik Awak Lag Okai Ewam apa ele gona, ig ibpa anikeg, Paulus nug anata, nug Kayak unuqitowa, oopa gagatag awom. ¹⁶ Gagatag awe, ig Rom oopa nout am gabman nug a, Paulus nug nuka lag laapa dayeye, daup danab laipu gumeme daapid.

PAULUS NUG ROM ABPA NAI ENA MEHUQOM

¹⁷ Paulus nug apa dayeye, ded ewam uue nug Juda dilag iki danab onilagpa e uдин qag meeg, nug amelagpa inam aum. “O lailad, da ihinig huu amu tapadpi nokulagnu o iita ig alankad dilag kobol amu nau ainne maute laa ii hemi. Amge Juda ag da Jerusalem hipalidna Rom danab epelagpa meidpig. ¹⁸ Meideg, Rom ag dahil hetodiak doopig amu ag da bedulpa ehed hei, iueg mauhkulnu laa ii anidna, ag da uhuqilkulagnu apig. ¹⁹ Amge Juda danab ag nai amu uun di medaeg, da dahil ib laa ii dayom amunu da Kaisa nug dahil hetodiak

dookunu ami. Amge dahil huupanu da laa hetodiakpa ii maadmi am gemu ele laa ii maadpa. ²⁰ Diig amunu da ag gemu daateb, da ag ele matit, api anidna dooglagnu am da ag anadkulnu ele ool daye onilagpa emi. Da keeke ig Israel ameg metem ele amu nuhignu da oolpa genab dootem. Amunu diig amupa gemu sen imu da epel qakom,” awa aum.

²¹ Paulus nug anam awa a amu ag nug amegpa apig. “Juda danab laala ag nahipnu doognignu amu ad udug laa yaan meeg udie, ig ii doomut. Juda danab laa udia, nug kaya amunu amenigpa matiaya, nug na dimunnu laa ii aum. ²² Amge ig am na naka nahip dab mak amu odenpa madipe doognignu oonig daate. Ig dootem, ab ab ohpa danab ah laala ag kristen dilagnu nai ehed idu laala maditeb.” Ag anam aon Paulus amegpa apig.

²³ Ag Paulus ele nai anam mationa amu ag ded meeg, ded amupa danab ah kudum ag Paulus gumidna, nug dayom, lag amupa udieg, butuanu uke tueb batak nug Jesusnu nai diig amu amelagpa mehuqaqa, Kayaknu do madodnu nai amu ele mehuqaqa, nai laala Mosesnu dopa niite amu propet dilag yaknu ele, nug nai amupa ag Jesusnu oolagpa genab dooglagnu, ahilag dab mak mad eta ipuanata matiom. ²⁴ Nug nai mehuqe, danab laala ag doona, oolagpa genab doopig amge laala ag oolagpa genab ii doopig. ²⁵ Ag anam henana ag gokulagnu gonana, ag am aka aka ahilag dab mak ib pide pide dayeye, ag ahan gopig. Ag anam henana gopig amge Paulus nug tatam nai laa ahilagnu inam mehuqom. “Kayak Oudi Nug ig alankad amelagpa nai imu genabnab propet Jesaia odepa

aum. Nai amuam inam. ²⁶ ‘Na danab ah umu gumadna gona, inam ape doyeg! Geha ag am nai daulagpa dooglag amge nai meu am tutuku ii doomna. Geha ag neegkulag amge ag diig tutuku ii anidmana. ²⁷ Adinu? Danab ah imu ag am oolag itua malom. Ag nai meu dooglagnu bahilag yaate, amu ele ag amelag heeg gaduom. Amu iita daalo, ag amelagpa keeke anidna, nai doonna, ag nai diig oolagpa tutuku doon, ag edun dahilpa dopeg, da eduen hepi, geha ag ena daaglag.’ Jesaia nug anam yom. ²⁸ Amunu ag doyeg! Kayak Nug ig edua awigkunu udat ena ihinignu heum imu, Kayak Nug he, iita adi danab dilagpa ukom. Ag am dooglag,” awa aum. ²⁹ [Am Paulus anam a, Juda danab ag gona, ag aka aka naipa a ona a doak nadi hepig.]

³⁰ Mad adit Paulus nug nuka lag daden meum amupa dayaya, danab ah oh nug gumidna udiegeg, nug kobol enaib ahilagpa heum. ³¹ Nug am Kayaknu do madodnu nai amu danab ah ipuanatata amu Nadi Jesus Kristusnu nai ele nug nai amu badak iita ele mehuqom. Nug anam heehe, danab laa nuhignu aib ii aum.

KAYAKNU NAI Tituanak Bau
The New Testament in the Nobonob Language of
Papua New Guinea
Nupela Testamen long tokples Nobonob long Niugini
copyright © 1990 Wycliffe Bible Translators, Inc.

Language: Nobonob

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-02-07

PDF generated using Haiola and XeLaTeX on 3 Mar 2023 from source files dated 9 Oct 2020

ed374bb9-d819-53d1-a85b-f86cce3892e1